

四庫全書

經部

欽定四庫全書

儀禮經傳通解續卷二十一

宋 楊復 撰

祭法 祭禮五

大宗伯之職掌建邦之天神人鬼地示之禮以佐王建

保邦國

建立也立天神地祇人鬼之禮者謂祀之祭之享之禮吉禮是也保安也所以佐王立安邦國

者主謂凶禮賓禮軍禮嘉禮也自吉禮於上承以立安邦國者互以相成明尊鬼神重人事疏曰大宗伯之職者以上列其官此列其職也云掌建邦之天神人鬼地示之禮者單言邦據王為言也云以佐王建邦保國

者邦國連言據諸侯為說也又曰云立天神地祇人鬼之禮者謂祀之祭之享之者經先云人鬼後云地祇鄭則先云地祇後云人鬼者經先云人鬼欲見天在上地在下人藏其間鄭後云人鬼者據下經陳吉禮十二先地祇後人鬼據尊卑為次故也云禮吉禮是也者案下云以吉禮事邦國之鬼神示則此亦吉禮故云禮吉禮是也云保安也所以佐王立安邦國者主謂凶禮賓禮軍禮嘉禮也者鄭知建保邦國中有凶禮已下者案下大其次有五禮具此經直云天神人鬼地祇吉禮而已又邦國之上空云建保故知建保中有四禮也是以鄭即云自吉禮於上承以立安邦國者互相成也互相成者王國云吉禮亦有凶禮已下邦國云四禮明亦有吉禮矣以其神非人不事人非神不福故又云明尊鬼神重人事也尊鬼神者據主國特云吉禮重人事者據諸侯特言凶禮已下各舉一

以吉禮事邦國之鬼神示

謂事

邊欲見五禮皆重故也

祀之祭之享之故書古或為告杜子春云書為告禮者
非是當為吉禮書亦多為吉禮吉禮之別十有二疏
曰此已下敘五禮先以吉禮為上云事邦國之鬼神示
者據諸侯邦國而言者也以其天子宗伯若還據天子
則不見邦國若以天子宗伯而見邦國則有天子可知
故舉邦國以包王國又曰云事謂祀之祭之享之者還
據已下所陳先後為次若然經先云鬼與上下體例不
同者欲見逢時則祭事起無常故先云人鬼也云吉禮
之別十有二者從此下經以禋祀血祭二
經天地各有三享人鬼有六故十二也

以禋祀祀昊

天上帝以實柴祀日月星辰以禋燎祀司中司命觀師

雨師

禋之言煙周人尚臭煙氣之臭聞者禋積也詩曰
苾苾芬馥之禋之三祀皆積柴實牲體焉或有

玉帛燔燎而升煙所以報陽也鄭司農云昊天天上
帝玄天也昊天上帝樂以雲門實柴實牛柴上也故書

實柴或為賓柴司中三能三階也司命文昌宮星風師
箕也兩師畢也玄謂昊天上帝冬至於圜丘所祀天皇
大帝星謂五緯辰謂日月所會十二次司中司命文昌
第五第四星或曰中能上也祀五帝亦用實柴之禮
云疏曰此祀天神之三禮以尊卑先後為次謂歌神
始也又曰案尚書洛誥予以秬鬯二卣明禋注云禋芬
芳之祭又案國語云精意以享謂之禋義並與煙得相
叶也但宗廟用煙則郊特牲云臭陽達于牆屋是也天
神用煙則此文是也鄭於禋祀之下正取義於煙故言
禋之言煙也云周人尚臭煙氣之臭聞者此禮記郊特
牲之文也彼云殷人尚聲周人尚臭尚臭者取煙氣之
臭聞於天引之者證煙義也云禋積也詩云芄芃棫樸
薪之禋之者此大雅棫樸之篇引之證禋得為積也云
三祀皆積柴實牲體焉或有玉帛燔燎而升煙者此司
中司命等言禋燎亦用煙也於日月言實牲至昊天上
帝言禋祀則三祀互相備矣但先積柴次實牲後取煙

事列於卑祀義全於昊天作文之意也但云或有玉帛則有不用玉帛者肆師職云立大祀用玉帛牲牷立次祀用牲幣立小祀用牲彼雖摠據天地宗廟諸神今以天神言之則二大小次祀皆有也以肆師言之裡祀中有玉帛牲牷三事實柴中則無玉唯有牲幣燠燎中但止有牲故鄭云實牲體焉據三祀皆有玉帛惟昊天具之實柴則有帛無玉是玉帛於三祀之內或有或無故鄭云或耳云燠燎而升煙所以報陽也者案郊特牲云升首於室以報陽彼論宗廟之祭以首報陽今天神是陽煙氣上聞亦是以陽報陽故取特牲為義也鄭司農云昊天也者案孝經云郊祀后稷以配天典瑞亦云四圭有邸以祀天故云昊天也云上帝玄天也者案廣雅云乾望天易文言云夫玄黃者天地之雜也天玄而地黃以天色玄故謂玄名天先鄭蓋依此而讀之則二者異名而同實也若然則先鄭與王肅之等同一天而已似無六天之義故以天解昊天上帝為一也云是

天上帝樂以雲門者先鄭既無六天太司樂分樂而序之及六變俱有雲門不知定取何者以祀天云實柴實牛柴上也者案肆師職此三者皆實牲先鄭直據實柴為實牛者偏據一邊而言耳其實皆牛也云故書實柴或為賓柴者賓柴無義後鄭雖不破當還從實柴也先鄭云司中三能三階也者案武陵太守星傳云三台一名天柱上台司命為大尉中台司中為司徒下台司祿為司空云司命文昌宮星者亦據星傳云文昌宮第四曰司命第五曰司中二丈俱有司中司命故兩載之云風師箕也者春秋緯云月離於箕風揚沙故知風師箕也云雨師畢也者詩云月離於畢俾滂沱矣是雨師畢也若左氏傳云天有六氣降生五味五味即五行之味也是陰陽風雨晦明六氣下生金木水火土之五行鄭義大陽不變陰為金雨為木風為土明為火晦為水若從妻所好言之則洪範云星有好風星有好雨鄭注云箕星好風畢星好雨是土十為木八妻木八為金九妻

故東方箕星好風西方畢星好雨以此推之則北宮好
燠南宮好暘中央四季好寒也皆是所尅為妻是從妻
所好之義也玄謂昊天上帝冬至於圜丘所配天皇大
帝者案大司樂下文凡樂圜鍾為宮云云冬日至於地
上之圜丘奏之若樂六變則天神皆降是也引之以破
先鄭昊天上帝與五天為一之義云星謂五緯者五緯
即五星東方歲星南方熒惑西方太白北方辰星中央
鎮星言緯者二十八宿隨天左轉為經五星右旋為緯
案元命包云文王之時五星以聚房也星備云五星初
起牽牛此云星明是五緯又案星備云歲星一日行十
二分度之一十二歲而周天熒惑日行三十三分度之
一三十三歲而周天鎮星日行二十八分度之一二十
八歲而周天太白日行八分度之一八歲而周天辰星
日行一度一歲而周天是五緯所行度數之事且諸文
皆星辰合解之故尚書堯典云曆象日月星辰洪範五
紀亦云星辰鄭皆星辰合釋者餘文於義不得分為二

故合釋此文皆上下不見祭五星之文故分星為五緯
與辰別解若然辰雖據日月會時而言辰即二十八星
也案昭七年左氏傳晉侯問伯瑕曰何謂六物對曰歲
時日月星辰是謂也公曰多語寡人辰而莫同何謂辰
對曰日月之會是謂辰故以配日是其事但二十八星
內有七不當日月之會直謂之星若日月所會則謂之
宿謂之辰謂之次亦謂之房故尚書胤征云辰弗集于
房孔注云房日月所會是也云司中司命文昌第五第
四星者此破先鄭也何則先鄭以為司中是三台司命
是文昌星今案三台與文昌皆有司中司命何得分之
故後鄭云文昌第五第四星必先言第五後言第四者
案文昌第四云司命第五云司中此經先云司中後云
司命後鄭破先說司中故先引第五證司中後引第四
證司命故文倒也案武陵太守星傳云文昌官六星第
一曰上將第二曰次將第三曰貴相第四曰司命第五
曰司中第六曰司祿是其本次也云或曰中能者亦據

武陵太守星傳而言云三台一名天柱上台司命為太尉中台司中為司徒下台司祿為司空引此破先鄭也云祀五帝亦用實柴之禮云者案禮記祭義云大報天而主日配以月祭天以日為主故知五帝與日月同用實柴也若然五帝與昊天其服同大裘其牲同薦栗於燔柴退與日月等者禮有損之而益亦如社稷服絺冕及其血祭即在五穀之上亦斯類也案春秋緯運斗樞云大微宮有五帝坐星即春秋緯文耀鉤云春起青受制其名靈威仰夏起赤受制其名赤熛怒秋起白受制其名白招拒冬起黑受制其名汁光紀季夏六月火受制其名含樞紐又元命包云大微為天庭五帝以合時此等是五帝之號也又案元命包云紫微宮為天帝又云天生大列為中宮大極星其一明者太一常居傍兩星巨辰子位故為北辰以起節度亦為紫微宮紫之言中此宮之中天神圖法陰陽開閉皆在此中又文耀鉤云中宮大帝其北極星下一明者為太一之先合元氣

以斗布常是天皇大帝之號也又案爾雅云北極謂之北辰鄭注云天皇北辰耀魄寶又云昊天上帝又名大一帝君以其尊大故有數名也其紫微宮中皇天上帝亦名昊天上帝得連上帝而言至於單名皇天單名上帝亦得故尚書君奭云公曰君奭我聞在昔成湯既受命時則有若伊尹格于皇天鄭注云皇天北極大帝又掌次云張甄案設皇邸以旅上帝上帝即大帝堯典云欽若昊天皆是大帝單名之事月令更無祭五帝之文故季夏云以供皇天上帝鄭分之皇天北辰耀魄寶上帝大微五帝亦是大帝單號之事若然大帝得單稱與五帝同五帝不得兼稱皇天昊天也異義天號等六今尚書歐陽說曰春曰昊天夏曰蒼天秋曰昊天冬曰上天總為皇天爾雅亦然故尚書說云天有五號各用所宜稱之尊而君之則曰皇天元氣廣大則稱昊天仁覆愍下則稱昊天自上監下則稱上天據遠視之蒼蒼然則稱蒼天謹案尚書克命義和欽若昊天總勅四時知

昊天不獨春秋左氏曰夏四月己丑孔子卒稱昊天不弔時非秋天玄之聞也爾雅者孔子門人作以釋六藝之文言蓋不誤矣春氣博施故以廣大言之夏氣高明故以遠言之秋氣或殺或生故以昊天言之冬氣閉藏而清察以監下言之昊天者其尊大號六藝之中諸稱天者以已情所求言之非必主順於時解浩浩昊天求之博施蒼天求之高明昊天不弔則求天殺生當得其宜上天同雲求之所為常順於時此之求猶人之說事各從主耳若察于是所論天從四時各有所別故尚書所云者論其義也二者相須乃足此名非必紫微宮之正直是人逐四時互稱之鄭云呈天者其尊大之號不逐四時為名似本正稱此經星辰與司中司命風師雨師鄭君以為六宗案尚書堯典禋于六宗但以六宗之義有其數無其名故先儒各以意說詳見立君建國條所引禮于六宗注疏鄭君則以此星也辰也司中也司命也風師也雨師也六者為六宗案異義今歐陽夏

侯說六宗者上不及天下不及地傍不及四時居中夾
恍惚無有神助陰陽變化有益于人故郊祭之古尚書
說六宗天地神之尊者謂天宗三地宗三天宗日月星
辰地宗岱山河海日月屬陰陽宗北辰為星宗岱為山
宗河為水宗海為澤宗祀天則天文從祀祀地則地理
從祀謹案夏侯陽說云宗實一而有六名實不相應
春秋魯郊祭三望言郊天日月星河海山凡六宗魯下
天子不祭日月星但祭其分野星其中山川故言三望
六宗與古尚書說同玄之聞也書曰肆類于上帝禋于
六宗望于山川徧于羣神此四物之類也禋也望也徧
也所祭之神各異六宗言禋山川言望則六宗無山川
明矣周禮大宗伯曰以禋祀祀昊天上帝以實柴祀日
月星辰以樛燎祀司中司命風師雨師凡此所祭皆天
神也禮記郊特牲曰郊之祭也迎長日之至也大報天
而主日也兆於南郊就陽位也埽地而祭於其質也祭
義曰郊之祭也大報天而主日配以月則郊祭并祭日

月可知其餘星也辰也司中司命風師雨師此之謂六宗亦自明矣禮論王莽時劉歆孔昭以為易震巽等六子之卦為六宗漢武即位依虞書禋于六宗禮用大社至魏明帝時詔令王肅議六宗取家語宰我問六宗孔子曰所宗者六埋少牢於大昭祭時相近于坎壇祭寒暑王宮祭日夜明祭月幽蒙祭星雩蒙祭水旱孔安國注尚書與此同張融註從鄭君於義為允案月令孟冬云祈來年于天宗鄭云天宗日月星辰若然星辰入天宗又入六宗其日月入天宗即不入六宗之數也以以其祭天主日配以月日月既尊如是故不得入宗也以血祭祭社稷五祀五嶽以貍沈祭山林川澤以鴈辜祭

四方百物

不言祭地此皆地祇祭地可知也陰祀自血起貴氣與也社稷土穀之神有德者配食焉

共工氏之子曰句龍食於社有厲山氏之子曰柱食於稷湯遷之而祀棄故書祀作禋醢為罷鄭司農云禋當

為祀書亦或作祀五祀五色之帝於王者宮中曰五祀
罷辜披磔牲以祭若今時磔狗祭以止風玄謂此五祀
者五官之神在四郊四時迎五行之氣於四郊而祭五
德之帝亦食此神焉少昊氏之子曰重為句芒食於木
該為蓐收食於金脩及熙為玄冥食於水顓頊氏之子
曰犁為祝融后土食於火土五嶽東曰岱宗南曰衡山
西曰華山北曰恒山中曰嵩高山不見四竇者四竇五
嶽之匹或省文祭山林曰埋川澤曰沈順其性之含藏
鬴醢牲胄也鬴而磔之謂磔攘及蜡祭郊特牲曰八蜡
以記四方四年不順成八蜡不通以謹民財也又曰
蜡之祭也主先嗇而祭司嗇也祭百種以報嗇也饗農
及郵表畷禽獸仁之至義之盡也疏曰此一經言祭
地示三等之禮尊卑之次亦是敬神始也云以血祭祭
社稷五祀五嶽者此皆地之次祀先薦血以敬神已下二
祀不復用血也又曰云不言祭地此皆地祇祭地可知
也者此經對上經祭天天則大次小三者具此經雖見

三祀唯有次小祀而已以其方澤與昊天相對此經方澤不見者此血祭下仍有狸沈與醢辜二祀三祀具得與上天神三者相對故闕大地也且社稷亦土神故舉社以表地示鼓人職亦云靈鼓鼓社祭亦舉社以表地此其類也若大地方澤常用瘞埋與昊天煙相對故鄭云不言祭地此皆地祇祭地可知也云陰祀自血起者對天為陽祀自煙起貴氣臭同也云社稷土穀之神者案孝經緯援神契社者五土之總神稷者原隰之神五穀稷為長五穀不可偏敬故立稷以表名郊特牲亦云社者神地之道社者土之神稷者穀之神故云土穀之神也云有德者配食焉云云至而祀棄案左氏昭公二十九年傳云共工氏之子曰句龍為后土后土為社則是死乃配社食之云有厲山氏之子曰柱食於稷湯遷之而祀棄者案左傳云有烈山氏之子曰柱為稷祭法云厲山氏之有天下也其子曰農能殖百穀夏之衰也周棄繼之故祀以為稷若然稷祀棄實在湯時云夏之

衰者遷柱由旱欲見旱從夏起故據夏而言也是以書序云湯既勝夏欲遷其社不可作夏社注云犧牲既成築盛既潔祭以其時而旱暵水溢則變置社稷常湯伐桀之時旱致災明法以薦而猶旱至七年故湯遷柱而以周棄代之欲遷句龍以無可繼之者於是故止其旱在夏之時驗也先鄭云五祀五色之帝於王者宮中曰五祀者先鄭意此五祀即掌次云祀五帝一也故云五色之帝後鄭不從者案司服云祀昊天與五帝皆用大裘當在圓丘與四郊上今退在社稷之下於王者宮中失之遠矣且五帝天神當在上經陽祀之中退在陰祀之內一何陋也云罷辜披磔牲以祭者此先鄭從古書罷於義未可故後鄭不從罷從經齏為正其云披磔牲以祭仍從之矣云若今時磔狗祭以止鼠者此舉漢法以況齏辜為磔之義必磔狗止鼠者狗屬西方金金制東方木之風故用狗止風也玄謂此五祀者五官之神在四郊者生時為五官死乃為神配五帝在四郊知在

四郊者鄭即引月令四時四立之日迎氣在四郊并季夏迎土氣是五迎氣故鄭云四時迎五行之氣於四郊也云而祭五德之帝亦食此神焉者但迎氣迎五方天帝雖不言祭人帝案月令四時皆陳五德之帝大皞炎帝黃帝少皞顓頊等五德之帝并五人神於上明知五人神為十二月聽朔及四時迎氣而陳故鄭此注及下青圭赤璋之下注皆云迎氣時並祭五人帝五人神也云少昊氏之子曰重已下案昭二十九年魏獻子問蔡墨曰社稷五祀誰氏之五官對曰少皞氏有四叔曰重曰該曰脩曰熙實能金木及水使重為句芒該為蓐收脩及熙為玄冥世不失職遂濟窮桑此其三祀也顓頊氏有子曰犂為祝融共工氏有子曰句龍為后土此其二祀也后土為社稷為田正有烈山氏之子曰柱為稷趙商問春秋昭二十九年左傳曰顓頊氏之子犂為祝融共工氏有子曰句龍為后土其二祀五官之神及四郊合為犂食后土祭法曰共工氏霸九州也其子曰后

土能平九州故祀以為社社即句龍答曰犂為祝融句龍為后土左氏下言后土為社謂耆作后土無有代者故先師之說犂蕪之因火土俱位南方此注云犂為祝融后土食於火土亦惟見先師之說也云五嶽東曰岱宗南曰衡山西曰華山北曰恒山中曰嵩高山者此五嶽所在據東都地中為說案大司樂云四鎮五嶽崩注云華在豫州嶽在雍州彼據鎬京為說彼必據鎬京者彼據災異若據洛邑則華與嵩高並在豫州其雍州不見有災異之事故注有異也案爾雅江河淮濟為四瀆為定五嶽不定者周國在雍州時無西嶽故權立吳嶽為西嶽非常法爾雅不載以東都為定故爾雅載之也若然此南嶽衡案爾雅霍山為南嶽者霍山即衡山也故地理志揚州霍山為南嶽者山今在廬江彼霍山與冀州霍山在嵩華者別云不見四瀆者四瀆五嶽之匹或省文者五嶽四瀆相對若天地故設經省文惟見五嶽也若然下云鯉沈祭山林川澤五嶽敬神雖與社稷

同用血五藏四瀆山川之類亦當貍沈也爾雅云祭山曰廋縣或異代法耳若然廋縣既非周法而校人云凡將事于四海山川則飾黃駒注云王巡守過大山川則有殺駒以祈沈禮與玉人云天子以巡守宗祝以前馬注云其祈沈以馬宗祝亦執爵以先之彼亦言祈沈者祈沈雖非周法引以況義無嫌也云祭山林曰貍川澤曰沈順其性之含藏者經貍沈祭山林川澤總言不析別而說故鄭分之以其山林無水故貍之川澤有水故沈之是其順性之含藏也云醢醢牲胾胾也者無正父蓋據當時醢醢牲體者皆從胾胾解析之故以胾言之云謂醢禴及蜡祭者案禮記月令云九門醢禴又十二月大雩時亦醢禴是醢牲禴去惡氣之禮也云及蜡祭者案彼云蜡也者索也歲十二月合聚萬物而索享之謂天子于周之十二月建亥之月於郊而為蜡法此所引郊特牲曰八蜡已下彼據諸侯行蜡法彼云八蜡以記四方不作祀作記者誤云八蜡以記四方者謂八蜡之

禮以記四方諸侯知順成不順成若年不順成則八蜡不通以謹民財也若四方諸侯年穀有不順四時成熟者其八蜡不得與四方成熟之處通祭八蜡也云以謹民財者八蜡既不通明民不得行黨正飲酒奢侈之事故云以謹民謹民謂謹節民之用財之法也又曰蜡之祭也主先嗇而祭司嗇者彼注云先嗇若神農者司嗇后稷是也云祭百種以報嗇也者謂合聚萬物而索享之以報收嗇之功故云祭百種以報嗇也云享農及郵表畷者彼注云農謂田畷典田大夫郵表畷畷止也謂田畷督約百姓於井間之處也是郵行往來立表畷止於其下是止息之處有神亦祭之云禽獸仁之至義之盡也者八蜡索彼祭有先嗇一也司嗇二也農三也郵表畷四也猫虎五也坊六也水庸七也昆蟲八也蜡之中有猫虎是禽獸也云仁之至者據饗先嗇司嗇及農是仁恩之至義之盡者據饗猫虎坊與水庸郵表畷之等是義之盡引之者證祭亦礫牲之事也以肆

獻裸享先王以饋食享先王以祠春享先王以禴夏享

先王以嘗秋享先王以烝冬享先王

宗廟之祭有此六享肆獻裸饋食在

四時之上則是禘也禘也肆者進所解牲體謂薦孰時也獻獻醴謂薦血腥也裸之言灌灌以鬱鬯謂始獻尸以求神時也郊特牲曰魂氣歸于天形魄歸于地故祭所以求諸陰陽之義也殷人先求諸陽周人先求諸陰灌是也祭必先灌乃後薦腥薦孰於禘逆言之者與下共文明六享俱然禘言肆獻裸禘言饋食者著有黍稷互相備也魯禮三年喪畢而禘於太祖明年春禘於羣廟自爾以後五年而再殷祭一禘一禘疏曰此一經陳享宗廟之六禮也此經若細而言之即有六禮總而言之則亦有三等之差肆獻裸是禘之大祭以饋食是禘之次祭以春享以下是時祭之小祭若以總用袞冕大牢言之此亦皆為大祭也故酒正注云大祭者王服大

裘袞冕所祭是也此六者皆言享者對天言祀地言祭故宗廟言享享獻也謂獻饌具於鬼神也又曰云宗廟之祭有此六享者此則吉禮十二之中處其六也云肆獻裸饋食在四時之上則是禘也禘也者但周法有三年一禘則文二年大事于太廟公羊傳云大事者何大禘也大禘者何合祭也毀廟之主陳于大祖未毀廟之主皆升合食于大祖列昭穆序父子是禘之義也若殷則禘於三時周則秋禘而已又有五年一禘禘則各於其廟爾雅云禘大祭者禘是總名祭法祭天圓丘亦曰禘大傳云王者禘其祖之所自出謂夏正郊天亦曰禘夏殷四時之祭夏祭亦曰禘但於周宗廟之祭則有五年禘禘雖小於禘大於四時亦是大祭之名也云肆者進所解牲體謂薦孰時也者薦孰當朝踐後燔祭時故禮運云腥其俎孰其敝鄭云孰其敝謂體解而爛之是其饋獻獻以盞齊之節故云薦孰時但體解之時必肆解以為二十一體故云肆也云獻獻體謂薦血腥也者

此是朝踐節當二灌後王出迎牲祝延尸出戶坐於堂上南面迎牲入厭解而腥之薦於神坐以玉爵酌醴齊以獻尸后亦以玉爵酌醴齊以獻尸故云謂薦腥也云裸之言灌者經云裸者是古之裸字取神示之義故從示鄭轉從灌者以鬱鬯灌地降神取澆灌之義故從水言灌以鬱鬯謂始獻尸求神時也者凡宗廟之祭迎尸入戶坐於主北先灌謂王以圭瓚酌鬱鬯以獻尸尸得之滙地祭訖啐之奠之不飲尸為神象灌地所以求神故云始獻尸求神時也言始獻對後朝踐饋獻醕尸等為終故此稱始也郊持牲曰魂氣歸于天形魄歸于地故祭所以求諸陰陽之義也者人之獻吸出入之氣為魂耳目聰明為魄人死魂氣歸于天為陽形魄歸于地為陰祭時作樂為陽是求諸陽灌地為陰是求諸陰故云求諸陰陽之義也云殷人先求諸陽周人先求諸陰者此二代自相對殷人先求諸陽謂未灌先合樂周人先求諸陰謂未合樂先灌故云求諸陰灌是也引之者

敬見周人祭先灌之意云祭必先灌乃後薦腥薦孰於
祫逆言之者與下共文明六事俱然者如向所說先灌
訖王始迎牲設腥其俎腥其俎訖乃爛爛祭訖迎尸
入室乃有黍稷是其順也今此經先言肆肆是饋獻節
次言獻是朝踐節後言灌灌是最在先之事是於祫逆
言之也言與下共文明六事俱然者既從下向上為文
即是於下五享與上祫祭皆有灌獻肆三事矣故云六
享俱然云祫言肆獻灌禘言饋食者著有黍稷互相備
也者祫言肆獻灌明禘亦有之禘言饋食食是黍稷則
祫亦有黍稷矣著明也明有黍稷互相備矣云魯禮三
年喪畢而祫於大祖者此以周衰禮廢無文可明春秋
左氏傳云周禮盡在魯即以春秋為魯禮今言魯禮者
指春秋而言也春秋三年喪畢而祫於大祖謂若文公
二年秋八月大事於太廟也僖公以僖三十三年薨至
文二年秋八月於禮雖少四月猶是三年喪畢而為祫
祭也是魯禮三年喪畢而祫於大祖大祖謂周公廟周

公廟中而為禘祭也云明年春禘於羣廟者此明年春禘雖無正文約傳公宣公得知矣案傳公八年及宣公八年皆有禘文則知傳公宣公三年春有禘可知何者以文公二年禘則知傳公宣公二年亦有禘傳公宣公二年既為禘則明年是三年春禘四年五年六年秋禘是三年禘更加七年八年添前為五年禘故傳公宣公八年皆有禘是明年春禘明矣故云明年春禘於羣廟也云自爾以後五年而再殷祭者公羊傳云殷大也除明年春從四年已後四年五年六年七年八年八年之中四年五年六年為三年禘七年八年添前為五年禘是五年再殷祭也云一禘一禘者是禮識文謂五年之中為一禘一禘也鄭言此者欲見肆獻裸及饋食三者為禘禘從三年喪畢後為始之意也從禋祀已下至此吉禮十二皆敬神始何者案大司樂分樂而序之云乃奏黃鍾歌大呂舞雲門以祀天神已下下復云圓鍾為宮若樂六變天神皆降若樂八變地示皆出若樂九變

人鬼可得而禮鄭云天神則主北辰地示則主崑崙人鬼則主后稷先奏是樂以致其神禮之以玉而裸焉彼先奏是樂以致其神則天神地示人鬼皆以樂為下神始也彼鄭云禮之以玉據天地而裸焉據宗廟則此上下天神言煙地示言血此宗廟亦享言裸是則天地宗廟皆樂為下神始煙血與裸為歆神始也又案禮器與郊特牲皆言郊血大享腥三獻燭一獻孰者是薦饌始也以其郊是祭天而言用血大享是祫祭先王而言用腥三獻是社稷而言用燭一獻是祭羣小祀而言用孰與此是其先彼是其後後為薦饌可知故郊言血大享言腥三獻言燭一獻言孰也春官

以上經注字音見天神等篇後皆放此

天子祭天地

祭四方祭山川祭五祀歲徧諸侯方祀祭山川祭五祀

歲徧大夫祭五祀歲徧士祭其先

祭四方謂祭五官之神於四郊也句芒在

東祝融后土在南蓐收在西玄冥在北詩云來方禋祀
方祀者各祭其方之官而已五祀戶竈中霤門行也此
蓋殷時制也祭法曰天子立七祀諸侯立五祀大夫立
三祀士立二祀謂周制也疏曰天子祭天地者天地
有覆載大功天子主有四海故得總祭天地以報其功
天神有六祭之一歲有九昊天上帝冬至祭之一也蒼
帝靈威仰立春之日祭之於東郊二也赤帝赤熛怒立
夏之日祭之於南郊三也黃帝含樞紐季夏六月土王
之日亦祭之於南郊四也白帝白招拒立秋之日祭之
於西郊五也黑帝汁光紀立冬之日祭之於北郊六也
王者各稟五帝之精氣而王天下於夏正之月祭於南
郊七也四月龍星見而雩總祭五帝於南郊八也季秋
大饗五帝於明堂九也地神有二歲有二祭夏至之日
祭崑崙之神於方澤一也夏正之月祭神州地祇於北
郊二也或云建中之月祭之與郊天相對冬至祭昊天
上帝者春秋緯云紫微為天帝北極耀魄寶是也其配

之人以帝嚳配之故祭法云周人禘嚳是也其五帝則
春秋緯文耀鉤云蒼帝曰靈威仰赤帝曰赤熛怒黃帝
曰含樞紐白帝曰白招拒黑帝曰汁光紀此經直言祭
四方知非祭五天帝於四方者以上云祭天地則五帝
在其中矣故知非天帝也案宗伯云驅辜祭四方百物
知此方祀非四方百物者以此文在山川五祀之上與
大宗伯血祭社稷五祀五嶽五祀在五嶽之上此四方
亦在山川之上故知是五官之神云祝融后土在南方
鄭意以為黎蕪為后土土位在南方故知祝融后土在
南引詩云來方禋祀者是小雅大田之詩以刺幽王之
無道追論成王之時太平時和年豐至秋報祭招來四
方之神禋絜祭祀引之者證四方之義也云五祀戶竈
中霤門行者此月令文大宗伯五祀以為五官者以其
在五嶽之上此五祀在山川之下又與大夫同祭故知
是戶竈等云此蓋殷時制也者以天子諸侯大夫同云
祭五祀既無等差故疑殷時制也案王制云大夫祭五

祀文與此同而鄭云五祀謂司命也中雷也門也行也
厲也與此不同者王制之文上云天子祭天地諸侯祭
社稷大夫祭五祀既有尊卑等級疑是周禮故引祭法
五祀以解之與此不同是有地大夫祭五祀無地大夫
祭三祀
曲禮 天子祭天地諸侯祭社稷大夫祭五祀
謂司

命也中雷也門也行也厲也此祭
謂大夫有地者其無地祭三耳 天子祭天下名山大

川五嶽視三公四瀆視諸侯
視視其牲 諸侯祭名山大

川之在其地者
魯人祭泰山晉人祭河是也 燔柴於

泰壇祭天也瘞埋於泰折祭地也用騂犢
壇折封土為祭處也壇之

言坦也坦明貌也折照暫也必為炤明之名尊神也地
陰祀用黝牲與天俱用犢連言爾 疏曰禮記云至敬

儀禮禮通考續

不壇此云燔柴於泰壇者謂燔柴在壇設饌在地義亦具禮器及郊特牲疏也云地陰祀用黜牲與天俱用犢連言爾者衆牧人云陰祀用黜牲毛之鄭康成注云陰祀祭地北郊及社稷也又郊特牲云郊之用犢貴誠也彼文雖主南郊其北郊與天相對故知俱用犢也

理少牢於泰昭祭時也相近

於坎壇祭寒暑也王宮祭日也夜明祭月也幽宗祭星也雩宗祭水旱也四坎壇祭四方也山林川谷丘陵能出雲為風雨見怪物皆曰神有天下者祭百神諸侯在

其地則祭之亡其地則不祭

昭明也亦謂壇也時四時也亦謂陰陽之神也埋之

者陰陽出入於地中也凡此以下皆祭用少牢相近當為禋祈聲之誤也禋猶卻也祈求也寒暑不時則或禋

之或祈之寒於坎暑於壇王宮日壇王君也日稱君宮
壇營域也夜明亦謂月壇也宗皆當為崇宇之誤也幽
榮亦謂星壇也星以昏始見榮之言營也雩榮亦謂水
旱壇也雩之言吁嗟也春秋傳曰日月星辰之神則雪
霜風雨之不時於是乎榮之山川之神則水旱厲疫之
不時於是乎榮之四方即謂山林川谷丘陵之神也祭
山林丘陵於壇川谷於坎每方各為坎為壇怪物雲氣
非常見者也有天下謂天子也百者假成數也疏曰
埋少牢於秦昭祭時也者謂祭四時陰陽之神也秦昭
壇名也昭亦取明也春夏為陽秋冬為陰若祈陰則埋
牲祈陽則不應埋之今總云埋者以陰陽之氣俱出入
於地中而生萬物故並埋之以享陰陽為義也用少牢
者降於天地也自此以下及日月至山林並少牢也先
儒並云不薦孰唯殺牝埋之也相近於坎壇祭寒暑也
者相近常為攘祈攘卻也寒暑之氣應退而不退則祭
攘卻之令退也祈求也寒暑之氣應至而不至則祭求

欽定四庫全書

卷二十一

之令至也寒則於坎寒陰也暑則於壇暑陽也王宮祭日也者王君也宮亦壇也營城如宮也日神尊故其壇曰君宮也夜明祭月也者夜明者祭月壇名也月明於夜故謂其壇為夜明也幽宗祭星也者祭星壇名也幽闇也宗當為禁禁壇域也星至夜而出故曰幽也為營域而祭之故曰幽禁也雩宗祭水旱也者亦壇名也雩吁嗟也水旱為人所吁嗟禁亦營域也為營域而祭之故曰雩禁也四坎壇祭四方也者謂山林川谷丘陵之神有益於人民者也四方各為一坎一壇壇以祭山林丘陵坎以祭川谷泉澤故言坎壇祭四方也山林川谷丘陵能出雲為風雨見怪物皆曰神者此明四坎壇所祭之神也怪物慶雲之屬也風雨雲露並益於人故皆曰神而得祭也有天下者祭百神者有天下謂天子也祭百神者即謂山林川谷在天下而益民者也天子祭天地四方言百神舉全數也諸侯在其地則祭之者諸侯不得祭天地若山林川澤在其封內而益民者則得

祭之如魯之泰山晉之河楚之江漢是也亡其地則不祭者亡無也謂其境內地無此山川之等則不得祭也

法

大凡生於天地之間者皆曰命其萬物死皆曰

折人死曰鬼此五代之所不變也

生時形體異可同名至死腐為野土異其

名雖同也折棄敗之言也鬼之言歸也五代為黃帝堯舜禹湯周之禮樂所存法也疏曰大凡生於天地之

間者皆曰命者總包萬物故曰大凡皆受天之賦命而生故云皆曰命也其萬物死皆曰折人死曰鬼者萬物無知死者皆曰折人為有識故死曰鬼此五代之所不變也者言此之名號從黃帝正名百物以來至堯舜禹湯及周所不變更也同上

有虞氏禘黃帝而郊嚳祖顓頊而宗

堯夏后氏亦禘黃帝而郊鯀祖顓頊而宗禹殷人禘嚳

而郊冥祖契而宗湯周人禘嘗而郊稷祖文王而宗武

王

禘郊祖宗謂祭祀以配食也此禘謂祭昊天於圜丘也祭上帝於南郊曰郊祭五帝五神於明堂曰祖宗

祖宗通言爾下有禘郊祖宗孝經曰宗祀文王於明堂以配上帝明堂月令春曰其帝太昊其神句芒夏曰其帝炎帝其神祝融中央曰其帝黃帝其神后土秋曰其帝少昊其神蓐收冬曰其帝顓頊其神玄冥有虞氏以上尚德禘郊祖宗配用有德者而已自夏已下稍用其姓氏之先後之次有虞氏夏后氏宜郊顓頊殷人宜郊契郊祭一帝而明堂祭五帝小德配寡大德配衆亦禮之殺也疏曰此一經論有虞氏以下四代禘郊祖宗所配之人有虞氏禘黃帝者謂虞氏冬至祭昊天上帝於圜丘大禘之時以黃帝配祭而郊嘗者謂夏正建寅之月祭感生之帝於南郊以嚳配也祖顓頊而宗堯者謂祭五天帝五人帝及五人神於明堂以顓頊及堯配

之故云祖顓頊而宗堯祖始也言為道德之初始故云
祖也宗尊也以有德可尊故云宗其夏后氏以下禘郊
祖宗其義亦然但所配之人當代各別虞氏云有者以
虞字文單故以有字配之無義例也夏云后氏者后君
也受位於君故稱后殷周稱人以其人所歸往故稱人此
並熊氏之說也注云此禘謂祭昊天於圜丘也者但經
傳之文稱禘非一其義各殊論語云禘自既灌及春秋
禘于大廟謂宗廟之祭也喪服小記云王者禘其祖之
所自出也及大傳云禮不王不禘謂祭感生之帝於南
郊也以禘文既多故云此禘謂祭昊天上帝於圜丘必
知此是圜丘者以禘文在於郊祭之前郊前之祭唯圜
丘耳但爾雅釋天云禘大祭以此餘處為大祭總得稱
禘案聖證論以此禘黃帝是宗廟五年祭之名故小記
云王者禘其祖之所自出以其祖配之謂虞氏之祖出
自黃帝以祖顓頊配黃帝而祭故云以其祖配之依五
帝本紀黃帝為虞氏九世祖黃帝生昌意昌意生顓頊

虞氏七世祖以顓頊配黃帝而祭是禘其祖之所自出
以其祖配之也肅又以祖宗為祖有功宗有德其廟不
毀肅又以郊與圜丘是一郊即圜丘故肅難鄭云案易
帝出乎震震東方生萬物之初故王者制之初以木德
王天下非謂木精之所生五帝皆黃帝之子孫各改號
代變而以五行為次焉何大微之精所生乎又郊祭鄭
玄云祭感生之帝唯祭一帝耳郊特牲何得云郊之祭
大報天而主曰又天唯一而已何得有六又家語云季
康子問五帝孔子曰天有五五行木火金水及土四分時
化育以成萬物其神謂之五帝是五帝之佐也猶三公
輔王三公可得稱王輔不得稱天王五帝可得稱天佐
不得稱上天而鄭云以五帝為靈威仰之屬非也玄以
圜丘祭昊天最為首禮周人立后稷廟不立魯廟是周
人尊魯不若后稷及文武以魯配至重之天何輕重顓
倒之失所郊則圜丘圜丘則郊猶王
城之內與京師異名而同處同上

七代之所更立

者禘郊祖宗其餘不變也

七代通數顓頊及嚳也所不變者則數其所法而已變之

則通數所不法為記者之微意也少昊氏脩黃帝之法後王無所取焉同上

禮不王不禘

王者禘其祖之所自出以其祖配之

凡大祭曰禘自由也大祭其先祖所

由生謂郊祀天也王者之先祖皆感大微五帝之精以生蒼則靈威仰赤則赤熛怒黃則含樞紐白則白招拒黑則汁光紀皆用正歲之正月郊祭之蓋特尊焉孝經曰郊祀后稷以配天配靈威仰也宗祀文王於明堂以配上帝汎配五帝也諸侯及其大祖大祖受封君也大夫士有大事省於

其君干祫及其高祖

大事寇戎之事也省善也善於其君謂免於大難也干猶空也空祫

謂無廟祫祭之於壇墠大傳趙伯循曰禮記大傳云禮不王不禘王者禘其祖之所自出以其祖配之又

喪服小記曰王者禘其祖之所自出又下云禮不王不禘正與大傳同則諸侯不得禘禮明矣是以祭法云有虞氏禘黃帝舜祖顓頊顓頊出於黃帝則所為禘其祖之所自出也而郊魯祖顓頊而宗堯夏后氏亦禘黃帝義同舜也而郊魯祖顓頊而宗禹殷人禘魯殷祖契出自魯而郊冥祖契而宗湯周人禘魯義與殷同而郊稷祖文王而宗武王禘者帝王立始祖之廟猶謂未盡其追遠尊先之義故又推尋始祖所出之帝而追祀之以其祖配之者謂於始祖廟祭之而便以始祖配祭也此祭不兼羣廟之主為其疎遠不敢褻狎也鄭玄注祭法云禘為配祭昊天上帝於圜丘也蓋見祭法所說文在郊上謂為郊之最次者故為此說耳祭法所論禘郊祖宗者謂六廟之外永世不絕者有四種耳非闕配祭也禘之所及最遠故先言之爾何闕圜丘哉然則春秋書魯之禘何也曰成王尊寵周公故也祭統云成王追念周公賜之重祭郊社禘嘗是也魯之用禘蓋於周公廟

而上及文王即周公之所出故也

天子七廟三昭三穆與太祖之廟

而七

此周制七者太祖及文王武王之祢與親廟四大祖后稷殷則六廟契及湯與二昭二穆夏則五廟

無大祖禹與二昭二穆而已

諸侯五廟二昭二穆與太祖之廟而五

大祖始封之君王者之後不為始封之君廟

大夫三廟一昭一穆與太祖之

廟而三

大祖別子始爵者大傳曰別子為祖謂此雖非別子始爵者亦然

士一廟

謂諸侯之

中士下士名曰官師者上士二廟

庶人祭於寢

寢適寢也宗廟篇

王制

天

子植禘祫嘗祫烝

牲猶一也祫合也天子諸侯之喪畢合先君之主於祖廟而祭

之謂之祫後因以為常天子先祫而後時祭諸侯先時祭而後祫凡祫之歲春一禘而已不祫以物無成者不

一壇一墀曰考廟曰王考廟曰皇考廟皆月祭之顯考
廟祖考廟享嘗乃止去祖為壇去壇為墀壇墀有禱焉
祭之無禱乃止去墀為鬼大夫立三廟二壇曰考廟曰
王考廟曰皇考廟享嘗乃止顯考祖考無廟有禱焉為
壇祭之去壇為鬼適士二廟一壇曰考廟曰王考廟享
嘗乃止顯考無廟有禱焉為壇祭之去壇為鬼官師一
廟曰考廟王考無廟而祭之去王考為鬼庶士庶人無
廟死曰鬼

建國封諸侯也置都立邑為卿大夫之采地
及賜士有功者之地廟之言貌也宗廟者先

欽定四庫全書

儀禮經傳通疏

卷二十一

三

祖之尊貌也。桃之言超也。超上去意也。封土曰壇。除地曰墠。書曰：三壇同墠。王皇皆君也。顯明也。祖始也。名先人以君明始者，所以尊本之意也。天子遷廟之主以昭穆合藏於二桃之中。諸侯無桃藏於祖考之廟中。聘禮曰：不腆先君之祧，是謂始祖廟也。享嘗謂四時之祭。天子諸侯為壇墠所禱，謂後遷在祧者也。既事則反其主於祧。鬼亦在祧。顧遠之於無事禘，乃祭之。爾春秋文二年秋，大事于大廟，傳曰：毀廟之主陳于大祖，未毀廟之主皆升合食于大祖，是也。魯煬公者，伯禽之子也。至昭公，定公久已為鬼，而季氏禘之而立其宮，則鬼之主在祧明矣。唯天子諸侯有主禘禘，大夫有祖考者亦鬼其百世不禘，禘無主，爾其無祖考者庶士以下鬼其考王考。官師鬼其皇考，大夫適士鬼其顯考而已。大夫祖考謂別子也。凡鬼者薦而不祭。王制曰：大夫士有田則祭，無田則薦。適士，上士也。官師，中士下士庶士府史之屬。此適士云顯考無廟，非也。當為皇考字之誤。詳見宗

廟篇
祭法

父為士子為天子諸侯則祭以天子諸侯其

尸服以士服

祭以天子諸侯養以子道也尸服士服父本無爵子不敢以己爵加之嫌於卑之

父為天子諸侯子為士祭以士其尸服以士服

謂父以罪誅尸

服以士服不成為君也天子之子當封為王者後乃祀其受命之祖云為士則擇其宗之賢者若微子者不必封其子為王者後及所立為諸侯者祀其先君以禮卒者尸服天子諸侯之服如遂無所封立則尸也祭也皆如士不敢僭用尊者衣服
武王末受命周公成文武之德追

王大王王季上祀先公以天子之禮斯禮也達乎諸侯

大夫及士庶人父為大夫子為士葬以大夫祭以士父

為士子為大夫葬以士祭以大夫

束猶老也追王大王王季者以王迹起焉

先公組紃以王至后稷也斯禮達於諸侯大夫士庶人者謂葬之從死者之爵祭之用生者之祿也

詳見宗

廟篇中庸

王為羣姓立社曰大社王自為立社曰王社

諸侯為百姓立社曰國社諸侯自為立社曰侯社大夫

以下成羣立社曰置社

羣衆也大夫以下謂下至庶人也大夫不得特立社與民族居

百家以上則共立一社今時里社是也郊特牲曰唯為社事單出里

詳見地祇篇

祭法

王為

羣姓立七祀曰司命曰中雷曰國門曰國行曰泰厲曰

戶曰竈王自為立七祀諸侯為國立五祀曰司命曰中

雷曰國門曰國行曰公厲諸侯自為立五祀大夫立三

祀曰族厲曰門曰行適士立二祀曰門曰行庶士庶人

立一祀或立戶或立竈

此非大神所祈報大事者也小神居人之間司察小過作譴告

者爾樂記曰明則有禮樂幽則有鬼神鬼神謂此與司命主督察三命中雷主堂室居處門戶主出入行主道路行作厲主殺罰竈主飲食之事明堂月令春曰其祀戶祭先脾夏曰其祀竈祭先肺中央曰其祀中雷祭先心秋曰其祀門祭先肝冬曰其祀行祭先腎聘禮曰使者出釋幣於行歸釋幣於門士喪禮曰疾病禱於五祀司命與厲其時不著今時民家或春秋祠司命行神山神門戶竈在旁是必春祠司命秋祠厲也或者合而祠之山即厲也民惡言厲巫祝以厲山為之謬乎春秋傳曰鬼有所歸乃不為厲詳見百神篇同上

王下祭殤五適子適孫適曾孫適玄孫適來孫諸侯下

祭三大夫下祭二適士及庶人祭子而止

祭適殤者重適也祭適殤

於廟之典謂之陰厭王子公子祭其適殤於其黨之廟大夫以下庶子祭其適殤於宗子之家皆當室之白謂之陽厭凡庶殤不祭詳見宗廟篇 同上

夫聖王之制祭祀也法施於

民則祀之以死勤事則祀之以勞定國則祀之能禦大

菑則祀之能捍大患則祀之是故厲山氏之有天下也

其子曰農能殖百穀夏之衰也周弃繼之故祀以為稷

共工氏之霸九州也其子曰后土能平九州故祀以為

社帝嚳能序星辰以著衆堯能賞均刑法以義終舜勤衆事而野死鯀障鴻水而殛死禹能修鯀之功黃帝正名百物以明民共財顓頊能修之契為司徒而民成冥勤其官而水死湯以寬治民而除其虐文王以文治武王以武功去民之蓄此皆有功烈於民者也及夫日月星辰民所瞻仰也山林川谷丘陵民所取財用也非此族也不在祀典

春秋傳曰封為上公祀為大神厲山氏炎帝也起於厲山或曰有烈山氏堯后

稷名也共工氏無錫而王謂之霸在大昊炎帝之間著衆謂使民興事知休作之期也賞賞善謂禪舜封禹稷

等也能刑謂去凶凶義終謂既禪二十人戴乃死也野
死謂証有苗死於蒼梧也殛死謂不能成其功也明民
謂使之衣服有章也民成謂知五教之禮也冥契六世
之孫也其官玄冥水官也虐舊謂桀紂也烈業也族猶
類也祀典謂祭祀也疏曰此經總明其功有益於民
得在祀典之事從此至能捍大患則祀之與下諸神為
總也法施於民則祀之者若神農及后土帝嚳與堯及
黃帝顓頊與契之屬是也以死勤事則祀之者若舜及
蘇冥是也以勞定國則祀之者若禹是也能禦大菑及
能捍大患則祀之者若湯及文武也其子曰農能殖百
穀農謂厲山氏後世子孫名柱能殖百穀故國語云神
農之名柱作農官因名農是也夏之衰也周棄繼之者
以夏末湯遭大旱七年欲變置社稷故廢農祀棄故祀
以為稷者謂農及桑皆祀之以配稷之神其子曰后土
能平九州故祀以為社者是共工後世之子孫為后土
之官后君也為君而掌土能治九州五土之神故祀以

為配社之神帝嚳能序星辰以著衆者嚳能紀星辰序時候以明著使民休作有期不失時節故祀之也堯能賞均刑法以義終者堯以天下位授舜封禹稷官得其人是能賞均平也五刑有宅是能刑有法也禪舜而老二十八載乃殂是義終也舜能勤衆事而野死者舜征有苗仍巡守陟方而死蒼梧之野是勤衆事而野死鯀障洪水而殛死者鯀塞水無功而被堯殛死于羽山亦是有微功於人故得祀之若無微功焉能治水九載又世本云作城郭是有功也鄭答趙商云鯀非誅死鯀故居東裔至死不得反于朝禹乃其子也以有聖功故堯興之以為殺父父用其子而舜禹何以忍乎而尚書云鯀則殛死禹乃嗣興者箕子見武王誅紂今與已言懼其意有慙德為說父不肖則罪子賢則舉之以滿武王意也禹能脩鯀之功者謂禹能修父之功故祀之黃帝正名百物者上雖有百物而未有名黃帝為物作名正名其體也以明民者謂垂衣裳使貴賤分明得其所也

共財者謂山澤不障教民取百物以自贍也其如上事
哉得祀之額項能修之者謂能修黃帝之法契為司徒
而民成者契為堯之司徒司徒掌五教故民之五教得
成冥勤其官而水死者冥契六世孫其官玄冥水官也
湯以寬治民而除其虐謂放桀於南巢也文王以文治
武王以武功去民之蠻者謂伐紂也此皆有功烈於民
者也結上厲山以下也所得祀之人有功烈於人故也
及夫日月星辰民所瞻仰也者釋上文燔柴於泰壇瘞
埋於泰折王宮祭日夜明祭月幽榮祭星之等及上有
祭地祭天祭四時祭寒暑祭水旱此不言之者舉日月
則天地可知四時寒暑水旱則日月陰陽之氣故舉日
月以包之也非此族也不在祀典者合結上事也族類
也若非上自厲山以下及日月丘陵之等無益於民者
悉不得預於祭祀之典也案上陳宗廟及七祀并通適
場以下此經不覆明之者此經所云謂是外神有功於
民故具載之其宗廟與場以下及親屬七祀之等宮中

小神所以此經並
皆不載 同上

孔子曰嗚呼哀哉我觀周道幽厲傷之吾舍魯何

適矣

政亂禮失以
為魯尚愈

魯之郊禘非禮也周公其衰矣

非猶失也魯之郊牛口傷鼯鼠食其角又有四卜
郊不從是周公之道衰矣言子孫不能奉行興之
杞之郊也禹也宋之郊也契也是天子之事守也

先祖法度子
孫所常守

故天子祭天地諸侯祭社稷

疏曰嗚
呼哀哉

是傷數之辭言觀周家文武之道以經幽厲之亂
傷此禮儀法則無可觀瞻唯魯國稱可吾舍此魯
國更何之適而觀禮乎言魯國尚愈愈勝也言尚
勝於餘國故韓宣子適魯云周禮盡在魯矣杞郊

禹宋郊契蓋是夏殷天子之事祀宋是其子孫常所保守勿使有失案祭法云夏郊鯨殷郊冥今祀郊禹宋郊契者以縣冥之德薄故更郊禹契蓋時王所命也禮運

諸侯之宮縣

而祭以白牡擊玉磬朱干設錫冕而舞大武乘大

路諸侯之僭禮也

言此皆天子之禮也官縣四面縣也干盾也錫傳其背如龜也

武萬舞也白牡大路殷天子禮也

臺門而旅樹反坫繡黼丹朱中

衣大夫之僭禮也

言此皆諸侯之禮也旅道也屏謂之樹樹所以蔽行道管氏樹

塞門塞猶蔽也禮天子外屏諸侯內屏大夫以簾士以帷反坫反爵之坫也蓋在尊南兩君相見主君既獻於此反爵馬繡黼丹朱以為中衣領緣也繡讀為綃綃繒名也詩云素衣朱綃又云素衣朱綌

褻黼
領也

諸侯不敢祖天子大夫不敢祖諸侯而公廟

之設於私家非禮也由三桓始也

疏曰諸侯之宮
縣者諸侯唯合

軒縣今乃有宮縣又諸侯祭用時王牲今用白牡
又諸侯擊石磬今擊玉磬又諸侯得舞大武故詩
云方將萬舞宣八年萬入去禱是也但不得朱干
設錫冕服而舞今朱干設錫冕而舞大武諸侯合
乘時王之車今乃乘殷之大路並是諸侯僭禮也
經云諸侯不敢祖天子而文二年左傳云宋祖帝
乙鄭祖厲王大夫不敢祖諸侯而莊二十八年左
傳云凡邑有宗廟先君之主曰都與此文不同者
此據尋常諸侯大夫被據有
大功德者故異 鄭特姓

三家者以雍徹子

曰相維辟公天子穆穆奚取於三家之堂

三家魯
大夫孟


孫叔孫季孫之家也雍周頌篇名徹祭畢而收其俎也天子宗廟之祭則歌雍以徹是時三家僭而用之相助也辟公諸侯也穆穆深遠之意天子之容也此雍詩之詞孔子引之言三家之堂非有此事亦何取於此我而歌之乎譏其無知妄作以取僭竊之罪程子曰周公之功固大矣皆臣子之分所當為魯安得獨用天子禮樂哉成王之賜伯禽之受皆非也其因襲之弊遂使季氏僭八佾三家僭雍徹故仲尼譏之或問程子之說善矣或以為成王賜魯以王禮惟得以祀周公者未有考然以魯之郊祀觀之則初不為周公之廟而設也恐其說亦不得通矣論語八佾朱文公集註

季氏旅於泰山子謂冉有曰女弗能救與對曰

不能子曰嗚呼曾謂泰山不如林放乎

泰山名
祭名

在魯地禮諸侯祭封內山川季氏祭之僭也冉有
孔子弟子名求時為季氏宰救謂救其陷於僭竊
之罪嗚呼數辭言神不享非禮欲季氏知其無益
而自止又進林放以厲冉有也范氏曰冉有從
季氏夫子豈不知其不可告也然而聖人不輕絕
人盡已之心安知冉有之不能救季氏之不可諫
也既不能正則美林放以明泰山之
不可誣是亦教誨之道也同上



儀禮經傳通解續卷二十一

按：本冊原書於抗戰播遷中曾遭水漬，致字跡模糊不清，茲雖力經描修版面，仍無法全復舊觀。

欽定四庫全書

經部

儀禮經傳通解續卷二十二

詳校官尚書臣德保

給事中臣溫常綬覆勘

總校官進士臣繆珙

校對官中書臣吳俊

謄錄舉人戶周克鵬

欽定四庫全書

儀禮經傳通解續卷二十二

天神祭禮六

宋楊復撰

大宗伯掌建邦之天神人鬼地示之禮

示音祇下神示地示之例皆故

此本或作祇建亦也立天神地祇人鬼之禮者謂祀之祭之享之饋古禮是也疏曰云立天神地祇人鬼

之禮者謂祀之祭之享之饋先云人鬼後云地祇鄭則先云地祇後云人鬼者經先云鬼後見天在上地

在下人祇其間鄭後云人鬼者據下經陳吉體十二先地祇後人鬼據尊卑為次故也云禮吉禮是也者樂下

云以吉禮事邦國之鬼神示則此亦吉禮故云禮吉禮是也

以吉禮事邦國之鬼神

示

謂祀之祭之享之故書吉或為告杜子春云書為告禮者非是當為吉禮書亦多為吉禮吉禮之別十

有二疏曰此已下叙五禮先以吉禮為上云事邦國之鬼神示據諸侯邦國而言者也以其天子宗伯若還

據天子則不見邦國若以天子宗伯而見邦國則有天子可知故據邦國以包王國又曰云事謂祀之祭之享之者還據已下所陳先後為次若然經先云鬼與上下體例不同者欲見逢時則祭事起無常故先云人鬼也云

吉禮之別十有二者從此下經以禮祀血祭以禮祀祀二經天地各有三享人鬼有六故十二也以禮祀祀

昊天上帝

禮音因李音烟禮之言煙周人尚臭煙氣之是聞者以禮祀祀昊天上帝以實柴祀日

月星辰以絜燎祀司中司命飗師兩師三祀皆積柴實牲體焉或有玉帛燔燎而升煙所以報陽也鄭司農云

昊天也上帝也昊天上帝樂以雲門實柴實牛
柴上也故書實柴或為賓柴玄謂昊天上帝冬至於圜
丘所祀天皇大帝 撚羊九反燎良召反飢音風 疏
曰案尚書洛誥予以秬鬯二卣明禋注云禋芬芳之祭
又案國語云精意以享謂之禋義並與煙得相叶也但
宗廟用煙則郊特牲云是陽達于墻屋是也天神用煙
則此文是也鄭於禮記之下正取義於煙故言禮之言
煙也云周人尚臭煙氣之臭聞者此禮記郊特牲之文
也彼云殷人尚聲周人尚臭尚臭是者取煙氣之臭聞於
天引之者證煙義也云三祀皆積柴實牲體焉或有玉
帛者此司中司命等言撚燎亦用煙也於日月言實牲
至昊天上帝言禮祀則三祀互相備矣但先積柴次實
牲後取煙事列於卑祀義全於昊天矣作文之意也但
云或有玉帛則有不用玉帛者以肆飾職言之禮祀中
有玉帛牲豢三事實柴中則無玉唯牲幣撚燎中但
止有牲是玉帛於三祀之內或有或然故鄭云或耳云

燔燎而升煙所以報陽也者案郊特牲玉升首於室以報陽彼論宗廟之祭以首報陽今天神是陽煙氣上聞亦是陽報陽故取特牲為義也鄭司農云是天也者案孝經云郊祀后稷以配天典瑞亦云四圭有邸以祀天故云昊天也云上帝玄天也者案廣雅云乾玄天易文言云夫玄黃者天地之雜也天玄而地黃以天色玄故謂玄名天先鄭蓋依此而讀之則二者異名而同實也若然則先鄭與王肅之等同一天而已似無六天之義故以天解是天上帝為一也云是天上帝樂以雲門者先鄭既無六天大司樂分樂而序之及六變俱有雲門不知定取何者以祀天云實案實牛案上也者案肆師職此三者皆實牲先鄭直據實案為實牛者偏據一邊而言耳其實皆牛也云故書實案或為實案者實案無義後鄭雖不破當還從實案也玄謂是天上帝冬至於圜丘所祀天皇大帝者案大司樂下文凡樂圓鍾為宮云云冬日至於地上之圜丘奏之若樂六變則

天神皆降是也引之以破先鄭昊天上帝與五天為一之義素春秋緯運斗樞云大微宮有五帝坐星即春秋緯文耀鉤云春起青受制其名靈威仰夏起赤受制其名赤熛怒秋起白受制其名白招拒冬起黑受制其名汁光紀季夏六月黃受制其名含樞紐是五帝之號也又崇元命包云紫微宮為大帝又云天生大列為中宮大極星其一明者大一常居傍兩星距辰子位故為北辰以起節度亦為紫微宮紫之言中此宮之中天神圓法陰陽開閉皆在此中又文耀鉤云中宮大帝其北極星下一明者為大一之星合元氣以斗布常是天皇大帝之號也又案爾雅云北極謂之北辰鄭注云天皇北辰耀魄寶又云昊天上帝又名大一常居以其尊大故有數名也其紫微宮中皇天上帝亦名昊天上帝得連上帝而言至於單名皇天單名上帝亦得故尚書君奭云公曰君與我聞在昔成湯既受命時則有若伊尹格于皇天鄭注云皇天北極大帝又案次云張翥案設皇

邨以旅上帝上帝即大帝先典云欽若是天皆是大帝
單名之事月令更無祭五帝之文故季夏云以供皇天
上帝鄭分之皇天北辰耀魄寶上帝人微五帝亦是天
帝單號之事若然大帝得單稱與五帝同五帝不得兼
稱皇天昊天也詳見
祭法總要 春官

大祝凡大禋祀則執明水火而

號祝

六明水火司烜所共日月之氣以給烝享執之加以

疏曰知明水火司烜所共日月之氣者案司烜氏職
云以夫遂取明火於日以鑒取明水於月彼雖不云氣
此水火皆由日月之氣所照得之故以氣言之云以給
烝享執之加以六號祝明此主潔也者經云執明水火
而號祝明知六號皆執之明潔也號祝執明水火明主
人主潔之德云禮祀祭天神也者大宗伯昊天稱禋日
月稱實柴司中之芋稱樯燎通而言之三著
之禮皆有種義則知禮祀天神通星辰已下隋燬逆牲

逆尸令鐘鼓右亦如之

隋許規反又思圭反 隋饗謂薦血也凡血祭曰饗既隋饗後

言逆牲容逆鼎右讀亦當為有 疏曰鄭云隋饗謂薦血也者賁氏云饗饗宗廟馬氏云血以塗鐘鼓鄭不從

而以為薦血祭示者下文云既祭令徹則此上下皆是祭祀之事何得於中輒有饗廟塗鼓直稱饗何得兼言

隋故為祭示薦血解之鄭云凡血祭曰饗者此經文承上禮祀肆享祭祀之下即此血祭之中舍上三祀但天

地薦血於座前宗廟即血以告穀故言凡血祭曰饗云既隋饗後言逆牲容逆鼎者凡祭祀之法先逆牲後隋

饗今隋饗在前逆牲在後者以其鼎在門外薦血後乃有燭熟之事逆鼎而入故云容鼎知鼎在門外者案中

雷禮逆在廟門外之東主人迎鼎事云右讀為有者亦上九拜之下享右之字皆為有 來瞽令臯

舞 臯音噪九高反劉戶報反 臯讀為卒噪呼之 臯來 臯者皆為呼之入 卒子忽反呼火改度 疏曰臯

讀為卒嗥呼之嗥者依俗讀云來嗥者皆為呼之入者
經云聾人擬升堂歌舞謂學子舞人聾人言來亦呼之
乃入皋舞令呼亦來入故相尸禮相息亮反延其出
鄭云來嗥皆謂呼之入也入詔其坐作疏曰
凡言相尸者諸事皆相故以出入坐作解之尸出入者
謂祭初延之入室灌訖退出坐於堂上南面朝踐饋獻
訖又延之入室言詔其坐作者郊持牲云詔祝於室坐
尸于堂饋獻訖又入室坐言作者凡坐皆有作及與主
人荅拜皆有坐作之祝命徹祭器即詩云諸既祭令徹祝命徹祭器即詩云諸
宰居婦廢徹不春官司服掌王之吉服用事祭祀視朝各
有所用疏曰王吉服有九大裘已下是也又曰云用
事祭祀視朝甸凶弔之事者是其事各異云衣服各有
所用者謂若祀昊天王祀昊天上帝則服大裘而冕祀
用大裘之等是也

五帝亦如之

鄭司農云大裘羔裘也者司裘文先鄭注云大裘黑

羔裘然則凡祭天皆同羔裘義具於司裘也春官

司裘掌為大裘以共王祀

天之服

鄭司農云大裘黑羔裘服以祀天示質疏曰言為大裘者謂造作黑羔裘言大者以其祭

天地之服故以大言之非謂裘體侈大則義同於大射也云以共王祀天之服者謂四時所有祀天之事皆共

之不限六天之大小直言祀天衆孝經緯鉤命決云祭地之禮與天同牲玉皆不同言同者唯據衣服則知崑

崙神州亦用大裘可知又曰先鄭知大裘黑羔裘者祭服皆玄上纁下明此裘亦羔裘之黑者故知大裘黑羔

裘又云服以祀天示質者以其衾已下皆有采章為此大裘更無采章故云質衆鄭志大裘之上又有玄衣與

裘同色亦是無文采天官

大宗伯以玉作六器以禮天地四方

禮謂始告神時薦於神坐書曰間公植璧秉圭是也
疏曰言作六器者此據禮神則曰器上文人執則曰瑞
對此文義爾若通而言之禮神雖不得言瑞人執者亦
曰器故聘禮云圭璋璧琮凡四器者唯其所寶以聘可
也尚書亦以五瑞為五器卒乃復是其人執亦曰器也
云禮謂始告神時薦於神坐者此以玉禮神在作樂下
而裸焉是其以玉禮神與宗廟裸同節若然祭天當實
柴之節也書曰周公植璧秉圭是也者此金縢文彼以
周公請天代武王死之說為三壇同墀又為壇於南方
周公於前立焉告大王王季文王故植璧於三王以蒼
之坐手秉桓圭引之者證植璧於神坐之側是也
璧禮天此禮天以冬至謂天皇大帝在北極者也禮神
者必象其類璧圓象天疏曰此禮天以冬至
謂天皇大帝在北極者也者青圭已下有五天明此蒼
璧禮天者是冬至祭圜丘者案大司樂云以雷鼓雷鼗

雲門之舞冬日至於地上之圓丘奏之若樂六變則天神皆降是也易云天玄而地黃今地用黃琮依地色而天用蒼者蒼玄皆牲幣放其器之色放方往反幣以是天色故用蒼也

酬幣疏曰言皆則上六玉所禮者皆有牲與幣也言各放其器之色則上蒼璧等六器所有牲幣各放此器之色又曰知幣是從爵非禮神者若是禮神當在牲上以其禮神幣與玉俱設若肆師云立大祀用玉帛牲醴是帛在牲上今在下明非禮神者也云若人飲酒有酬幣者獻尸從爵之幣無文故以生人飲酒之禮況之衆聘禮饗時有酬幣明此幣既非禮神之幣則獻尸後酬尸時亦有幣之從爵也春官典瑞掌

玉瑞玉器之藏

人執以見曰瑞禮神曰器瑞符信也疏曰言掌玉瑞玉器之藏者玉之美者

入天府藏之凡平者仍在典瑞藏之故亦言藏也人執之則曰瑞即下文鎮圭之等是也禮神曰器則下文四

圭之等是也又曰人執以見田瑞禮神曰器者據此文
及大宗伯相對而說散文則人執亦名器故聘禮記云
圭璋璧琮凡此四器者唯其所寶以聘可也又尚書云
五器卒乃復皆是人執而名器也云瑞符信也者若天
子受瑞於天乎故名瑞瑞即符信者也

四圭有邸以祀天

鄭司農云於中央為璧圭著其四面一玉俱成爾雅曰
邸本也圭本著於璧故四圭有邸圭末四出故也或說
四圭有邸有四角也邸讀為抵欺之抵上帝立天立謂
祀天夏至郊天也疏曰此祀天謂夏至郊天也司農
云於中央為璧圭著其四面一玉俱成者云於中央為
璧謂用一大玉琢出中央為璧形亦肉倍好為之四面
琢各出一圭璧之大小圭之長短無文天子以十二為
節蓋四廟圭各尺二寸與鎮圭同其璧為邸蓋徑六寸
摠三尺與大圭長三尺又等故云一玉俱成也云或說
四圭有邸有四角也者此說四角角即邸矣以無正文

故兩釋之也云郊讀為抵欺之抵音讀之也云上帝玄
天者與大宗伯注同司農意與孔王等無六天之義也
玄謂祀天夏至祭昊天與圜丘者也彼又云青圭禮東方
禮天據冬至祭昊天與圜丘者也彼又云青圭禮東方
赤璋禮南方白琥禮西方玄璜禮北方摠四時迎氣及
摠享於明堂之等祭五天也彼惟不見夏至祭所感
帝故知此四圭是夏至祭五天也彼惟不見夏至祭所感
正各郊所感帝即郊特牲云光日於南郊就陽位於郊
也政謂之郊是春官

玉人之事

疏曰云玉人之事者謂
人造玉器玉瑞之事

天子

圭中必

以備失隊為于偽反隊直類反疏曰上列
必讀如鹿車綈之綈謂以組約其中夾為執之

天子及公侯伯之圭於此獨言天子圭中必者案聘禮
記五等諸侯及聘使所執圭璋皆有綈藉及絢組絢組
所以約圭中央恐失隊即此中必之類若然圭之中必
尊卑皆有此不言諸侯圭舉上以明下可知云讀如鹿

車鐸之鐸者俗讀之也此鐸絢組一也

四圭尺有二寸以祀天

郊天所以禮其神也

典瑞職曰四圭有邸以祀天旅上帝疏曰此圭與瑞直言所用禮神不言尺寸故此言之此直言尺二寸案

典瑞注先鄭云中夾為璧圭者其四面一玉俱成又云圭末四出若然此尺二寸者未知璧在中央通兩畔摠

計為尺二寸未知除璧之外兩畔之圭各有一尺二寸據下裸圭尺有二寸而言則此四圭圭別有尺二寸仍

未審以璧為邸邸徑幾許禮既無文不可強記也引典瑞者證祀天為夏正郊所感帝兼國有故旅祭五帝之

事亦以此圭禮

天子祭天地歲徧

疏曰天子祭天地者祭天謂四時迎

氣祭五天帝於四郊各以當方人帝配之月令春曰其帝太皞夏曰其帝炎帝季夏曰其帝黃帝秋曰其帝少皞冬曰其帝顓頊明為配天及告朔而言之其雩祭亦然故月令孟夏云大雩帝為命祀百辟卿士既云祀百

辟卿士明五方人帝天子亦霄祀之其夏正郊感生之
帝周以后稷配之其於明堂揔享五帝以文王武王配
之故孝經說云后稷為天地之主文王為五帝之宗是
也周人祭明堂時又兼以武王配之故祭法云周人宗
武王是也知方岳之神是崑崙者祭地統書括地象云
地中央曰崑崙又云其東南方五千里曰神州以此言
之崑崙在西北別統四方九州其神州者是崑崙東南
一州耳於一州中更分為九州則禹貢之九州是也其
配地之神孝經緯既云后稷為天地之主則后稷配天
南郊又配地北郊則周人以魯配圓丘亦當配方澤也
歲偏者謂五方之祀迎氣享祀明堂及郊雖有重者諸
神皆偏故云歲偏又曰天子祭天地者天地有覆載大
功天子主有四海故得總祭天地以報其功其天有六
祭之一歲有九是天上帝冬至祭之一也蒼帝靈威仰
立春之日祭之於東郊二也赤帝赤熛怒立夏之日祭
之於南郊三也黃帝含樞紐季夏六月土主之日亦祭

之於南郊四也白帝白招拒立秋之日祭之於西郊五也黑帝汁光紀立冬之日祭之於北郊六也王者各稟

五帝之精氣而王天下於夏正之月祭之於南郊七也四月龍星見而雩摠祭五帝於南郊八也季秋大饗五

帝於明堂九也地神有二歲有二祭夏至之日祭崑崙之神於方澤一也夏正之月祭神州地祇於北郊二也

或云建申之月祭之與郊天相對冬至祭昊天上帝者春秋緯云紫微為天帝北極耀魄寶是也其配之人以

帝嚳配之故祭法云周人禘嚳是也其五帝則春秋緯文耀鉤云蒼帝曰靈威仰赤帝曰赤熛怒黃帝曰含樞

紐白帝曰白招拒黑帝曰汁光紀曲禮祭天埽地而祭疏曰燔柴在壇正祭於地故云

埽地而祭郊特牲祭天燔柴於泰壇用騂犢燔音煩壇折

壇之言坦也坦明貌也疏曰北經論祭感生之帝於南郊神州地祇於北郊也燔柴於泰壇者謂積薪於壇

上而取玉及牲置柴上燔之使氣達於天也駢犢之義已具郊特牲疏案禮器云至敬不壇此云燔柴於泰壇

者謂燔柴在壇設饌在地義亦祭天特牲疏曰特一具禮器及郊特牲疏也祭法祭天特牲也天神尊

尊質致止一禮器祭天地之牛角繭栗王制大祝辨六號

一曰神號號謂尊其名更為美稱焉神鼓人以雷鼓

鼓神祀祀雷鼓八而鼓也神祀祀天神也疏曰天神稱祀地示稱祭宗廟稱享案下靈鼓鼓社祭又案

大司樂以靈鼓祭澤中之方丘大地祇與社同鼓則但是地祇無間大小皆用靈鼓則此雷鼓鼓神祀但是天

神皆用雷鼓也又曰鄭知雷鼓八面者雖無正文案韞人為皋陶有晉鼓鼗鼓鼗鼓三者非祭祀之鼓皆兩面

則路鼓祭宗廟宜四面靈鼓祭地祇尊於宗廟宜六面雷鼓祀天神又尊於地祇宜八面故知義然也地官

大司樂以六律六同五聲八音六舞大合樂以致鬼

神示以和邦國以諧萬民以安賓客以說遠人以作動

物六律合陽聲者也六同合陰聲者也此十二者以銅為管轉而相生黃鍾為首其長九寸各因而三分之

上生者益一分下生者去一焉國語曰律所以立均出度也古之神瞽考中聲而量之以制度律均鍾言以中

聲定律以律立鍾之均大合樂者謂偏作六代之樂以冬日至作之致天神人以鬼以夏日至作之致地祇鬼

動物羽籥之屬虞書云夔曰戛擊鳴球搏拊琴瑟以詠祖考來格虞賓在位羣后德讓下管鼗鼓合止祝故笙

簫以間鳥獸踰簫韶九成鳳凰來儀夔又曰於予擊石拊石百獸率舞庶尹允諧此其於宗廟九奏效應

上生時掌反去一起呂反度侍洛反魁着黃反間間厠之間疏曰鄉來說大司樂教國子以樂自此已下論

用樂之事也云以六律六同者此舉十二管以表其鍾
樂器之中不用管也云大合樂者據薦腥之後合樂之
時用之也此所合樂即下云若樂六變若樂八變若樂
九變之等彼據祭天下神此據正祭合樂若然合樂在
下神後而文退下神在樂後者以下神用一代樂此用
六代六代事重故進之在上若然下神不亞合樂而隔
分樂之役者以分樂序之皆用一代此三禘下神亦用
一代若不隔分樂恐其相亂且使一變二變之等與分
樂所用樂同故三神在下也云以致鬼神示者是據三
禘而言云以和邦國已下亦據三禘之祭各包此數事
故鄭引虞書以證宗廟又曰云六律合陽聲者也六同
合陰聲者也者案大師云掌六律六同以合陰陽之聲
是以據而言焉云此十二者以銅為管者案典同先鄭
云陽律以竹陰律以銅後鄭云皆以銅為與此注義同
也云轉而相生已下據律歷志而言子午巳東為上生
午午巳酉為下生上生為陽陽主息故三分益一下生

為陰陰主減故三分去一案律歷志黃鍾為天統律長九寸林鍾為地統律長六寸太簇為人統律長八寸又云十二管相生皆八八上生下生盡於中呂陰陽生於黃鍾始而左旋八八為位者假令黃鍾生林鍾是歷八辰自此已下皆然是八八為位蓋象八風也國語者朱彼景王將鑄無射問律於伶州鳩鳩對曰律所以立均出度古之神瞽考中聲而量之以制度律均鍾鄭引之者欲取以六律六同均之以制鍾之大小須應律同也故鄭云言以中聲定律以律立鍾之均也云中聲謂上生下生定律之長短度律以律立鍾之均也云中聲謂上均即是應律長短者也云大合樂者謂偏作六代之樂者此經六樂即上六舞故知偏作六代之樂言偏作樂不一時俱為侍一代訖乃更為故云偏作也云以冬日作之至物魁皆神仕職文案彼注致人鬼於祖廟致物魁於壇壇蓋用祭天地之明日若然此經合樂據三禘正祭天而引彼天地之小神及人鬼在明日祭之者但

彼明旦所祭小神用樂無文彼神既多合樂之時當與此三禘正祭合樂同故彼此文同稱致但據彼正祭祭天地大神無宗廟之祭祭天明日兼祭人鬼與此為異也云動物羽羸之屬者鄭不釋邦國之等直釋動物者以尚書不言動物故釋訖乃引尚書鳥獸之等證之也虞書者集古文在舜典是舜祭宗廟之禮祭彼鄭注憂標也標擊鳴球已下數器鳴球即玉磬也搏拊以韋為之裝之以糠所以節樂云以詠者謂歌詩也云祖考來格者謂祖考之神來至也云虞賓在位者謂舜以為賓即堯後丹朱也云羣后德讓者謂諸侯助祭者以德讓已上皆宗廟堂上之樂所感也云下管鼗鼓已下謂舜廟堂下之樂故言下云合止祝敔者合樂用祝祝狀如漆甬中有椎搖之所以節樂敔狀如伏虎背有刻以物標之所以止樂云笙鏞以間者東方之樂謂之笙至生也東方生長之方故名樂為笙也鏞者西方之樂謂之鏞庸功也西方物熟有成功亦謂之頌頌亦是頌其

成也以閒者堂上堂下閒代而作云鳥獸踞踞者謂飛鳥走獸踞踞然而舞也云蕭韶九成鳳皇來儀者韶舜樂也若樂九變人鬼可得而禮故致得來儀儀匹謂致得雄曰鳳雌曰皇來儀止巢而乘匹案此下文六變致象物象物有象在天謂四靈之屬四靈則鳳皇是其一此六變彼九成者其實六變致之而言九者以宗廟九變為限靈鳥又難致之物故於九成而言耳云變又曰於予擊石拊石百獸率舞者此於下文別而言之故云又曰變語舜云磬有大小予擊大石磬拊小石磬則感百獸相率而舞云庶尹允諧者庶衆也尹正也允信也言樂之所感使衆正之官信得其諧和云此其於宗廟九奏之效應者此經摠言三禘大祭但天地大祭效驗無文所刊尚書惟有宗廟故指宗廟而言也然尚書云祖考即此經致鬼也虞賓即此經以安賓客羣后德讓即此經邦國也鳥獸鳳皇等即此經動物也乃分樂而庶尹允諧即此經以諧萬民以說遠人也

序之以祭以享以祀

分謂各用一代之樂 疏曰此與下諸文為摠目上摠云六舞今分

此六代之舞尊者用前代卑者用後代使尊卑有序故云序若然經所先云祭地後云祀天者欲見不問尊卑

事起無常故倒文以見義也

乃奏黃鍾歌大呂舞雲門以祀天神

黃

鍾之鍾大呂之聲為均者黃鍾陽聲之首大呂為之合奏之以祀天神尊之也天神謂五帝及日月星辰也王

者又各以夏正月祀其所受命之帝於南郊尊之也存經說曰祭天南郊就陽位是也 疏曰此黃鍾言奏大

呂言歌者云奏據出聲而言云歌據合曲而說其實歌奏通也知不言歌歌據堂上歌詩合大呂之調謂之歌

者春秋左氏傳云晉侯歌鍾二肆取半以賜魏絳魏絳於是有金石之樂欲據鍾磬列肆而言是不在歌詩亦謂

之歌明不據偏歌毛詩也襄四年晉侯饗穆叔云奏肆夏歌文王大明綿亦此類也又曰云以黃鍾之鍾大呂

之聲者以經云奏奏者奏擊以出聲故據鍾而言大呂
經云歌歌者發聲出音故據聲而說亦互相通也言為
均者案下文云凡六樂者文之以五聲播之以八音鄭
云六者言其均皆待五聲八音乃成也則是言均者欲
作樂先擊此二者之鍾以均諸樂是以鍾師云以鍾鼓
奏九夏鄭云先擊鍾次擊鼓論語亦云始作翕如也鄭
云始作謂金奏是凡樂皆先奏鍾以均諸樂也必舉此
二者以其配合是以鄭云黃鍾陽聲之首大呂為之合
也言合者此據十二辰之斗建與日辰相配合皆以陽
律為之主陰呂來合之是以大師云掌六律六同以合
陰陽之聲注云聲之陰陽各有合黃鍾子之氣也十一
月建焉而辰在星紀大呂丑之氣也十二月建焉而辰
在玄枵大蕤賓之氣也正月建焉而辰在娵訾應鍾亥
之氣也十月建焉而辰在析木以後皆然是其斗與辰
合也云奏之以祀天神尊之也者以黃鍾律之首雲門
又黃帝樂以尊祭尊故云尊之也云天神謂五帝及日

月星辰也者樂下云若樂六變天神皆降是昊天則知此天神非天帝也是五帝矣知及日月星者案大宗伯昊天在禮祀中日月星在實柴中鄭注云五帝亦用實柴之禮則日月星辰與五帝同科此下文又不見日月星別用樂之事哉知此天神中有日月星辰可知其司中已下在櫛燎中則不得入天神中故下文約與四望同樂也云王者又各以夏正月祀其所受命之帝於南郊尊之也者案易緯乾鑿度云三王之郊一用夏正郊特牲云北日於南郊就陽位大傳云王者禘其祖之所自出以其祖配之若周郊東方靈威仰之等是王者各以夏正月祀其所受命之帝於南郊特尊之也云孝經說者說即緯也時禁緯故云說引之證與郊特牲義同皆見郊所感帝用樂與祭五帝不同異以其所郊天亦是五帝故也

六變而致象物及

天神

變猶更也樂成則更奏也此謂大蜡索鬼神而致百物六奏樂而禮畢象物有象在天所謂四靈者

天地之神四靈之知非德至和則不至禮運曰何謂四靈麟鳳龜龍謂之四靈龍以為畜故魚鼈不愆鳳以為畜故鳥不獮麟以為畜故獸不戕龜以為畜故人情不失疏曰云象物有象在天所謂四靈者以其天神同變致之象者有形象在天物者與羽羸等同稱物故知有象在天四靈等也云天地之神四靈之知者天則天神地則土祇故云天地之神四靈之知也云非德至和則不至者欲見介物已上皆以樂和感之未必由德此天地四靈非直順樂要有德至和乃致之也云禮運已下者欲見象物則彼四靈也云何謂四靈者記人自問自答樂彼注云愆之言閃也言魚鼈不閃閃畏人也猶戕飛走之貌二者皆據魚鼈不愆不可於龜更言魚鼈以龜知人情故變言人情不失也案月令孟冬祈來年於天宗鄭注云此周禮所謂蜡也天宗日月星辰以月令祈於天宗謂之蜡則此天神亦是日月星辰非大天神以蜡祭所祭衆神祭卑不可援尊地神惟有土祇是

以知無天地大神也又尚書云蕭韶九成鳳皇來儀九成乃致象物者鄭以儀為匹謂止巢而孕乘匹故九變乃致此直據致其神故與大天神同六變也

凡樂園鍾為宮黃鍾為角太簇

為徵姑洗為羽雷鼓雷鼗孤竹之管雲和之琴瑟雲門之舞冬日至於地上之圜丘奏之若樂六變則天神皆

降可得而禮矣

角如字古音鹿徵張里反此禘大祭也天神則主北辰先奏是樂以致其神

禮之以玉而裸焉乃後合樂而祭之大傳曰王者必禘其祖之所自出祭灋曰周人禘嘗而郊稷謂此祭天圜丘以饔配之圜鍾夾鍾也夾鍾生于房心之氣房心為大辰天帝之明堂以此為宮用聲類求之天宮夾鍾陰聲其相生從陽數其陽無射無射上生中呂中呂與地宮同位不用也中呂上生黃鍾黃鍾下生林鍾林鍾地

宮又不用林鍾上生大簇大簇下生南呂南呂與無射
同位又不用南呂上生姑洗凡五聲宮之所生濁者為
角清者為徵羽此樂無商者祭尚柔商堅剛也鄭司農
云鼗鼓鼗鼗皆謂六面有革可擊者也孤竹竹特生雲
和山名疏曰六變者謂在天地及廟庭而立四表舞
人從南表向第二表為一成一成則一變從第二至第
三為二成從第三至北頭第四表為三成舞人各轉身
南向於北表之北還從第一至第二為四成從第二至
第三為五成從第三至南頭第一表為六成則天神皆
降此約周之大武象武王伐紂故樂記云且夫武始而
北出再成而滅商三成而南四成而南國是疆五成而
分周公左召公右六成復綴以崇天子其餘大護已上
雖無滅商之事但舞人須有限約亦應立四表以與舞
人為曲別也禮天神必於冬至者以天是陽冬至一陽
生還於陽生之日祭之也郊天必於建寅者以其郊所
感帝以祈穀實取三陽交生之日萬物出地之時也言國

丘者築爾雅土之高者曰丘取自然之丘圉者象天圉
既取丘之自然則未必要在郊無問東西與南北方皆
可因高以事天故於地上天神言皆降者祭尊可以及
卑故禮記云大報天而主日配以月是其神多故云皆
也天神六變地示八變人鬼九變者上文四變已上所
致有先後也天神有靈智故據至德至和乃可以致今
此六變已上則據靈異而言但靈異大者易感小者
難致故天神六變地祇八變人鬼九變也 春官

凡以神仕者掌三辰之法以猶鬼神示之居辨其名物

猶圖也居謂生也天者羣神之精日月星辰之著位也
以此圖天神人鬼地祇之生者謂布祭衆寡與其居句
孝經說郊祀之禮曰燔燎掃地祭牲繭栗或象天酒旗
坐星廚倉具黍稷布席極敬心也言郊之布席象五帝
坐禮祭廟序昭穆亦又有似虛危則祭天圉丘象北極
祭地方澤象后妃及社稷之席皆有明法焉 句紀具

反疏曰序官注云神仕者男巫之俊知是巫者此中掌三辰之法以猶鬼神示之居案外傳云在男曰現在女曰巫使制神之處位次主之度與此文合故知此神仕是巫云以此圖天神人鬼地祇之坐者謂布祭衆寡與其居句者鄭意鬼神祇之居止是布祭於神神有衆寡多少或居方為之或句曲為之也引存經說郊祀者援神契文敢問章云周公郊祀后稷以配天云郊祀之禮燔燎埽地已下至收心之言釋之也言郊之布席已下是鄭君語云郊之布席象五帝坐者案天文有五帝坐星東方蒼帝靈威仰南方赤帝赤熛怒中央黃帝含樞紐西方白帝白招拒北方黑帝汁光紀各於其面是布神坐也云禮祭宗廟序昭穆者文二年大事於其面是毀廟之主陳於大祖未毀廟之主皆升合食昭南而穆北面是人鬼之席坐也云亦有似虛危者虛危有墳墓四司又為宗廟布席象之故云又有似虛危也云則祭天圓丘象北極者北極有三星則中央明者為大一帝

居傍兩星為臣子位焉云祭地方澤象后妃者天有后妃四星天子象天后象地后妃是其配合也云及社稷者天有天社之星祭社之位象焉故云及社稷之席之言結五帝已下是也存經說云祭牲適稟者據祭也

以冬至致天神人鬼

天人陽也陽氣升而祭鬼神致人鬼於祖廟蓋用祭天之明日

疏曰言以冬至此則大司樂云冬至至於澤中之方丘圓丘奏之若樂六變天神皆降夏日至於澤中之方丘奏之又曰鄭云天人陽也者此解冬日至祭天神人鬼之意以其陽故十一月一陽生之月當陽氣升而祭之也云致人鬼於祖廟致物魁於壇壇此鄭惟釋人鬼物魁不言致天神之處者文略亦當在壇壇也云蓋用祭天地之明日者當冬至夏至之日正祭天地之神示事繁不可兼祭此等雖無正文鄭以意量之故云蓋用祭天之明日

春官

大宰祀五帝則掌百官之誓戒與其具脩

祀五帝謂四郊以明堂誓戒要之以刑重失禮也明堂位所謂各揚其職百官廢職朕大刑是其辭之略也其所當共脩埽除奠酒要一遙反酒危責反疏曰祀五帝則掌百官之誓戒者謂祭前十日已前誓戒百官則大宰掌之與其具脩者使百官共祭祀之具及脩之埽除也又曰五帝者東方青帝靈威仰南方赤帝赤熛怒中央黃帝含樞紐西方白帝白招拒北方黑帝汁光紀依月令四時迎氣及季夏六月迎土氣於南郊其餘四帝各於其郊并夏正祭所感帝於南郊故云祀五帝於四郊也鄭云及明堂者揔饗五帝於明堂依月令秦用季秋鄭云未知周以何月案下曲禮云大饗不問卜鄭云祭五帝於明堂莫適卜也彼明堂不卜此下經云帥執事而卜日則此祀五帝不合有明堂鄭云及明堂者廣解祀五帝之處其實此處無明堂云誓戒要之以刑重失禮者言要之以刑則服大刑是也言重失禮者以失禮為重改要之以刑引明堂位彼在祭祀之下陳

七日以定之致齊三日以齊之云執事宗伯大卜之屬者大宗伯職云凡祀大神享大鬼祭大示帥執事而卜日謂宗伯涖卜又案大卜云大祭祀視高命龜政知執事中有宗伯大卜之屬中含有小宗伯及卜師故言之屬但四時迎氣冬至夏至郊天等雖有常時常日猶須審慎仍卜日故表記云不犯日月不違卜筮注日月謂冬夏至正月及四時也所不違者日與牲尸也假令不吉改卜後日故歲膏肓云天子郊以夏正上旬之日當之卜三正下旬之日是雖

及執事眡滌濯

眡音視疏有常時常日猶卜日也

謂至祭前夕大宰眡滌濯案春官小宗伯大祭祀眡滌濯大宗伯亦云宿眡滌濯彼二官親眡滌濯大宰尊亦往涖之注云執事初為祭事前祭日之夕知者案下經及納享者是祭日此云眡滌濯儀禮特牲亦云前祭日之夕視盥濯及豆蓬士卑得與人君同少牢大夫禮當祭日溉祭器者下人君也又云滌濯謂溉祭器及甑甗

之屬知然者案少牢饗人概鼎七俎康人概甑甗司宮
概豆蓬及勺爵此不言七俎豆蓬勺爵者之屬中含之

及納亨贊王牲事

亨普庾反劉普孟反納亨納牲將
告殺謂卿祭之晨既殺以授亨人凡

大祭祀君親牽牲大夫贊之卿許亮反疏曰又猶
至也至納亨者案禮記明堂位君肉袒迎牲於門卿大
夫贊君及殺訖納與亨人故言納亨云贊王牲事者即
是卿大夫贊幣一人也又曰云納亨納牲將告殺者謂
牽牲入時也禮器云納牲詔于庭殺訖毛以音純血以
告殺腥其俎胞解而腥之以此訖乃納與亨人燔祭此
言納亨者以牽牲也云謂嚮祭之晨者案檀弓云周人
大事以日出政知納亨是嚮祭之晨此祭天無祿故先
迎牲若宗廟之祭有祿而後迎牲也云既殺以授亨人
者案亨人職職外內饗之饗亨謂腥其俎後云凡大祭
祀君親牽牲大夫贊之者此明堂位文
彼魯侯用天子禮政引以證天子法

及祀之日贊王

幣爵之事

日旦明也玉幣所以獻齊酒不用玉爵尚質也三者

執以從玉至而授之齊才計反疏曰及猶至也至祭日謂質明贊助也執此玉幣爵三者助而授王也又

曰案特牲少牢皆質明行事故知且明云玉幣所以禮神玉與幣各如其方之色者上云祀五帝以為迎氣於

四郊之等案大宗伯以玉作六器以禮天地四方又云青圭禮東方赤璋禮南方白琥禮西方玄璜禮北方季

夏六月迎土氣於南郊亦用赤璋下云牲幣使雖幣不

是禮神之幣亦云各致其器之色是其禮神幣與玉亦

各如其方色也云爵所以獻齊酒者案零人云疏布零

八尊八尊者五齊三酒之尊以其祭天無祿故無羹尊也云不用玉爵尚質也者對下經享先王用玉爵尚文此祭天不用玉爵故云尚質云三者執以從玉至而授之者謂至此祀圓丘方澤祭祈而授之祀大神示亦如王親自執玉幣奠於神坐親酌以獻尸祀大神示亦如

之大神祇謂天地 疏曰云祀大神謂冬至祭天於圜丘云祀大祇謂夏至祭地於方澤亦如之者從掌百

官警戒已下贊玉幣爵之事已上皆如祀五帝之禮又曰此天謂大天對五帝為小天此地謂大地對神州之

神為小地政云天地也 天官

大宗伯凡祀大神享大鬼祭大示帥

執事而卜日宿眡滌濯涖玉鬯省牲鑊奉玉盥詔大號

治其大禮詔相王之大禮

省本又作貴息井反鑊戶郭反盥音咨相息亮反執事

諸有事於祭者宿申戒也滌濯澆祭器也玉禮神之玉也始涖之祭又奉之鑊享牲器也大號六號之大者以

詔大祝以為祝辭治猶簡習也豫簡習大禮至祭當以詔相王羣臣禮為小禮故書涖作立鄭司農讀為涖

視也 疏曰帥執事而卜日者謂祭三者鬼神之時祭前十日大宗伯先帥執事有事於祭者共卜取吉日乃

齊云宿眠滌濯者謂祭前一宿視所滌濯祭器看潔淨與否云滌玉鬯者天地有禮神之玉無鬱鬯宗廟無禮神之玉而有鬱鬯但宗廟雖無禮神玉仍有圭瓚璋璚亦是玉故曲禮云玉曰嘉玉郊特牲云用玉氣是也云省牲鑊者當省視享牲之鑊云奉玉盥者此玉還是上文所注者盥謂黍稷天地當盛以瓦甒但盥與上鬯互見為義皆始時臨之祭又奉之詔大號者謂大宗伯告大祝出祝辭也云治其大禮者謂天地人之鬼神祭禮王親行之為大禮對下小宗伯治小禮為小也詔相王之大概者謂未至之時詔告之及其行事則又相之又曰案太宰云祀五帝前期十日帥執事而卜日注云執事宗伯大卜之屬此注云執事諸有事於祭者二注不同者以其大宰不掌祭事故云執事大宗伯大卜之等卜日而已此大宗伯主祭祀之事故摠諸有事於祭者也云滌濯灑祭器也者此滌濯止是蕩滌以少牢有概祭器故據而言之概即拭也云玉禮神之玉也者即蒼

璧黃琮青圭赤璋之等又四圭兩圭之類皆是禮神致
於神坐也案九嬪職云贊玉鬯注云玉鬯玉敦成黍稷
與此注玉為禮神之玉鬯即非玉敦所成注不同者彼
九嬪所贊贊后設之據宗廟宗廟無禮神玉則玉鬯不
得別解故為玉敦此據天地為主有禮神玉敦與鬯別
釋也大宰云祀五帝贊玉幣爵之事注云三者執以從
王至而授之彼所執據五帝此所奉據昊天與崑崙故
不同云始涖之祭又奉之者鄭據上云涖涖臨視也直
視看而已下云奉據手執授王故云祭又奉之云鎡亨
牲器也者案特牲少牢鎡即鑿在廟門之外東壁也云
大號六號之大者謂若大祝云辨六號一曰神號二曰
示號三曰鬼號四曰牲號五曰鬯號六曰幣號之等是
六號之大者也云以詔大祝以為祝辭者經云詔大號
大祝是事神之人又辨六號故知所詔是詔大祝為祝
辭祝辭則祝版之辭是也云羣臣禮若王不與祭祀則
為小禮者則小宗伯小祝行者是也

攝位

與音預 王有故代行其祭事 疏曰攝訓為代有故者謂王有疾及哀慘皆是也 量人云凡宰祭

與鬱人受殿歷而皆飲之注云言宰祭者冢宰佐王祭亦容攝祭此宗伯又攝者冢宰貳王治事宗伯主祭事

容二官俱攝故兩言之 春官

右昊天天神之祀 辭皇皇上天照臨下土集地

之靈降甘風雨

禮運曰地東南陰竅於山川

庶物羣生各得其所

靡今靡古

言覆施均

維予一人某敬拜皇天之祐

古祝辭則

云嗣王某或曰一人某王者親告之辭也大戴禮公符篇

小宗伯兆五帝於四郊四望四類亦如之

兆為壇之營域五帝蒼曰

靈威仰大昊食焉赤曰赤燝怒炎帝食焉黃帝食焉黃曰含樞紐
黃帝食焉白曰白招拒少昊食焉黑曰汁光紀顓頊食
焉黃帝亦於南郊鄭司農云四望道氣出入四類三皇
五帝九皇六十四氏咸祀之玄謂四望五嶽四鎮四寶
四類日月星辰運行無常以氣類為之位兆日於東郊
兆月與風師於西郊兆司中司命於南郊兆雨師於北
郊
拒居禹反沈又音巨汁音叶劉子集反實音獨本亦作
瀆疏曰自此已下云外神從尊至卑故先云五帝此
不云大帝者此文上下唯論四郊以對國中右社稷左
宗廟其大帝與崑崙自相對而在四郊故不言也又曰云
園丘及澤中之方丘以其不在四郊故不言也又曰云
兆為壇之營域者案封人云社稷之壇謂壇土為之即
此壇之營域一也不言壇者舉外營域有壇可知云五
帝蒼曰靈威仰之等此於大宗伯釋訖但彼據禮神玉
幣而言此據壇域處所而說故兩處各言之也司農云

四望道氣出入者案上注司農以為日月星海後鄭不從矣今此云道氣出入與上注不同者以無正文改兩注有異若然云道氣出入則非日月星海謂五嶽之等也改後鄭就足之還為五嶽之屬解之先鄭云四類三皇五帝九皇六十四氏咸祀之者案史記云九皇氏沒六十四氏與六十四氏沒三皇興彼雖無三王五帝之文先鄭意三皇已祀之明并祭五帝三王可知後鄭不從者以其兆五帝已下皆據外神大昊勾芒等配祭而已今輒持祭人帝於其中非所宜故不從是以取五嶽之屬易之也後鄭注云四類日月星辰者以其言類明以氣類而為位以祭之故知是日月之等知兆日於東郊者案祭義云大明生於東故覲禮亦云拜日於東郊玉藻又云朝日於東門之外也又知兆月於西郊者月生於西知風師亦於西郊者以其五行金為暘土為風風雖屬土秋氣之時萬物燥落由風故風亦於西郊也云兆司中司命於南郊者以其南方咸陽之方司中司

命又是陽故司中司命在南郊也云兆雨師於北郊者
以其雨是水宜在水位故知雨師在北郊天子四望諸
侯三望境內山川崇雘三十一一年夏四月猶三望服氏
云三望分野星國中山川又上文先鄭云四望日月星
海後鄭必知望祭中無天神者崇哀六年云初楚昭王
有疾卜曰河為祟王弗祭大夫請祭諸郊王曰三代命
祀祭不越望江漢睢漳楚之望也爾雅又云梁山晉望
又案尚書云望於山川則知望祭中無天神可知若天
神日月之等當入四類之內也若然尚書云望於山川
必知四望非山川是五嶽四瀆者以其下云兆山川丘
陵之等山川既在下故知此四望是
五嶽之屬山川之大者也 春官

掌次祀五帝則

張大次小次設重幣重案

重直龍反 祀五帝於四郊
次謂帷也 大帷初往所止居

也小帷既接祭退俟之處祭義曰周人祭日以朝及闇
雖有強力孰能支之是以退俟與諸臣代有事焉重幣

視帝重案牀重席也鄭司農云五帝五色之帝疏曰
 張大次小次者次謂幄帳也大帷小帷但帷在幕中既
 有帷明有帷幕可知設重帝者謂於帷中設承塵云重
 案者案則牀也牀言重謂牀上設重席不言壇及皇邸
 亦有可知上甄案不言重席亦有重席可知互見為義
 又曰祀五帝於四郊即小宗伯兆五帝於四郊是也此
 謂四時迎氣月令四立之祭是也云次謂帷也大帷初
 往所止居也小帷既接祭退俟之處者必兩處設帷者
 大帷謂王侵晨至祭所祭時未到去壇壝之外遠處設
 大次王且止居故云大帷初往所止居也接祭者與羣
 臣交接相代而祭去壇宜近置小一帷退俟之處云重
 帝複帝者謂兩重為之云重案牀重席者案司几筵莞
 筵繅席次席三重此言重席亦當有此三重與
 重帝不同五帝五色帝即靈威仰之屬天官司服

王服大裘而冕

鄭司農云大裘羔裘也疏曰鄭司農
 云大裘羔裘也者司裘文先鄭注云大

裘黑羔裘然則凡祭之皆同羔裘義具於司裘也

春官

大宰掌百官之誓戒與

其具脩前期十日帥執事而卜日遂戒及執事眡滌濯

及納亨贊王牲事及祀之日贊王幣爵之事

天官注詳見吳

天天神之祀

大司冠若禮祀五帝則戒之日涖誓百官戒

于百族

戒之日卜之日也百族謂府史以下也郊特牲曰卜之日王立于澤親聽誓命受教諫之義也

獻命庫門之內戒百官也大廟之內戒百姓也疏曰禮之言煙禮祀五帝謂迎氣於四郊及揔享五帝於明

堂也云戒之日者謂前十日卜之日卜吉即戒之使散齊云涖誓百官者謂餘官誓百官之時大司冠則臨之

云戒於百族者大司冠親自戒之其百官所戒者當大宰為之是以大宰云祀五帝前期十日帥執事而卜日

速戒故知大宰戒百官也若然大宰云祀五帝則掌百
官之誓戒大宰雖云掌百官誓戒戒則親為之誓則掌
之而不親誓何者此司冠卑於大宰此云濯誓百官豈
司冠得臨大宰乎故知大宰掌之餘小官誓之司冠臨
之也又曰鄭知百族府史以下者以其王之百姓亦同
大宰戒之故知百族府史胥徒也引郊特牲者欲見百
族非王之親是府史以下也云獻命庫門之內戒百官
也者王自澤宮而選入皋門至庫門之內大宰獻命
即戒百官又於庫門內而東入廟門廟門之內戒
百姓使注云百姓王之親也族親故入廟乃戒之及納

亨前王祭之日亦如之

亨普庚反劉普孟反納亨致牲者謂

將祭之辰祭之日謂旦明也此二奉其明水火明水火

者大司冠為王引道故云亦如之

所取於

日月者疏曰司恒氏以陽燧取火於日中以陰鑑取
水於月中明者祭也主人明祭水火乃成可得是明水

火所取於日月者也奉此水火者以
配鬱鬯與五齊火以給鬱亨也 秋官 小司寇凡禋

祀五帝實鑊水納亨亦如之

以納亨致牲也其時鑊水當
以洗解牲體肉 疏曰云

禮祀五帝者祭天曰燔柴即禮祀也故云禮祀五帝五
帝所祀謂四時迎氣摠享明堂實鑊水以擬洗肉所用
也納亨亦如之納亨致牲謂將祭亨祭之晨實以水亨
牲也鄭知實鑊水為洗解牲肉者以下云納亨亦如之
是實鑊水亨煮肉故知此是洗肉也封
人云共其水滌亦謂洗牲肉也 秋官 士師祀五帝

則沃尸及王盥洎鑊水

洎其器反或音冀 洎謂增其
沃汁 疏曰案特牲少牢尸尊

不就洗入門北面則以盥盥盥手王盥謂將獻尸時先
就洗盥洎鑊水增其沃汁鑊水在門外之東亨牲之鬯言
須鑊水就鬯增之亨實鑊水此官增之示敬而已此直
言祀五帝沃尸及王盥其餘冬至夏至及祭先王先公

所沃盥者案小祝職云大祭祀沃尸盥小祝職云大祭祀朝覲沃王盥如是則冬至夏至及先王先公小祝沃王盥小臣沃王盥鬱人云凡裸事沃盥惟在宗廟為裸時秋官

充人掌繫祭祀之

牲牲祀五帝則繫于牢芻之三月

牢閑也必有閑者防禽獸觸齧養牛羊曰

芻三月一時節氣成疏曰云充人掌繫祭祀之牲牲者但祭祀之牲皆體全具故以牲言之也云祀五帝者上文云掌繫祭祀之牲牲則摠養天地宗廟之牲下別言祀五帝則略舉五帝而已其實昊天及地祇與四望社稷之等外神皆繫之也又曰牢閑也者校人養馬謂之閑此養牛羊謂之為牢言閑見其閑衛言牢見其牢固所從言之異其實一物也云必有閑者防禽獸觸齧者案春秋有郊牛之口陽飢鼠食其角自外恐更有禽獸觸齧故鄭摠云焉云養牛羊曰芻者此經云繫于牢芻之惟據牛羊若犬豕則曰養又不繫之矣

云三月一時節氣成者釋必以三月之意案宣三年公
羊云帝牲在于滌三月何休云滌宮名養帝牲三牢之
處也三牢者各主一月取三月一**展牲則告**具也
時足以充天牲是其三月之義也**展牲則告**具也
今時選牲也充人主以牲告展者也玄謂展牲若今
夕牲也特牲饋食之禮曰宗人視牲告充舉獸尾告備
近之疏曰先鄭以為選牲時後鄭不從者是選牲
時應在牧人牧人選訖始付充人今既在繫養之下乃
言展牲則告牲明非初選牲故不從玄謂展牲若今夕
牲也者此舉漢法以況之又引持牲禮者以其天子禮
亡故舉以言焉案彼宗人視牲告充亦謂祭前之夕夕
牲時云舉首尾者士用兔腊言獸尾止謂兔也言近之
者彼謂士禮引證**碩牲則贊**助持之也若牽牲入將致之
天子法故云近之**碩牲則贊**助持之也春秋傳曰故奉
牲以告曰博碩肥腍疏曰上經夕牲時此經據正祭
時言碩牲者謂君牽牲入廟卿大夫贊幣而從皆云博

碩肥腍此充人既是養牲之官當助持牛割而牽之又曰鄭知有君牽牲者見祭義云君牽牲穆荅君卿大夫序從天子亦當然又引春秋傳者此春秋左氏傳楚武王侵隨隨少師請追楚師季梁止之曰天方授楚楚之羸其誘我也臣聞小之能敵大也小道大淫又云今氏餒而君逞欲祝史矯舉以祭不知其可也公曰吾牲牷肥腍染臠豐備何則不信對曰夫民神之王也是以聖王先成民而後致力於神故奉牲以告曰博碩肥腍謂民力之普存也是

大司徒祀五帝奉牛牲羞其肆

北肆

歷反注肆解肆去同司農音四注肆陳同牛能任載地類也奉猶進也鄭司農云羞進也肆陳骨體也玄謂進所肆解骨體士喪禮曰肆解去蹄疏曰羞其肆者羞進也肆解也謂於俎上進所解牲體於神坐前又曰鄭解司徒奉牛之意故云牛能任載地類也故屬地官司徒鄭司農云羞進也肆陳骨體也者骨體肩臂脊骨

之屬司晨以肆為四音讀之故云肆陳也謂陳壯體於
俎上即體解折節為二十一體是也故云陳骨體也玄
謂退所肆解骨體者後鄭之意以肆為摘音讀之肆解
骨體者為七體解之故引士喪禮曰肆解去蹄案士喪
禮曰特豚四髯去蹄彼注云四解之殊肩髀彼言殊肩
髀與此骨體一也但彼云四髯此云肆解其字不同者
鄭直以義讀之非彼正文此云解當彼髯也後鄭必不
從先鄭為肆陳骨體為二十一體者案禮運云脰其且
孰其般彼注云脰其俎謂豚解而脰之也孰其散謂體
解而燭之祭祀之法先豚解後體解經云奉牛牲謂初
牽入時即言羞其肆明先豚解又案國語禘郊之事則
有全胥明知不得先有體解若然則禘郊之事先全胥
始後豚解也若宗廟則無全胥先豚
解次體解禮運所云者是也地官

季秋上丁命樂

正入學習吹

吹昌睡反

為將饗帝也

春夏重舞秋冬

之文此有習吹之事故云為將饗帝其習舂吹必用
 丁者取其丁壯成就之義欲使學者藝業成故也

大

饗帝

言大饗者通祭五帝也曲禮曰大饗不問卜謂此
 也疏曰若祭一帝之時則禮器謂之饗帝今云

大饗故知偏祭五帝也此大饗與帝連文故謂祭天禮
 器大饗其王事與彼下云三牲魚腊九州之美味是四

方助祭之物故以大饗為裕也與此不同引曲禮云大
 饗不問卜謂此者以曲禮大饗不云帝此云大饗帝不

云不問卜恐是別事諸儒多以為疑故鄭執之云曲禮
 所云謂此也鄭必知曲禮大饗非指裕祭必是此大饗

帝者以同禮祀大神享大鬼神執事而卜日若裕祭不
 得云不問卜也此既五帝皆饗莫過卜可從故知不問

卜謂
 此也
 嘗犧牲告備于天子

嘗者謂嘗羣神也天子親嘗
 帝使有司祭於羣神禮畢而

告焉疏曰嘗犧牲者謂嘗祭羣神以犧牲牲於時有
 司嘗祭其事既畢告祭備具於天子也又曰此犧牲之

文饗帝之下知非欲饗帝之時使有司展犧牷告其備
具而云嘗謂嘗羣神者以四月大雩以祈穀實雩上帝
之後云雩祀百辟卿士是雩帝之外別雩羣神九月大
饗以報功明饗帝之外亦饗羣神故知此嘗嘗羣神云
使有司祭于羣神者以其經云告備於天子故知是有
司帝是尊神故知天子親祭經云饗帝鄭云天子親嘗
者嘗是秋祭之名因經有嘗犧牷之文雖
天子亦曰嘗以秋物新成故也 月令 仲夏命樂

師脩鞀鞀鼓均琴瑟管簫執干戚戈羽調竽笙篳篥飭

鍾磬祝敔

鞀步西反

作圓

為將大雩

帝習樂也

脩均執調飭者

反

筵音池本又作荒

敵魚呂反本又

作荒敵魚呂反本又

治其器物習其事之言為于偽反下為民同疏曰
鞀字或從兆下鼓樂周禮少師注云鼗如鼓而小持其

柄搖之旁耳還自擊鄭注詩云小鼓在大鼓旁應鼗之
屬也鞀鼓者則周禮鼓人職掌六鼓雷鼓鼓鼓神祀之屬

是也劉熙釋名云韜導也所以導樂作鞀也鞀助鼓
節鼓節也張皮以冒之其中空廓琴者釋樂云大琴謂
之離孫炎云琴瑟離廣雅云琴長二尺六寸五分五絃
劉熙釋名云施絃張之瑟者釋樂云大瑟謂之灑孫炎
云音之布告如埽灑郭景純云瑟長八尺一寸二十七
絃管者釋樂云大管謂之簫音騷郭景純云管長八圓
寸併漆之有底賁氏以為如虎六孔鄭注周禮云管如
蓮而小併兩而吹之簫者釋樂云大簫謂之言郭景純
云編二十三管長尺四寸鄭注周禮簫編小竹管如今
賣鉛錫所吹者劉熙釋名簫簫也干盾也戚斧也戈鉤
弓戟羽鳥羽周禮羽舞皇舞之屬是也茅者鄭注周禮
云茅三十六黃釋名云茅汙也其中汙空笙者鄭注周
禮云十三黃釋樂云大笙謂之東郭景純云列管箏中
施簧管端大者十九簧釋名云笙生也象物出地所生
虎者釋樂云大虎謂之沂郭景純云虎以竹為之長尺
四寸圓三寸一孔上出寸三分名翹橫吹之廣雅云八

孔鄭司農注周禮云虎七空釋名云虎啼也聲如嬰兒啼
黃者芋室之名也氣鼓之而為聲釋名云黃橫也於
管頭橫施之鍾者衆釋樂云大鐘謂之鋪釋名云鍾空
也內空受氣多磬者釋樂云大磬謂之鑿音鼗以玉石
為之釋名云磬聲也聲堅聲鑿然祝者釋樂云所以鼓
祝謂之止郭景純云祝如漆桶方二尺四寸深一尺八
寸中有椎柄連底桐之令左右擊止者其椎名故者釋
樂云所以鼓故謂之蕤郭景純云故如伏虎背上有二
十七鉏鉏刻以木長尺標之又曰脩者脩理舊物均者
均平其聲執者操持管為調者調和音曲飭者整頓器
物故云治其器物習其事之言也月令命有司為民祈祀山川百源大雩

帝用盛樂乃命百縣雩祀百辟卿士有益於民者以祈

穀實

辟必亦反
者也衆水始

陽氣感而常旱山川百源能興雲雨
所出為百源必先祭其本乃雩雩吁

嗟求雨之祭也。雩，帝謂為壇南郊之旁，雩，五精之帝配
以先帝也。自鞞，鞞至祝，祝散，皆作曰：「威樂凡他雩，用歌舞。」
而已。百辟卿士古者上公若勾龍，后稷之類也。春秋傳
曰：「龍見而雩。」雩之正當以四月。凡周之秋三月之中而
早亦脩雩禮以求雨。固著正雩，此月夫之矣。天子雩上
帝諸侯以下雩，上公周冬及春夏雖早禮有禱無雩。
句古侯反。見賢通反。疏曰：「正以將欲雩祭，故先命有
司為祈祀山川百源為將雩之漸，重民之義也。故先為
氏大雩。帝用威樂者，為民祈穀。後天子乃大雩。天帝用
上鞞鞞之等，故云用威樂。乃命百縣雩祀百辟卿士者，
謂天子既雩之後，百縣謂諸侯也。命此諸侯以雩祀古
之百辟及卿士等生存之日，能立功有益於人者。又曰：「
以四月純陽用事，故云陽氣成而恒旱，故制禮此月為
雩。」縱令雩祭時不早，亦為雩祭。云雩吁嗟求雨之祭者，
以雩音近吁，又女巫巫職云：「凡邦之大雩，歌哭而請，歌哭
則吁嗟之類。」旱又是大雩，故項吁嗟求雨。注春秋者以

霄為遠謂遠為百穀求雨非鄭義也云霄帝謂為壇南
郊之旁霄五精之帝者以霄是祭天當從陽位以五天
摠祭不可偏在四方故知在南郊也以春夏秋冬共成
歲功不可偏祭一天故霄五精之帝以自外至者無主
不正當以人帝配之大皞配靈威仰炎帝配赤熒怒少
皞配白招拒黃帝配含樞紐顓頊配汁光紀故云配以
兕帝也云凡他霄用歌舞而已者崇女巫巫云早暝則舞
霄是用歌舞正霄則非唯歌舞兼有除樂改論語云舞
霄詠而歸是也云百辟卿士古者上公句龍后稷之
類也者百辟則古之上公則國語錄為崇伯而禮記
祭法有祀之文社稷五祀雖為王朝卿士兼帶上公之
官故左氏云封為上公祀為貴神是身為百辟又為卿
士崇左傳有社稷五官今直云若句龍后稷不云句芒
蓐收之享舉有益於民功之顯者言之引春秋傳曰龍
見而霄者欲明正霄在四月不在五月也云凡周之秋
三月之中早亦脩霄禮以求雨者釋此經大霄在五月

之中為五月不雨脩雩祭作記者言五月之雩是常雩
攷記之於五月也云天子雩上帝者以此云大雩帝也
云諸侯以下雩上公者此云乃命百縣雩祀百辟卿士
是也云周冬及春夏雖早禮有禱無雩者祭春秋周亡
月八月九月皆書雩穀梁不識成七年冬大雩穀梁云
然為雩是識其冬雩是冬無雩也春秋周之春及周之
四月五月皆無雩文春夏不雩雖早不為脩雩之祭其
周季夏當有正雩則龍見而雩是也祭春秋桓五年秋
大雩傳云書不時服注雩遠也遠為百穀祈膏雨言大
別山川之雩也雩十一年秋八月大雩十三年秋九月
大雩成公三年秋大雩七年冬大雩襄五年秋大雩傳
曰早八年九月大雩傳曰早十六年秋大雩十七年秋
九月大雩傳曰早十八年秋八月大雩傳曰早昭三年秋八
月大雩傳曰早六年九月大雩傳曰早八年秋大雩十
六年秋九月大雩傳曰早二十四年秋八月大雩傳曰
早二十五年秋七月上辛大雩季辛又雩傳曰秋書再

雩旱甚定元年秋九月大雩七年秋大雩九月大雩十
二年秋大雩雩二十一年夏大旱宣七年秋大旱莊三
十一年冬不雨雩二年冬十月不雨三年正月不雨夏
四月不雨六月雨傳曰自十月不雨至于五月不曰旱
不為災文二年自十有二月不雨至于秋七月十年云
自正月不雨至于秋七月十三年云自正月不雨至于
秋七月是春秋之中不雨有七大旱有二大雩有二十
一都并有三十莊三十一年冬不雨以冬時旱氣以過
故不數雩二十一年夏大旱宣七年秋大旱二旱災成
政不數昭二十五年七月再雩祗是一旱之事為再雩
一雩不數定七年秋大雩亦一時之事而為二雩一雩
不數成七年冬大雩穀梁云冬無為雩明亦不數三十
之中去此六事不數唯有二十四在就二十四之中分
為四部桓五年秋大雩說雩禮是一部也雩二年冬十
月不雨雩三年正月不雨夏四月不雨說雩禮是二部
也文二年文十年文十三年皆云正月不雨至于秋七

月說早不為災是三部也此三部摠有七條於二十四
去七條餘有十七條說旱氣所由故鄭釋廢疾云春秋
凡書二十四旱考異鄭說云分為四部各有義焉是其
事也凡正雩在周之六月常事不書春秋大雩傳不云
旱者皆遇雩也傳言旱者皆為旱雩雩也雩書月者為
脩旱雩得禮故定元年穀梁傳曰雩月雩之正也秋大
雩非正也案玉藻云至于八月不雨君不舉注云建子
之月不雨盡建未乃始成災而雩二十一年夏大旱未
至建未而為災者若霧露濡壅中有苗雖歷時不為
災也文二年十年十三年自十二月正月不雨至秋上
月是也至八月不雨乃為災若無霧露濡壅中無苗
雖未至八月則為災故傳二十一年夏大旱是也穀梁說
云得雨曰雩不得雨曰旱公羊說言雩則早見言旱則
雩不見此二家之說不同鄭釋廢疾從穀梁之義雩之
與禱所以異者考異鄭說云天子禱九州山川諸侯禱
封內大夫禱所食邑又僖公三時不雨帥羣臣禱山川

以過自讓凡雩必先禱故此經云乃命百縣祈祀山川
百源始大雩帝是也禱者不雩信公二年冬十月及三
年春正月夏四月直為禱祭不
為雩以非雩月故不雩月令

孟春乃以元日祈穀

于上帝

謂以上辛郊祭天也春秋傳曰夫郊祀后稷以
祈農事是故政蠶而郊郊而後耕上帝大微之

帝也

疏曰案郊特牲云郊之用辛鄭注凡為人君當
齊戒自新又云郊之祭也迎長日之至鄭注引易說云

三王之郊一用夏正春分而日漸長故云迎長日之至
郊特牲云郊不言祈穀此經言祈穀不言郊鄭以為二

祭是一故此注謂以上辛郊祭天也鄭既以二祭為一
恐人為疑故引春秋傳以明之案襄七年左傳云孟獻

子曰郊祀后稷以祈農事也是故啟蟄而郊郊而後耕
彼祈農事者則此祈穀也彼云郊而後耕此是祈穀之

後即躬耕帝藉是祈穀與郊一也云上帝大微之帝者
春秋緯文紫微官為大帝大微為天庭中有五帝座即

是靈威仰赤熛怒曰招拒汁先紀含樞紐祈穀郊天之
時各祭所感之帝殷人則祭汁先紀周人則祭靈威仰
以其不定故摠云大微之帝若迎春之時前帝後王皆
祭靈威仰故前注云迎春祭蒼帝靈威仰特指一帝也
此郊雖祈穀亦是報天改郊特牲云
郊之祭也大報天而主日也月令

右五帝上帝之祀 季康子問於孔子曰舊聞五

帝之名而不知其實請問何謂五帝孔子曰昔丘

也聞諸老聃曰天有五行水火金木土分時化育

以成萬物

一歲三百六十日五行各主七十二日也化生長育一歲之功萬物莫敢不成

其神謂之五帝

五帝五行之神佐天生物者而後世識緯皆為之名字亦為妖怪妄

言古之王者易代而改號取灋五行五行更王終

始相生亦象其義

更古衡反王音旺下王天同法五行更王終始相生始以木

德王天下其次以生之行轉相承而諸說乃謂五精之帝下生王者其為義或無可言者故其

生為明王者而死配五行是以太皞配木炎帝配

火黃帝配土少皞配金顓頊配水康子曰太皞氏

其始之木何如孔子曰五行用事先起於木木東

方萬物之初皆出焉是故王者則之而君以木德

王天下其次則以所生之行轉相承也

木生火火生土之屬

康子曰吾聞勾芒為木正祝融為火正蓐收為金正玄冥為水正后土為土正此五行之主而不亂稱曰帝者何也孔子曰凡五正者五行之官名五行佐成上帝而稱五帝太皞之屬配焉亦云帝從

其號

天至尊物不可以同其號亦兼稱上帝上得包下五行佐成天事謂之五帝以地有五行

而其精神在上故亦為之上帝黃帝之屬故亦稱帝蓋從天五帝之號故王者雖號稱帝而不得稱

天帝而曰天子者蓋天子與天其尊卑相去遠矣曰天王者事乃天下之王也昔少皞氏

之子有四叔曰重曰該曰脩曰熙實能金木及水

使重為勾芒該為蓐收脩及熙為立冥顓頊氏之

子曰黎為祝融共工氏之子曰勾龍為后土此五

者各以其所能業為官職

各以一行之官為職業之事

生為上

公死為貴神別稱五祀不得同帝

五祀上公之神故不得稱帝也

其序則五正不及五帝五帝不及天地而不知者以祭祀為祭地不亦失之遠矣且土與火水俱為五行是地之子也以子為母

不亦顛倒失尊卑之序也

康子曰陶唐有虞夏

后殷周獨不得配五帝意者德不及上古耶將有

限乎孔子曰古之平治水土及播殖百穀者衆矣

唯勾龍兼食於社

兼猶配也

而棄為稷神易代奉之無

敢益者明不可與等故自太皞以降逮于顓頊其

應五行而王數非徒五而配五帝是其德不可以

多也

家語五帝

孔子曰誦詩三百不足以一獻一獻

之禮不足以大饗大饗之禮不足以大旅大旅具

矣不足以饗帝

誦詩三百喻習多言而不學禮也大旅祭五帝也饗帝祭天

毋

輕議禮

謂若誦詩者不可以強言禮疏曰此一節明禮之為貴貴於衆事誦詩三百不足

以一獻者假令習誦此詩雖得三百篇之多若不學禮此誦詩之人不足堪為一獻之祭言一獻祭

羣小祀不學禮則不能行也一獻之禮不足以大饗者言雖習一獻小祀其禮既小不堪足以行大饗之禮大饗謂祫祭宗廟也大饗之禮不足以大饗者大饗其禮雖繁仍是去人不遠其禮可知大旅雖摠祭五帝天與人道隔其禮轉難故雖能行大饗之禮不堪足以行大旅事天大旅具矣不足以饗帝者大旅雖摠祭五帝是有故而祭其禮簡略不如饗帝正祭之備故云大旅具矣不堪足以正饗天帝謂郊祭天也故典瑞云四圭有邸以祀天旅上帝是配天重於旅帝又郊特牲云郊之祭大報天而主日是郊為祭天之重毋輕議禮者若不學於禮無得輕脫論議於禮猶如誦詩三百篇不能行小祀禮也又曰知大旅祭五帝有樂典瑞云兩圭有邸以祀也旅四望與上四圭有邸以祀天旅上帝其文相對祀地云旅四望則知上云旅上帝是旅五帝也云饗帝祭天者經既云大旅又云

饗帝是饗帝與大旅不同故知此饗帝是常祀祭天也鄭瓦云祭天則感生之帝與圓丘俱包之也

禮

惟聖人為能饗帝

謂祭之能使之饗也帝天也疏曰惟聖人

為能饗帝者以饗帝為難惟聖人能之祭義

易曰王用享于帝吉

川伊

先生曰六二虛中求益亦有剛陽之應而以未居未疑從益之本固也故戒能常永貞固則吉也王用饗于帝吉如二之虛中而能永貞用以饗上帝猶當獲吉况與人接物其意有不通乎求益於人有不應乎祭天子之事故云王用也易益卦

天子親耕粢盛秬鬯

以事上帝

梁音咨秬音巨是不義而富且貴

言無事而居位食祿疏曰天子親耕粢

威秬鬯以事上帝者梁小宰注云天地大神至尊不祿此祭上帝有秬鬯者凡鬯有二若和之以鬱

謂之鬱鬯鬱人所掌是也祭宗廟而灌也若不和鬱謂之秬鬯鬯人所掌是也謂五齊之酒以秬黍為之以芬芳調暢故言秬鬯故得以事上帝大宗伯云湛玉鬯者謂饗大鬼也棫櫟詩云奉璋峨峨者謂據祭宗廟也故與此不同也
季冬之月命太史次諸侯

之列賦之犧牲以共皇天上帝社稷之饗

共音恭下同

此所與諸侯共者也列國有大小也賦之犧牲大者出多小者出少饗獻也疏曰列次也來歲方

祭祀須攝牲犧牲出諸侯之國國有大小故命

太史書列之以共賦也諸侯同王南而尊王之土

故命之出牲以與王共事天地也既漫言諸侯則同姓異姓皆然也賦之犧牲者賦稅出也次之隨

國大小出之也以共皇天者賦牲所共也皇天上帝也上帝者靈威仰五帝也社稷者王之社

搜也諸侯乃自有社稷而始封亦割王社上與之故賦牲共王社稷也享饗也出牲以共獻於上帝諸神也凡在天下九州之民者無不咸獻其力以共

皇天上帝之祀

民非神之福不生雖有其邦國采地此賦要由民出疏曰雖有其

邦國采地此賦要由民出者有邦國謂諸侯有采地謂卿大夫賦稅所求皆由民出必由民者以經中云天下九州之民不云諸侯卿大夫獨云民故鄭云此也月令季夏命四監

大合百縣之秩芻以養犧牲令民無不咸出其力

四監主山林川澤之官百縣鄉遠之屬地有山林川澤者也秩常也百縣給國養犧牲之芻多少有常民皆當出力為父之今月令四為田為于偽反下為民同疏曰桑周禮有山虞澤虞林衡川

衡之官秩芻出於山林又季冬云乃命四監收秩薪柴薪柴亦出於山林川澤云百縣鄉遂之屬地有山林川澤者知百縣非諸侯而云鄉遂之屬以其取芻養牲不可大遠故知是畿內鄉遂仲夏云乃命百縣雩祀百辟卿士者兼外內諸侯也此云鄉遂之屬者不兼公卿大夫之采邑秩常釋古文監大合秩芻義亦通也

以共皇天上帝以為民

祈福

牲以供祠神靈為民求福明使民父芻是不虛取也皇天北辰耀魄實冬至所祭於圓丘

也上帝太微五帝疏曰為民求福者雖是尋常事神因事神之時為民祈福云是不虛取者若不為民祈福浪使民父芻是在上虛取民力今還祈福與民民皆蒙福是不虛取民力從使之也云上帝太微五帝者案周禮司服云昊天上帝鄭以為昊天上帝祇是一神北極耀魄實也知此皇天上

帝不祗是禋魄實之上帝為太微者以周禮司服云祀昊天上帝大裘而冕祀五帝亦如之既別云五帝故知昊天上帝亦唯一神此月令皇天上帝之下更無別五帝之文故分為二月令

仲秋命宰祝循行犧牷視全具案芻豢瞻肥瘠察

物色必比類量小大視長短皆中度五者備當上

帝其饗

於鳥獸肥充之時宜省羣牲也宰祝大宰

於祝主祭祀之官也養牛羊曰騶犬豕曰豮豨者謂所視也所案也所瞻也所察也所量也此皆得其正則上帝饗之上帝饗之而無神不饗

也大音泰疏曰此月鳥獸肥充因宜省視故命之循行犧牷以下之事也視全具者亦宰祝所

視也下皆然王肅云純色曰犧體完曰全食草曰芻食穀曰豢皆案行之也瞻肥瘠者瞻亦視也肥

充也瘠瘦也察物色者物色騂黝之別也周禮陽
祀用騂陰祀用黝望祀各以其方之色也必比類

者已行故事曰比品物相隨曰類五方本異其色
是比也太皐配東亦用青是其類也量小大者大

謂牛羊豕豕成牲者小謂羔豚之屬也視長短者謂
天地之牛角繭栗宗廟之牛角握之屬也五者備

當上帝其饗者上帝天也若事事當法則天神饗
之也又曰案周禮大宰職祀五帝則掌百官之誓

戒及執事祗滌濯及納亨贊王牲事故鄭知此視
牲由大宰云養牛羊曰芻犬豕曰豢者案充人云

祀五帝繫于牢芻之三月是牛羊曰芻案樂記云
豢豕為酒周禮攝人云掌豢祭祀之犬是犬豕曰

豢月令
牲孕祭帝弗用
是擴者誠懇未有牝牡之情

易曰婦孕不育疏曰此易漸卦九三爻辭
引之者證經孕是懷任之意也郊特牲

聖

人亨以享上帝

亨者鼎之所為也革去故鼎成新故為亨伊川先生曰

以木巽火以木從火所以烹飪也鼎之為器生人所賴至切者也極其用之大則聖人亨以享上帝

聖人古之聖王也易鼎卦

先王以作樂崇德殷薦之上帝

以配祖考

伊川先生曰陽始潛閉地中及其動則出地奮震也始開鬱及奮發則通暢和

豫故為豫也坤順震發和順積中而發於聲樂之象也先王觀雷出地而奮和暢發於聲之象作樂

樂以獲崇功德懋其殷威至於薦之上帝推配之以祖考殷威也禮有殷奠謂威也薦上帝配祖考威

之至也易豫卦

周公宗祀文王於明堂以配上帝

經

注疏見下郊祀條

魯人將有事於上帝必先有事於頻

宮

類本或為泮音判上帝周所郊祀之帝謂蒼

同先有事於類宮告后稷也告之者將以配天先

仁也類宮郊之學也詩所謂類宮也字或為郊宮

明相見有積漸之義有事於上帝必先有事於類宮者

有事於類宮之中告后稷告以將配天也是先告

卑然後祭尊也又曰上帝周所郊祀之帝謂蒼帝

靈威仰也者存經云郊祀后稷以配天喪服小記

云王者禘其祖之所自出以其祖配之周人出自

靈威仰則后稷配靈威仰也云魯以周公之故得

郊祀上帝與周同者明堂位云配帝于郊配以后

稷天子之禮故知也云先有事於類宮告后稷也

者魯人無后稷之廟今將祭天而於類宮告后稷

也云將以配天先仁也者謂將欲以后稷配天先

以仁恩存偶之也云類宮郊之學也者周人立太

學於東郊魯侯太學在公宮東也小學在郊詩云思樂泮水傳采其藻則魯以小學為類官類官在

郊天子亦以小學為辟廋故鄭駁異義云三靈一廋在郊明矣禮器桓公五年

秋大雩左氏傳曰書不時也傳例云十二公傳唯此年及襄二十六年

有兩秋此發雩祭之例欲顯天凡祀啓蟄而郊言時以指事故重言秋異於凡事

祀通下三句天地宗廟之事也龍見而雩龍見建啓蟄夏正建寅之月祀天南郊

蒼龍宿之體皆見東方萬物始成待雨而大故祭天遠為百穀祈膏雨始殺而嘗建

之月陰氣始殺嘉穀閉蟄而烝建亥之月昆蟲閉始熟故薦嘗於宗廟閉蟄而烝戶萬物皆成可薦

者衆故烝祭宗廟釋例論之備過則書下日有吉矣已上疏見祭統時日條否過次節

則書以譏慢也 疏曰祭必當卜不吉則改卜次旬故不可期以一日卜不過三故限以一月過涉

次日之節則書以譏其慢

定公元年九月大雩穀梁子曰雩

月雩之正也秋大雩非正也冬大雩非正也秋大

雩之為非正何也

冬禾稼既成猶雩則非禮可知秋禾稼始苗嫌當須雨故問也

毛澤未盡人力未竭未可以雩也

師曰凡地之所生者謂之毛公

羊傳曰錫之不毛之地是也言秋百穀之潤澤未盡也人力未盡謂耕耘之功未訖 疏曰言非必

百穀至而雩祀之設本為求雨求雨之意指為祈穀故周頌噫嘻之篇歌春夏而同名至於修雩祀

不異故此傳言毛澤未窮人力未竭言人力之功施於種植種種之義在于禾黍未聞凡品摠稱曰

毛將何所據解聖人之於四海不偏一物愛人之
情特深懷抱百姓所恃莫急於食食雖民天天不
降雨嘉品不育時澤之來普汎無私雖非百穀亦
沾有滄之潤公田已流遂反之惠彌遠故抱凡品
為毛明天德之道廣列子言山川之毛指謂草木
公羊所論非專禾麥寒涼之地本不種苗鄒衍吹
律乃始名生物謂之黍若以此言之公羊所言不
毛鄒衍之前當鄭伯與楚語時也又上傳云冬大
雩非正也秋亦曰非正也非正是同而問不異及
答之直釋月雩為正則四月龍見常失正故也解
成七年冬大雩傳曰冬無為雩也言用禱禮明禾
稼成不須雩失時不二故問同而答異注當須雨
其解也聖人重謝請請必為民氏之本務在於春
夏春夏祈穀先嚴其儀牲具其器物謹脩其禮冀
精神有感故一時盡力專心求請求請不得失時
時謂孟夏之節是月有雨先種得成茂實後種更

生故重其二時時過以往至於八月九月脩雩之節不言四月非正也故曰是月不雩則無及矣謂八月求雨雩而得之則書雩明有所及故也是月雩不必有雨而曰無及者人情之意欲其有益故以兩月請是年不艾則無食指謂九月之雩雩而得雨是年有食雩不得雨則書旱旱則一歲無食故曰是年傳於仲秋言月季秋言年年月之情以表遠近深淺之辭也 雩月雩之正

也月之為雩之正何也其時窮人力盡然後雩雩之正也何謂其時窮人力盡是月不雨則無及矣是年不艾則無食矣是謂其時窮人力盡也雩之必待其時窮人力盡何也雩者為旱求者也求者

請也古之人重請何重乎請人之所以為人者讓也請道去讓也則是舍其所以為人也是以重之

焉請哉請應乎上公古之神人有應上公者通乎

陰陽君親帥諸大夫道之而以請焉

道之謂君必為先也其禱

辭曰方今大旱野無生稼寡人當死百姓何依不敢煩民請命願撫萬民以身塞無狀禱亦請也此

即請辭也疏曰案月令大雩帝此言大雩文與月令同同祀五帝帝天也而曰上公義更何取且

雩與禱本自不同而引禱辭以證雩何解天子雩上帝諸侯雩上公魯與天子同雩上帝上帝既雩

雩及百辟卿士有筮於民者即此傳所謂古之神人通乎陰陽使為民請雨故言請哉請應乎上公

天尊不敢指斥改請其屬神考異郵說僖公三時
不雨禱于山川以六過自責又曰方今大旱野無
生稼此注所云其禱辭或亦用之改引以明之耳
夫請者非可詒託而往

也必親之者也是以重之

詒託猶假寄

成公七年冬

大雩穀梁子曰雩不月而時非之也冬無為雩也

疏曰傳例云月雩正也時雩非正也非正者其時未窮人力未盡毛澤已竭不雩則不及事故月以

明之則經書秋八月雩九月雩是也既過此節秋不書旱則冬無為雩也故鄭釋廢疾去冬及春夏

祭春秋說考異郵三時唯有禱禮無雩祭之事唯四月龍星見始有常雩耳故因載其禱請山川解

云方今天旱野無生稼寡人當死百姓何依不脫煩民詣命願撫萬民以身塞無狀是鄭意亦以不

願霄唯有
禱請而已

因天事天因地事地因名山升中于天

名猶大也升上
也中猶成也謂

巡守至於方嶽燔柴祭天告以諸侯之成功也存經說
曰封乎泰山考績燔燎禪乎梁甫刻石紀號也上時

掌反守手又反燎力妙反又力弔反禪善戰反疏曰
因名山升中于天者此還因天事天但事天非在一所

此謂封禪之時中成也謂天子巡守至方嶽之下因此
有名之大山升進諸侯成功之事以告于天又曰大山

謂方嶽也巡守至於方嶽燔柴祭天告以諸侯之成功
也此謂封禪也太平乃封禪其封禪必因巡守而為之

者未太平但巡守而已其未太平巡守之時亦燔柴以
告至故王制說天子巡守必先祭若太平巡守之時初

到方嶽亦燔柴告至之後乃考諸侯功績又封土為壇
更燔柴祭天告諸侯之成功也此唯泰山為之餘嶽則

否其巡守則每獄皆至也而皇氏云太平乃巡守案詩
頌時邁巡守告祭采望時邁武王之詩而有巡守之禮
武王未太平何得云太平乃巡守其義非也云存經說
曰至刻石紀號皆孝經緯文也封乎泰山者謂封土為
壇在於泰山之上考績燔燎者謂考諸侯功績燔柴燎
牲以告天禪乎梁甫者禪讀為埤謂除地為埤在於梁
甫以告地也梁甫是泰山之旁小山也刻石紀號也者
謂刻石為文紀錄當代號謚崇白虎通云王者易姓而
起必升封泰山何告報之義所以必於泰山何萬物之
所交代之處也必於其上何因高告高順其類故升封
者增高也下禪梁甫之基廣厚也刻石紀號者皆已之
功迹以自勸也增泰山之高以報天附梁甫之基以報
地或曰封者金泥銀繩或曰石泥金繩封之印璽故孔
子曰封泰山觀易姓而王可得數者七十有餘三皇禪
於繹繹之山五帝禪於亭亭之山三王禪於梁甫之山
繹繹無窮之意禪于有德者而居之無窮已亭亭者制

度審諦道德皆明梁甫者梁信也甫者輔也信輔天地之道今案書說禪者除地為禪而白虎通曰以禪讓有德其義非也案史記封禪書齊桓公欲行封禪管仲諫正辭云自古封禪七十二家夷吾所識于有二焉昔有無懷氏封泰山禪云云伏羲氏封泰山禪云云神農炎帝黃帝顓頊帝嚳堯舜禹湯周成王皆封泰山唯禹禪會稽成王禪社首其餘皆禪云云者亦泰山旁小山名也但白虎通與史記禪處不同未知孰是也白虎通又云王所以巡守何巡者循也守者收也謂循行天下收人道德太平有遠近不同政化幽隱有不得其所者故必自行之謹敬重民之至也熊氏云
因吉土以饗帝于
太平乃巡守其義非也已難於上

郊 吉土王者所卜而居之土也饗帝於郊以四時所兆祭於四郊者也今漢亦四時迎氣其禮則簡疏曰

因吉土以饗帝于郊者此謂祭五方之帝因其所卜吉土以為都饗祭五方之帝於都之四郊又曰饗帝於郊

以四時所祀祭於四郊者也謂木帝於東郊火帝於南郊金帝於西郊水帝於北郊土帝亦於南郊又王者各祭感生之帝於南郊故小宗伯云禮器郊之祭大報天而兆五帝於四郊謂此也

主日配以月

主日者以其光明天之神可見者莫著焉疏曰郊之祭者謂夏正郊天大報天者

謂於此郊時大報天之衆神雖是春祈天生養之功大故稱大報天而主日配以月者謂天無形體縣象著明不過日月故以日為百神之主配以月自日以下皆祭特言月者但月為重以對日耳蓋天帝獨為壇其日月及天神等共為一壇故曰祭義有虞氏禘黃帝而郊嚳得為衆神之主也

夏后氏禘黃帝而郊鯀殷人禘嚳而郊冥周人禘嚳而

郊嚳

嚳口毒反禘郊謂祭祀以配食也此禘謂祭昊天於圓丘也祭上帝於南郊曰郊有虞氏以上尚

德配用有德者自夏以下稍用其姓代之先後之次有虞氏夏后氏宜郊顓頊殷人宜郊契契息列反疏

曰此一經論有虞氏以下四代郊禘所配之人有虞氏禘黃帝者謂虞氏冬至祭昊天上帝於圓丘大禘之時

以黃帝配祭而郊嘗者謂夏正建寅之月祭感生之帝於南郊以嘗配也夏后氏以下禘郊之義亦然但所配

之人當代各別詳見祭法注疏郊之祭迎長日之至疏曰先儒說郊

證論以天體無二郊即圓丘圓丘即郊鄭氏以為天有六故丘郊各具今具載鄭義兼以王氏難鄭氏謂天有

六天為至極之尊其體祇應是一而鄭氏以為六者指其尊極清虛之體其實是一論其五時生育之功其

別有五以五配一故為六天據其在上之體謂之天為體稱故說文云天顓也因其生育之功謂之天帝為

德稱也故毛詩傳云審諦如帝故周禮司服云王祀昊天上帝則大裘而冕祀五帝亦如之五帝若非天何為

同服大裘又小宗伯云兆五帝於四郊禮器云饗帝於郊而風雨節寒暑時帝若非天焉能令風雨節寒暑時又春秋緯紫微宮為大帝又云北極耀魄寶又云大微宮有五帝坐星青帝曰靈威仰赤帝曰赤熛怒白帝曰白招拒黑帝曰汁光紀黃帝曰含樞紐是五帝與天帝六也又五帝亦稱上帝故存經曰嚴父莫大於配天則周公其人也下即云宗祀文王於明堂以配上帝帝若非天何得云嚴父配天也而賈逵馬融王肅之等以五帝非天唯用家語之文謂太皞炎帝黃帝五人帝之屬其義非也又先儒以家語之文王肅私定非孔子正旨人王肅以郊丘是一而鄭氏以為二者祭大宗伯云蒼璧禮大典瑞人云四圭有邸以祀天是玉不同宗伯又云牲幣各放其器之色則牲用蒼也祭法又云燔黍於泰壇用騂犢是牲不同也又大司樂云凡樂圜鍾為宮黃鍾為角太簇為徵姑洗為羽冬日至於地上之闕止奏之若樂六變則天神皆降可得而禮矣上文云乃奏

黃鍾歌大呂舞雲門以祀天神是樂不同也故鄭以云蒼璧蒼璣圓鍾之等為祭圓丘所用以四圭有邸駢犢又奏黃鍾之等以為祭五帝及郊天所用王肅以郊特牲周之始郊日以圭與圓丘同配以后稷鄭必以為異闕丘又以帝嚳配者鄭以周郊日以至自是魯禮故注郊特牲云周衰禮廢儒者見周禮盡在魯因推魯禮以言周事鄭必知是魯禮非周郊者以宣三年正月郊牛之口傷是魯郊用日至之月祭周郊祭天大裘而冕郊特牲云王被裘戴冕璆十有二旒故知是魯禮非周郊也又知圓丘配以帝嚳者案祭法云周人禘嚳而郊稷禘嚳在郊稷之上稷卑於嚳以明禘大於郊又爾雅云禘大祭也大祭莫過於圓丘故以圓丘為禘也圓丘此郊則圓丘為大祭法云禘嚳是也若以郊對五時之迎氣則郊為大故大傳云王者禘其祖之所自出故郊亦稱禘其宗廟五年一祭比每歲常祭為大故亦稱禘也以爾雅唯云禘為大祭是文各有所對也后稷配天見

於周頌故思文云思文后稷克配彼天周若以譽配圓
丘詩頌不載者后稷周之近祖王業所基故配感生之
帝有勤功用故詩人頌之譽是周之遠祖為周無功徒
以遠祖之尊以配遠尊上帝故詩無歌頌或可詩本亦
有也但後來遺落故正考甫得商之遺頌十二篇至孔
子之時唯五篇而已以此言之明詩有遺落也皇氏云
天有六天歲有八祭冬至圜丘一也夏正郊天二也五
時迎氣五也通前為七也九月大饗八也霄與郊禘為
祈祭不入數崔氏以霄為常祭凡祭天其服皆大
裘周禮司服云其尸服亦大裘故節服氏云郊祀裘冕
送逆尸是也其樂除圓丘所用圜鍾為官之外皆奏黃
鍾歌大呂舞雲門故大司樂云乃奏黃鍾歌大呂以祀
天神注云天神謂五帝及日月星辰也其玉圓丘用蒼璧
正月祀其所受命之帝於南郊是也其玉圓丘用蒼璧
夏正郊天用四圭有邸其五時迎氣東方用青圭南方
用赤璋西方用白琥北方用玄璜其中央無文先師以

為亦用黃琮熊氏以為亦用赤璋鄭注宗伯云璧圓象
天琮八方象地圭琬象春物初生半圭曰璋象夏物半
死琬猛象秋嚴半璧曰璜象冬月閉藏地上無物唯天
半見其牲幣各放其玉之色黍天色玄而用蒼犢者但
天色雖玄遠望則蒼取其遠色故用蒼也其祭天之器
則用陶匏陶瓦器以薦醑醑之屬故詩生民之篇述后
稷郊天云于豆于登注云木曰豆瓦曰登是用薦物也
匏酌獻酒故詩大雅公劉云酌之用匏注云儉以質
祭天尚質故酌以用匏為尊皇氏云祭天用宗廟犧尊
皇氏又云祭天既用犧尊其陶匏者是臧牲牢之器今
樂陶匏所用如上所陳而皇氏以匏為臧牲牢之器義
無此理其說非也其祭天之處冬至則祭於圜丘圜丘
所在雖無正文應從陽位當在圜南故魏氏之有天
營委粟山為圜丘在洛陽南二十里然則周家亦在國
南但不知遠近者其五時迎氣則在四郊故小宗伯云
兆五帝於四郊鄭云春迎青帝於東郊夏迎赤帝於南

郊季夏迎黃帝亦於南郊秋迎白帝於西郊冬迎黑帝於北郊司馬法百里遠郊鄭注書序云近郊半遠郊去國五十里也其夏正祭感生之帝亦於南郊知者存經緯云祭帝於南郊就陽位是也其雩祭五天帝亦於國城南郊鄭注論語云沂水在魯城南雩壇在其上是也其九月大饗五帝則在明堂鄭駁異義云明堂在國之丙己之地三里之外七里之內其圜丘之祭崔氏云其初先燔柴及牲玉於丘訖次乃埽立下而設正祭若夏正及五郊初則燔柴及牲玉於壇故祭法云燔柴於泰壇祭天也次則於壇下埽地而設正祭故禮器云至敬不壇埽地而祭是也其所配之人虞夏商周用人各異文具祭法圜丘之祭周人以魯配之祭法禘嘗是也其感生之帝則以后稷配之五時迎氣及雩祭則以五方人帝配之九月大饗五帝則以五人帝及文武配之以文王配五天帝則謂之祖以武王配五人神則謂之宗

崔氏云皆在明堂之上祖宗通言故祭法云祖文王文王稱祖存經云宗祀文王於明堂是文王稱宗文王既闕則武王亦有祖宗之號故云祖宗通言其祭天之樂皆用雷鼓故鼓人云以雷鼓鼓神祀是也其間丘之祭皇氏云祭日之旦王立丘之東南西嚮燔柴及牲玉於丘上升壇以降其神故韓詩內傳云天子奉玉升柴加於牲上詩又云至璧既卒是燔牲玉也次乃奏圜鍾之樂六變以降其神天皇之神為尊故有再降之禮次則埽地而設正祭置簋璧於神坐以禮之其在先燔者亦簋璧也次則以豆薦血腥祭天無裸故鄭注小宰云唯人道宗廟有裸天地大神至尊不裸莫稱焉然則祭天唯七獻也故鄭注周禮云大事于太廟備五齊三酒則圖丘之祭與宗廟恰同則踐王酌泛齊以獻是一獻也后無祭天之節大宗伯次酌醴齊以獻是為二獻也王進爵之時皆奏樂但不皆六變次薦孰王酌盞齊以獻是為三獻也宗伯次酌醴齊以獻是為四獻也次尸食

之訖王酌朝踐之泛齊是為五獻也又次宗伯酌饋食之醴齊以獻是為六獻也次諸臣為賓長酌泛齊以獻是為七獻也以外皆加爵非正獻之數其尸酢王以清酒酢宗伯以昔酒酢諸臣以事酒其祭感生之帝則當與宗廟禘祭同唯有四齊無泛齊又無降神之樂唯燔柴升煙一降神而已王朝踐獻以醴齊宗伯亞獻以盞齊次饋孰王獻以醴齊宗伯又獻以沈齊尸食訖王獻以朝踐之醴齊宗伯獻以饋食之沈齊諸臣為賓長亦獻以沈齊不入正數其五時迎氣與宗廟時祭同其燔柴以降神及獻尸與祭感生之帝同但二齊醴盞而已諸臣終獻亦用盞齊從上至此皆皇氏所說皇氏以周丘之祭賓長終獻不取沈齊而取泛者以禮運約之沈齊當在堂丘下不可用之故更上取泛齊衆禮運沈齊在廟堂之下尚得酌之升堂以獻又皇氏祭感生之帝及五時迎氣沈齊亦在壇下賓長皆得用之升壇以獻何為圓丘沈齊獨不可用乎若以圓丘高遠不可下取

沈齊凡齊泛醴為尊盎醴為卑賓長終獻祗可以次用
醍齊何得反用泛齊乎今謂圓丘賓長之獻用沈齊也
以其賓長是臣助祭終獻速下於君故從丘下酌沈齊
又崔氏云以清酒酢王昔酒酢后案司尊彝云皆有蠶
諸臣之所酢也鄭注云酌蠶以自酢不敢與王之神靈
共尊蠶咸三酒唯云諸臣所酢不云酢王酢后崔氏所
說於義疑也皇氏於此經之首廣解天地百神用樂委
曲及諸雜禮制繁而不要非此經所須又隨事曲解無
所憑據今皆略而不載其必有所須者皆於本經所須
處各隨而解之他皆倣此熊氏云四時迎氣及諸神小
祀等並有降神之樂則大司樂分樂而序之以迎長日
下降神正祭同用其樂亦是一義也郊特牲以迎長日
之至也

易說曰三王之郊一用夏正夏正建寅之月也此言迎長日者建卯而晝夜分而日長也

疏曰郊祭用夏正建寅之月意以二月建卯春分後日
長今正月建寅郊祭通而迎此長日之將至又曰此易

緯乾鑿度文必用夏正彼文云方此之時天地交萬物
通所以順四時法天地之道樂書傳云迎日謂春分迎
日也即引寅賓出日皆謂春分知此迎長日非春分者
此云兆於南郊就陽位若是春分朝日當在東郊故知
非也又下云帝牛不吉以為郊用辛周之始郊日以至
稷牛故知祭天非唯祭日也郊用辛周之始郊日以至
言日以周郊天之月而至陽氣新用事順之而用辛日
此說非也郊天之月而日至魯禮也三王之郊一用夏
正魯以無冬至祭天於圜丘之事是以建子之月郊天
示先有事也用辛日者凡為人君當齊戒自新耳周哀
禮廢儒者見周禮盡在魯因推魯禮以言周事疏曰
王肅用董仲舒劉向之說以此為周郊上文云郊之祭
迎長日之至謂周之郊祭於建子之月而迎此冬至長
日之至也而用辛者以冬至陽氣新用事故用辛也周
之始郊日以至者對建寅之月又祈穀郊祭此言始者
對建寅為始也鄭康成則異於王肅上文云迎長日之

至自據周郊此云郊之用辛據魯禮也言郊用辛日者取齊戒自新周之始郊日以至者謂魯之始郊日以冬至之月云始者對建寅之月天子郊祭魯於冬至之月初始郊祭示先有事故云始也又曰日以周郊天之月而至者謂日體以周郊天建子之月而南至云陽氣新用事順之而用辛日者以冬至一陽生故云新用事而用辛日云此說非也者謂日以周禮郊天之月而日至陽氣新用事此等之說非也謂董仲舒劉向而為此說所以非者案周禮冬至祭天圓丘不論郊也又此下云載冕璪十有二旒周禮祀昊天上帝則大裘而冕是服不同周禮玉路以祀天此下云乘素車是車不同也祭法云燔柴於泰壇用騂犢周禮蒼璧禮天牲從玉色是牲不同也爾雅曰非人為謂之丘泰壇則人功所作是圓丘與泰壇別也是知郊與圓丘所祭非一故云此說非也云郊天之月而日至魯禮也者言此經始郊日以至是魯國之禮必知魯禮者以明堂云魯君孟春乘

大路載弧觶折十有二旒日月之章祀帝于郊又雜記云正月日至可以有事於上帝故知冬至郊天魯禮也云三王之郊一用夏正者證明天子之郊必用夏正魯既降下天子不敢郊天與周同月故用建子之月而郊天欲示在天子之光而有事也但魯之郊祭師說不同崔氏皇氏用王肅之說以魯冬至郊天至建寅之月又郊是以祈穀故左傳云啓蟄而郊又云郊祀后稷以祈農事是二郊也若依鄭康成之說則異於此也魯唯一郊不與天子郊天同月轉卜三正故穀梁傳云魯以十二月下辛卜正月上辛若不從則以正月下辛卜二月上辛若不從則以二月下辛卜三月上辛若不從則止故聖證論馮昭引穀梁傳以答王肅之難是魯一郊則止或用建子之月則此云以至及宣三年正月郊牛之口傷是也或用建寅之月則春秋左傳云郊祀后稷以祈農事是也但春秋魯禮也無建丑之月耳若杜預不信禮記不取公羊穀梁魯唯有建寅郊天及龍見而雩云

周衰禮廢儒者見周禮盡在魯者欲見經文實是魯郊而為周事故云因推魯禮以言周事誤作周也從上說郊是周禮自此以下是魯禮為此周魯雖亂也秦聖證論王肅難鄭云郊特牲曰郊之祭迎長日之至下云周之始郊日以至立以為迎長日謂夏正也郊天日以至立以為冬至之日說其長日至於上而妄為之說又徒其始郊日以至於下非其義也立又云周良禮廢儒者見周禮盡在魯因推魯禮以言周事若儒者愚人也則不能記斯禮矣苟其不愚不得亂於周魯也鄭立以祭法禘黃帝及嚳為配圓丘之祀祭法說禘無圓丘之名祭周官圓丘不名為禘是禘非圓丘之祭也立既以祭法禘嚳為圓丘又大傳王者禘其祖之所自出而立又施之於郊祭后稷是亂禮之名實也案爾雅云禘大祭也釋又祭也皆祭宗廟之名則禘是五年大祭先祖非圓丘及郊也周立后稷廟而嚳無廟故知周人尊嚳不若后稷之廟重而立說圓丘祭天祀大者仲尼當稱昔者

周公禘祀營圓丘以配天今無此言知禘配圓丘非也
人詩思文后稷配天之頌無帝營配圓丘之文知郊則
圓丘圓丘則郊祭泰壇象圓丘之形以丘言之本諸天地之
性故祭法云燔柴於泰壇則圓丘也郊特牲云周之始
郊日以至周禮云冬至祭天於圓丘知圓丘與郊是一
也言始郊者冬至陽氣初動天之始也對啓蟄又將郊
祀故言始孔子家語云定公問孔子郊祀之事孔子對
之與此郊特牲文同皆以為天子郊祭之事始聖證論
之言王肅所據經傳分明鄭必別為其說者集聖證論
馬昭申鄭云易緯云三王之郊一用夏正則周天子不
用日至郊也夏正月陽氣始升日者陽氣之主日長而
陽氣盛故祭其始升而迎其盛月令天子正月迎春是
也若冬至祭天陰氣始成祭陰迎陽豈為理乎周禮云
冬日至祭天於地上之圓丘不言郊則非祭郊也言凡
地上之丘皆可祭為無常處故不言郊周官之制祭天

圖丘其禮王服大裘而冕乘玉路建大常明堂位云魯君以孟春祀帝于郊服衮服乘素車龍旂衣服車旂皆自不同何得以諸侯之郊說天子圖丘言始郊者魯以轉卜三正以建子之月為始故攝始也又禮記云魯君臣未嘗相弑禮俗未嘗相變而弑三君季氏歸八佾於泰山婦人璧而相弔儒者此記宜非亂乎據此諸又故以郊丘為別冬至之郊特為魯禮案聖證論王肅與馬昭之徒或云祭天用冬至之日或云用冬至之月據周禮似用冬至之日據禮記郊日用辛則冬至不恒在辛似用冬至之月案張融謹案郊與圖丘是一又引韓詩說三王各正其郊與王肅同又魯以轉卜三正王與鄭玄同周禮圖丘服大裘此及家語服衮冕家語又云臨燔柴脫衮冕著大裘象天臨燔柴輒祭脫衮冕著大裘象天恭敬之義既自不通是張融以家語及此經郊祭並為魯禮與鄭玄同融又以為圖丘是祭皇天孟春祈穀于上帝以龍見而掌此五帝之享並是皇天之佐其

實天也融又云祀天神率執事而卜日圓丘既卜日則不得正用冬至之日此是張融之說鄭此注云以建于

之月郊天用辛日者當齊戒自新如鄭此言是亦不用冬至日也但郊丘大事王鄭不同故略陳二家所據而

言之也案聖證論又異義皆同穀梁之義魯轉卜三正之內一郊則止而崔氏皇氏以為魯冬至郊天夏正又

郊凡二郊非鄭義也卜郊受命于祖廟作龜于禰宮受命謂告之退而卜疏

曰郊事既尊不敢專輒故先告祖後乃卜郊如受命也故禮器云魯人將有事於上帝必先有事於禰宮是也

作龜于禰宮者作灼也禰宮禰廟也先告祖受命又至禰廟卜之也卜之日王立于澤親

聽誓命澤澤官也所以擇賢之官也既卜必到澤官擇可與祭祀者因誓勅之以禮也禮器曰舉賢而

置之聚衆而誓之是也與如字一音預疏曰澤澤官也王在於澤官中於其官以射擇士故因呼為澤官也

王卜已吉又至澤官射以擇賢者為助祭之人故云王立于澤也禮器云舉賢而置之是也然王者獵在圓而主皮射亦在澤故鄭注鄉射記引尚書傳主皮射陳於澤然後卿大夫相與射也又云嚮之取也於國中勇力之取也今之取也於澤官揖讓之取也澤習禮之處親聽誓命者因於澤官中又使有司誓勅舊章齊戒之禮王又親聽受命故禮器獻命庫門之內戒百官大廟之云聚眾而誓之是也

獻命庫門之內戒百官大廟之

內戒百姓

王自澤官而還以誓命重相申勅也庫門在雉門之外入庫門則至廟門外矣大廟祖廟

也百官公卿以下也百姓王之親也入廟戒親親也王自此還齊路寢之室庫或為廡還音旋重直用反

疏曰王目澤官而還至欽致齊之時有司獻王所以命百官之事王乃于庫門之內戒百官大廟之內戒百姓百官疏故在公朝重戒之百姓王之親屬故在大廟而重戒之又曰以上有百官之文故以百姓為王之親也

王親謂之百姓也者皇氏云姓者生也並是王之先祖所生云王自此還齊路寢之室者卜法必在祭前十日

祭義云散齊七日致齊三日又云七日戒百官百姓則祭前云王自此還齊路寢之室則此經戒百官百姓則祭前

三日欲致齊之時以誓命重相申勅也祭之日王皮弁以聽祭報也報猶白

朝服以待白祭事者乃後服祭服而行事也周禮祭之日小宗伯逆筭省鑊告時于王告備于王也疏曰祭

之日王皮弁以聽祭報者報白也郊日之朝天子早起皮弁服以聽之小宗伯告日時早晚及牲事之備具也

未郊故未服大裘而且服日視朝之服也引周禮者證小宗伯既有告事王皮弁聽之是也喪者不

哭不敢凶服浥埽反道鄉為田燭浥芳餽反本亦作汎埽素報反謂郊道

之民為之也反道剗令新土在上也田燭田首為燭也剗初產反又初展反令力呈反疏曰郊祭之旦人

之喪者不哭又不敗凶服而出以干王之吉祭也泥埽
反道者泥埽廣埽也反道剗路之土反之令新土在上
也郊道之民家家各當界廣埽新道也鄉為田燭者鄉
謂郊內六鄉也六鄉之民各於因首設燭照路恐王驚
郊之弗命而民聽上者化主嚴上者合結喪者不哭以下至此並非
早

王命而民化王嚴上故也然周禮蜡氏云凡國之大祭
祀令州里除不蠲禁刑者任人及凶服者以及郊野而

此云不命者蜡氏所云有司常事至郊祭之時王不施
命故云不命且作記之人威美民之聽上之義未必實

然也蜡氏云除不蠲及刑者祭之日王被袞以象天
任人等此不言者文不備也

日月星辰之章此魯禮也周禮王祀昊天上帝則服大
裘而冕祀五帝亦如之魯侯之服自袞冕而下也疏

曰當祭之日王被袞冕袞冕有日月星辰以象天也又
曰此明被袞象天明堂位云日月之章故袞有日月星

辰也與周不同故云此魯禮也引周禮以下者證王禮與魯禮不同云魯侯之服自衮冕而下也者證魯侯得用衮冕故經云衮也魯公得稱王者作記之人既以魯禮而為周郊遂以魯侯而稱王也皇氏云魯用王禮故稱王或亦戴冕璪十有二旒

古之大數不過十二反疏曰首戴衮冕

其璪十有二旒法則天數也

乘素車旂十有二旒龍章而設日月以

象天

設日月畫於旂上素車殷路也魯公之郊用殷禮也疏曰乘素車者乘殷之朴素之車貴其象天

之質也所建之旂十有二旒畫為龍章而設日月以象天也者旂十有二旒象天數十二也龍為陽氣變化日月以先照下皆是象天也又曰明堂位云大路殷路也乘路周路也又此上文云大路繁纓一就此云乘素車故知殷路也云魯公之郊用殷禮也者公羊傳云周公

用白牡魯公用駟剛周公既用殷之白牡故知用殷禮

也

兆於南郊埽地而祭器用陶匏

觀天下之物無可反稱其德稱尺證

疏曰燔柴在壇正祭於地故云埽地而祭陶謂瓦器謂酒尊及豆簋之屬故周禮瓊人為簋匏謂酒爵此等

已具解於上

特牲

疏曰郊所以用特牲者郊謂於南郊祭感生之帝但天神至尊無物可稱故用

特牲郊與配坐皆特牲故下文云養牲必養二帝牛不吉以為稷牛又召誥云用牲于郊牛二是也然祭天初

有燔燎後有正祭皆須有牲故大宗伯云實柴祀日月星辰鄒司農云實牛柴上也鄒康成云實牲體焉郊唯

特牲得供燔燎正祭二處所用者熊氏等以為分牲體供二處所用其實一特牲也而月令郊禘用太牢

者彼是求子之祭不與常祭同故不用犢我將祀文王於明堂經云雖羊雖牛者據文武配祭得用太牢也若

孔安國之義后稷配天亦用太牢故召誥云后稷貶於天有羊豕粢羊人云粢積共其羊牲注云積積柴則祭

天用羊者熊氏云謂祭日月以下故燔燎用羊也祭日月以下既用羊小司徒云凡小祭祀奉牛牲鄭注云小祭祀王玄冕所祭然則王者之祭無不用牛又禮緯云六宗五嶽四清之牛角尺則日月以下之祀皆用牛者蓋日月以下常祀則用羊王親祭則用牛故小司徒注云玄冕所祭據王親祭也此郊特牲指用而言故下文云用騂犢故牧人云陽祀用騂牲毛之注云陽祀祭天於南郊及宗廟以此約之夏殷以上祭感生之帝各用其正之色其迎五方之帝其牲上已備陳帝牛稷牛其牲雖異其色宜同凡配祭之人牲與天同色也其四月大雩九月大饗其元及配人其牲各依當方之色其文武汎配則用大牢其牲色無文周人尚赤當用騂也論語云敢用玄牡敢昭告于皇皇后帝注云帝謂大微五帝用玄牡者彼謂告祭也其四鎮五嶽之等各用當方之色故牧人云望祀各以其方之色牲毛之若尋常山川時祭以下則用純物不隨四方之色若國外表貉獮

稷之等則用雞色故牧人云凡時祀之牲則用牲物凡外祭毀事用鳧可也其常祀之牲則皆用牡祈禱之祭或用北唯孟春祭之故月令孟春犧牲無用牝其日月以下及五祀之享常祀用羊王親祭則用牛具如前說

牲用騂用犢

尚赤者周也

帝牛不吉以為稷牛

養牲必養二也疏曰郊

天既以后稷為配故養牲養二以擬祭也若帝牛不吉或死傷以為稷牛者為猶用也為用稷牛而為帝牛其祭稷之牛臨時別取牛用之又曰祭春秋宣三年正月郊牛之口傷皮卜牛牛死乃不郊公羊云曷為不復卜養牲養二卜帝牲不吉則扳稷牲而卜之何休云先卜帝牲養之有災更引稷牲卜之以為天牲養之凡當二卜爾復不吉則止不郊帝牛必在滌三月稷牛唯具

滌音迥又徒嘯反滌牢中所

搜除處也唯具遭時又選可用也疏曰帝牛必在滌三月稷牛唯具者此覆說上文帝牛不吉而取稷牛之

事以帝牛既尊必須在滌三月今帝牛不吉故取稷牛已在滌三月也其祀稷之牛臨時別取故云稷牛唯具天神既尊故須在滌人鬼稍卑唯具而已是分別天神與人鬼不同又曰滌牢中所搜除者搜謂搜埽清除故周禮掌養馬者謂之瘦人云唯具遣時又選可用也者遣時謂帝牲遭災之時既取稷牲而用之其祀稷之牲臨時選其可者凡帝牲稷牲尋常初時皆卜取其牲繫於牢屬之三月若臨時有故乃變之也以上郊特牲

禘郊之事則有全胄

全胄全其牲體而升之也凡禘郊皆血腥也其王公立飫則半

解其體而升之大俎謂之房燕親戚燕饗則體解節折而升之謂之折俎亦謂之餽胄詳見國語周語

郊血

郊祭天也疏曰郊血者近者為褻遠者為敬其事非一今此先從鬼神之事而說也郊用擯擯有

血有肉肉於人食啗之事於人情為近血於人食啗最遠天神尊嚴不可近同人情故薦遠人情者以為極敬

也又曰知郊祭天者郊特牲云於郊故謂之郊是郊為祭天也詳見祭義又禮器

夏后氏祭

其閭殷人祭其陽周人祭日以朝及闇

闇昏時也陽讀為曰雨曰陽之

陽謂日中時也朝日出時也夏后氏大事以昏殷人大事以日中周人大事以日出亦謂此郊祭也以昏殷人及闇

謂終日有事疏曰夏后氏祭其闇者以尚白故祭在日中時故祭在於昏時殷人祭其陽者以尚白故祭在日中時

周人祭日以朝及闇者以其尚文祭百神禮多故以朝及闇也故季氏之祭大夫之家禮儀應少而亦以朝及

闇故夫子識之又曰祭洪範庶徵云曰雨曰暘暘謂亢陽乾燥日中之時亦明日中乾燥異於昏明故讀從曰

雨曰暘之暘也必讀之者恐人以夜為陰晝為陽恐終日而祭故讀從暘也云亦謂此郊祭者以檀弓大事非

止是喪亦非諸祭故祭日於壇祭月於坎疏曰此經及云大事亦謂此郊祭祭日於壇祭月於坎下經皆據春

分朝日秋分夕月祭日於壇謂春分也祭月於
次謂秋分也月為幽日為明日在壇月在坎祭日於

東祭月於西

疏曰日為陽在外月為陰在內今祭日於
東用朝旦之時是為外祭月於西鄉夕之

時是為內是以別外內以正其位也而崔氏云祭日於
壇祭月於坎還據上文郊祭之時今謂若是郊祭日與

月當應同處何得祭日於壇祭月於坎日於東月於西
祭不同處則崔氏說非也崔氏又云日月有合祭之時謂

郊祭天而主日配以月其禮大用牛各祭之時謂春分
朝日秋分夕月其禮小故祭法用少牢今謂小司徒云

小祭祀奉牛牲鄭注謂玄冕所祭自玄冕皆用牛也何
得用少牢今謂祭法日月用少牢鄭云禱祈之祭也崔

氏說又非崔氏又云迎春之時兼日月者今祭諸文迎
春迎秋無祭日月之文小宗伯云兆五帝於四郊四望

四類亦如之謂四望四類之祭亦如五帝在四郊故鄭
云兆日於東郊兆月與風師於西郊不謂兆五帝之時

即祭日月崔說
人非祭義

節服氏郊祀裘冕二人執戈送逆尸

從車

裘冕者亦從尸車送逆之往來春秋傳曰晉祀夏郊

董伯為尸疏曰尸服與王同大裘節服氏亦大裘故
二人皆裘冕執戈送逆尸云從車者送逆皆從尸車後

云凡尸服卒者之上服者崇士虞記云尸服卒者之上
服云上服如特牲士玄端也不以爵弁服為上者祭於
君之服非所以自配鬼神彼據臣卒者上服以家祭上
服不得用助祭此據王自然用卒者家祭上服服大裘
也引春秋傳者是外
傳晉語文夏官

右郊祀 傳郊之禮所以事上帝也 中 祭帝於

郊所以定天位也

疏曰祭帝於郊所以定天位也
者天子至尊而猶祭於郊以行

臣禮而事天也是欲使嚴上之禮達於下天高在上故云定天位也亦即是必本於天也禮運

郊者并百王於上天而祭之也

百王百神也或神字誤為王言

社稷唯祭一神至郊天則兼祭百神以喻君兼父母者也荀子禮論

禮行於郊而

百神受職焉

言信得其禮則神物與人皆應之百神列宿也疏曰禮行於郊而百神

受職焉者百神之羣神也王郊天備禮則星辰不忒故云受職禮運

至敬不壇

埽地而祭

疏曰王敬不壇埽地而祭者此謂祭五方之天初則燔柴於大壇燔柴訖於壇

下埽地而設正祭此周法也禮器

定公問於孔子曰古之帝王

必郊祀其祖以配天何也孔子對曰萬物本於天

人本乎祖郊之祭也大報本反始也故以配上帝
天垂象聖人則之郊所以明天道也公曰寡人聞
郊而莫同何也孔子曰郊之祭也迎長日之至也

周人始以日至之
月冬至而日長

大報天而主日配以月故周之

始郊其月以日至其日用上辛至於啓蟄之月則

又祈穀于上帝

祈求也為農求穀于上帝月令孟
春之月乃以元日祈穀于上帝魯

無仲冬大郊之事至於祈農與天子同故春秋傳
曰夫郊祀后稷以祈農事也是故啓蟄而郊郊而
後耕而學者不知推經禮之指歸皮膚妄說至乃
顛倒神祇變易時日違改兆位良可痛心者也

此二者天子之禮也魯無冬至大郊之事降殺於

天子是以不同也公曰其言郊何也孔子曰兆丘

於南所以就陽位也於郊故謂之郊焉

兆丘於南謂為園丘

兆之於南郊也然則郊之名有三焉築為園丘以象天自然故謂之園丘園丘人之所造故謂之泰

壇於南郊在南也學者謂南郊與園丘異若是則詩易尚書謂之園丘也久不通泰壇之名或乃謂

周官園丘虛委之言皆不通典制

曰其牲器何如孔子曰上帝之

牛角醵粟必在滌三月

滌所以養生具

后稷之牛唯具

別祀稷時牲亦

醵之三月配天之時獻故唯具之也

所以別事天神與人鬼也牲用騂尚

赤也用犢貴誠也

犢質慈貴誠之美也

埽地而祭貴其質也

地圜丘之

地埽焉而祭貴其質也

器用陶匏以象天地之性也

人之作物無可稱之故取

天地之性以自然也

萬物無可稱之者故因其自然之體也公曰

天子之郊其禮儀可得聞乎孔子對曰臣聞天子卜郊

則受命于祖廟而作龜于禰宮

禰宮父廟也受祭天之命於祖而作龜於父廟

尊祖親考之義也卜之日王親立于澤宮以聽誓命受

教諫之義也

澤宮宮也誓命祭天所行威儀也王親受之故曰受教諫之義

既卜獻命

庫門之內所以誠百官也將郊則天子皮弁以聽報

示民嚴上也

報白也王夙興朝服以待白祭事後服袞

郊之日喪者不

敢哭凶服者不敢入國門汜埽清路行者必止

汜通

也清路以新土無復行之

弗命而民聽敬之至也

以王恭敬事天故民聽之

不令而行之也

天子大裘以黼之被裘象天

大裘為黼文也言被之大

裘其有象天之文政被之道路至大壇而脫之

乘素車貴其質也旂十有

二旒龍章而設以日月所以灋天也既至泰壇王

脫裘矣服袞以臨燔柴戴冕璫十有二旒則天數

也臣聞之誦詩三百不足以一獻

祭羣小祀

一獻之禮

不足以大饗

大饗祭天地

大饗之禮不足以大旅

大旅祭五

帝也大旅具矣不足以饗帝

饗帝祭天

是以君子無敢輕

議於禮者也

家語郊問

孔子曰孝莫大於嚴父

注云萬物

資始於乾人嚴其父也

疏曰存行之大者莫有大於尊嚴其

父也萬物資始於乾者易云大哉乾元萬物資始是也云人倫資父為天者曲禮曰父之讐弗與共

戴天鄭玄曰父者子之天也殺已之天與共戴天非孝子也杜預注左氏傳曰婦人在室

則天父出則天夫是人倫資父為天也云故

敬也父既同天故須尊嚴父莫大於配天則周公

嚴其父是孝行之大也

其人也

謂父為天雖無貴賤然以父配天之禮始自周公故曰其人也疏曰嚴父之大者

莫有大於以父配天而祭也言以父配天而祭之者則文王之子成王之叔父周公是其人也又曰

云謂父為天雖無貴賤者此將釋配天之禮始自周公故先張此文言人無限貴賤皆得謂父為天

云然以父配天之禮始自周公故曰其人也首但以父配天倫檢羣經更無殊說案禮記有虞氏尚

德不郊其祖夏殷始尊祖於郊無父配天之禮也周公大聖而首行之禮無二尊既以后稷配郊天

不可又以文王配之是周公嚴父配天之義也因享明而以文王配之是周公嚴父配天之義也亦所以

中人文王有尊祖之禮也經稱周公昔者周公郊祀其人注順經旨故曰始自周公也

后稷以配天

后稷周之始祖也郊謂園丘祀天也周公攝政因行郊天之祭乃尊始祖

以配之也疏曰前陳周公以父配天因言配天之事自肯武王既崩成王年幼即位周公攝政因行郊天祭禮乃以始祖后稷配天而祀之因祀五方上帝於明堂之時乃尊其父文王以配而享之尊父祖以配天崇孝享以致敬是以四海之內有土之居各以其職貢來助祭也又曰云后稷周公之始祖也者秦周本紀云后稷名棄其母有邰氏女曰姜嫄為帝嚳元妃出野見巨人跡心忻然欲踐之踐之而身動如孕者居期而生子以為不祥棄之隘巷馬牛過者皆辟不踐徙置之林中適會山林多人遷之而棄渠中水上飛鳥以其翼覆藉之姜嫄以為神遂收養長之初欲棄之因名曰棄棄為兒好種樹麻菽及為成人遂好耕農帝堯舉為農師天下得其利有功帝舜曰棄黎民始飢爾后稷播時百穀封棄於邵號曰后稷后稷曾孫公劉復修其業自后稷至王季十五世而生文王受

命作周祭毛詩大雅生民之序曰生民尊祖也后
稷生於姜嫄又武是功起於后稷故推以配天焉
是也云郊謂國丘祀天也者此孔傳文祀其祭也
祭天謂之郊周禮大司樂云凡樂國鍾為宮黃鍾
為角大簇為徵姑洗為羽雷鼓雷鼗孤竹之管雲
和之琴瑟雲門之舞冬日至於地上之圜丘奏之
若樂六變則天神皆降可得而禮矣郊特牲曰郊
之祭也迎長日之至也大報天而主日也兆於南
郊就陽位也又曰郊之祭也大報本反始也言以
冬至之後日漸長郊祭而迎之是建子之月則與
經俱郊祀於天明國丘南郊也云周公攝政因行
郊天之祭乃尊始祖以配之也者案文王世子稱
仲尼曰昔者周公攝政踐阼而治抗世子法於伯
禽所以善成王也則郊祀是周公攝政之時也公
羊傳曰郊則曷為必祭稷王者必以其祖配王者
則曷為必以其祖配自內出者無匹不行自外至

者無主不止言祭天則天神為客是外至也須人為主天神乃止故尊始祖以配天神侑坐而食之
案左氏傳曰凡祀啓蟄而郊又云郊祀后稷以祈農事也而鄭注禮郊特牲乃引易說曰三王之郊一用夏正建寅之月也此言迎長日者建卯而晝夜分分而日長也然則春分而長短分矣此則迎極在未分之時至謂春分之日也夫至者是長短之極也明分者晝夜均也分是四時之中啓蟄在建寅之月過至而未及分必於夜短方為日長則左氏傳不應言啓蟄也若以日長有漸郊可預迎則其初長宜在極短之日故知傳啓蟄之郊是祈農之祭也周禮冬至之郊是迎長日報本反始之祭也鄭玄以祭法有周人禘饗之文遂變郊為祀感生之帝謂東方青帝靈威仰周為木德威仰木帝言以后稷配蒼龍精也韋昭所注亦符此說唯魏太常王肅獨著論以駁之曰案爾雅曰祭天曰燔燎

柴祭地曰瘞。瘞又曰禘。大祭也。謂五年一大祭之名。又祭法祖有功。宗有德。皆在宗廟。本非郊配。若依鄭說。以帝嚳配祭。圜丘是天之最尊也。周之尊帝嚳。不若后稷。今配青帝。乃非最尊。實乖嚴父之義也。且徧窺經籍。並無以帝嚳配天。之文。若帝嚳配天。則經應云。禘嚳於圜丘。以配天。不應云。郊祀后稷也。天一而已。故以所在祭。在郊。則謂為圜丘。言於郊。為壇。以象圜天。圜丘即郊也。郊即圜丘也。其時中郎馬昭抗章固執。當時勅博士張融質之。融稱漢世英儒。自董仲舒劉向馬融之倫。皆斥周人之祀。昊天於郊。以后稷配。無如立說配蒼帝也。然則周禮。圜丘則存。經之郊。聖人因尊事天。因下事地。安能復得祀。帝嚳於圜丘。配后稷於蒼帝之禮乎。且在周頌。思文后稷。克配彼天。昊天有成命。郊祀天地。則郊非蒼帝。通儒同辭。肅說為長。伏以存為人行之本。祀為國事之大。孔聖垂文。固非臆

說前儒詮證各擅一家自須修撰備經斟酌覆究理則依王肅為長從眾則鄭義已久王義具聖證之論鄭義具於三禮義示主鄭是非於禮記其義文多卒難詳縷說此略據機要且舉二端焉宗

祀文王於明堂以配上帝

明堂天子布政之堂也周公因祀五方上帝於

明堂乃尊文王以配之也

疏曰云明堂天子布政

之宮也者案禮記明其二端注明堂朝諸侯于明堂之位天子負斧依南鄉而立明堂也者明諸侯之尊卑也制禮作樂頒度量而天下大服知明堂

是布政之宮也云周公因祀五方上帝於明堂乃尊文王以配之也者五方上帝即是上帝也謂以

文王配五方上帝之神侑坐而食也案鄭注論語云皇皇后帝並謂太微五帝在天為上帝分王五

方為五帝舊說明堂在國之南去王城七里以近為媒南郊去王城五十里以遠為嚴五帝卑於昊

天所以於郊祀昊天於明堂祀上帝也其以后稷配郊以文王配明堂義見於上也五帝謂東方青帝靈威仰南方赤帝赤熒怒西方白帝白招拒北方黑帝汁光紀中央黃帝含樞紐鄭玄云明堂居國之南南是明陽之地故曰明堂案史記云黃帝接萬靈於明庭明庭即明堂也明堂起於黃帝周禮考工記曰夏后曰世室殷人重屋周人明堂先儒舊說其制不同大戴禮云明堂凡九室一室而有四戶八牖三十六戶七十二牖以茅蓋屋上圓下方鄭玄據援神契云明堂上圓下方八牖四闕考工記曰明堂五室稱九室者或云取象陽數也八牖者陰數也取象八風也三十六戶取象六甲子之交六六三十六也上圓象天下方法地八牖者即八牖也四闕者象四方也稱五室者取象五行皆無明文也

以意釋之耳此言宗祀於明堂謂九月大享靈威仰等五帝以文王配之即月令云

季秋大饗帝注云備祭五帝以其上言舉五穀之
要藏帝藉之收於神倉九月西方成事終而報功

也是以四海之內各以其職來祭則德教刑於四

海海內諸侯各脩其職來助祭也疏曰云君行
嚴配之禮者此謂宗祀文王於明堂以配天是也

云則德教刑于四海海內諸侯各脩其職來助祭
也者謂四海之內六服諸侯各脩其職貢方物也

衆周禮大行人以九儀辨諸侯之命廟中將幣三
享又曰侯服貢祀物鄭云犧牲之屬甸服貢嫁物

注云絲帛也男服貢器物注云尊彝之屬也采服
貢服物注云玄纁絺繡也衛服貢材物注云八材

也要服貢貨物注云龜貝也此是六服諸侯各脩
其職來助祭又若尚書武成篇云丁未祀於周廟

邦甸侯衛駿奔走執豆蓬
亦是助祭之義也
存經
尚書大傳曰維十有

三祀帝乃稱王而入唐郊猶以丹朱為尸

舜承堯猶子承

父雖已改立易樂猶祭天於唐郊以丹朱為尸至十三年天下既知已受堯位之意矣將自立郊而

以丹朱為王者後欲天下昭然知之然後為之故稱王也晉祀夏郊以黃伯為尸於時百

執事咸昭然乃知王世不絕爛然必自有繼祖守

宗廟之君

知當以丹朱為王者後使祭其郊也祖或為體尚書大傳

襄公

七年夏四月三卜郊不從乃免牲

稱牲既卜日也卜郊又非禮也

疏曰周禮大宰職云祀五帝前期十日帥執事而卜日然則將祭十日之前預卜之蓋一旬一卜

也例稱啓蟄而郊建寅之月也此四月三卜蓋三月二卜四月又一卜也春分之前猶是啓蟄節內

於法仍可以郊據傳獻子之言三卜在春分之後
則初卜即已大晚故三卜而涉於春分也人心欲
其吉不吉是不從不從則不郊故免牲而不殺也
又曰僖三十一年夏四月四卜郊不從乃免牲傳
曰禮不卜常祀而卜其牲日牛卜日曰牲牲成而
卜郊上怠慢此經與彼正同唯四卜三卜為異耳
彼言其非則此亦非也今已稱牲是既卜日矣孟
牲既成矣而又卜郊與僖同譏故云又非禮也

獻子曰吾乃今而後知有卜筮夫郊祀后稷以祈

農事也

郊祀后稷以配天后稷周始祖能播殖者辨知后

稷是何人不為能播殖故祀以祈農事自謂郊天
以祈農耳案孝經云孝莫大於嚴父嚴父莫大於
配天則周公其人也昔者周公郊祀后稷以配天
宗祀文王於明堂以配上帝止云配天而祀之不

言祈農也郊特牲說郊天之義曰萬物本乎天
本乎祖此所以配上帝也郊之祭也大報本反始
也宣三年公羊傳曰郊則曷為必以其祖配自內出者無匹
其祖配王者則曷為必以其祖配自內出者無匹
不行自外至者無主不止何休云天道闇昧故推
人道以接之不以文王配者重本尊始之義也據
此諸文則郊祭天者為物本於天故祭天以報本
神必須配故推祖以配天止報生成之恩非求未
來之福此傳專言郊祀后稷主為祈農事者斯有
旨矣祭祀者為報已往非求將來之福也但祭為
明神所享神以將來致福將來而獲多福乃由祭
以得之禮器稱君子曰祭祀不祈祭者意雖不祈
其實福以祭降以祭獲福即祈之義也宗廟之祭
緣生事死盡其孝順之心非求耕稼之利少牢饋
食者大夫之祭禮也其祭之末尸嘏主人使女受
福于天宜稼于田彼宜為田而祭哉神以宜田福

之耳郊天之義亦由是也神以人為主人以穀為命人以精意事天天以宜稼佑人以此謂之祈農本意非祈農也詩噫嘻序曰春夏祈穀于上帝禮月令仲春之月曰是月也天子乃以元日祈穀于上帝即是郊天之祭也其下即云乃擇元辰天子親載耒耜躬耕帝籍是郊而後耕也獻子此言正與禮合存經止言尊嚴其父主述孝子之志本意不說郊天之祭無由得有祈穀之言何休膏肓執彼難追而想之是故啓蟄而郊郊而後耕今既耕亦可以歎息也

而卜郊宜其不從也

蟄直立反 啓蟄夏正建寅之月耕謂春分 夏戶雅反

疏曰擇例曰歷法正月節立春啓蟄為中氣二月節驚蟄春分為中氣是啓蟄為夏正建寅之月中氣也月令祈穀之後即擇日而耕亦在正月傳言既耕而卜郊宜其不從是此卜之時已涉春分

之節時過不可復郊故言耕謂春分指釋獻子言
耕是春分之節不謂春分始可耕也釋例又曰僖
公襄公夏四月卜郊但譏其非所宜卜不譏其四
月不可郊也孟獻子曰啓蟄而郊郊而後耕耕謂
春分也言得啓蟄即當卜郊不得過春分也是言
此卜在春分之後故獻子譏之據傳獻子此言郊
天之禮必用周之三月而雅記云孟獻子曰正月
日至可以有事於上帝七月日至可以有事於祖
七月而禘獻子為之也此與禮記俱稱獻子二文
不同必有一謬禮記後人所錄左傳當得其真若
七月而禘獻子為之則當獻子之時應有七月禘
者然嘗過則書禘過亦宜書何以獻子之時不書
七月禘也足知禮記之言
非獻子矣春秋左氏傳
僖公三十一年夏四
月四卜郊不從乃免牲
龜曰卜不從不吉也卜郊
不吉故免牲免猶縱也

疏曰龜曰卜曲禮文也洪範稽疑云龜從筮從謂
從人之心也人心欲吉不從是不吉也卜郊不吉
不復為郊牲無所用故免牲免猶縱放不殺之也
穀梁傳曰免牲者為之縞衣纁裳有司玄端奉送
至于南郊免牛亦然左傳無說其事或然也桓五
年傳例曰凡祀啓蟄而郊啓蟄周之三月也今於
夏四月卜郊者傳舉節氣有前有却但使春分未
過仍得為郊故四月得卜郊也故釋例曰凡十二
月而節氣有二十四共通三百六十六日分為四
時間之以閏月故節不必得恒在其月初而中氣
亦不得恒在其月之半是以傳舉大宿氣節為文
而不以月為正僖公襄公夏四月卜郊但譏其非
所宜卜而不譏其四月不可郊也孟獻子曰啓蟄
而郊郊而後耕耕謂春分也言得啓蟄當卜郊不
得過春分耳是言四月得郊也周禮大宰職云祀
五帝前期十日帥執事而卜曰然則將祭必十日

之前豫卜之也言四卜郊者蓋三月每旬一卜至四月上旬更一卜乃成為四卜也此言四卜郊不從襄七年三卜郊不從公羊傳曰曷為或言三卜或言四卜二卜禮也四卜非禮也三卜何以禮求吉之道三今左傳以為禮不卜常祀則一猶三望卜亦非不云四非而三是異於公羊說

猶三望

三望分野之星國中山川皆因郊祀望而祭之魯廢郊天而脩其小祀故曰猶猶者可止之辭分

扶問反疏曰公羊傳曰三望者何望祭也然則曷祭祭泰山河海鄭玄以為望者祭山川之名諸

侯之祭山川在其地則祭之非其地則不祭且魯竟不及於河禹貢海岱及淮惟徐州徐即魯地三

望謂淮海岱也賈逵服虔以為三望分野之星國中山川今杜亦從之以襄九年傳曰陶唐氏之火

正閏伯居商丘祀大火相土因之故商主大火祀元年傳云辰為商星參為晉星楚語云天子禰祀

羣神品物諸侯二王後祀天地三辰及其土地之山川注國語者皆云諸侯二王後祀天地三辰日月

月星也非二王後祀分野星辰山川也以此知三望分野之星國內山川其義是也昭七年夏四月

甲辰朔日有食之於時夏之二月日在降婁傳稱去衛地如魯地於十二次豕韋衛地降婁魯地魯

祭分野之星其祭奎婁之神也此三望者因郊祀天而望祭之於法不獨祭也魯既廢郊天而獨脩

小祀故曰猶公羊穀梁左氏曰卜郊不從乃免牲皆云猶者可止之辭

非禮也諸侯不得郊天魯以周公故得用天子禮樂故郊為魯常祀疏曰明堂位稱成王

幼弱周公踐天子之位以治天下制禮作樂七年致政於成王成王以周公為有勲勞於天下命魯

公世世祀周公以天子之禮樂是以魯君孟春乘大路載弧韞斨十有二旒日月之章祀帝于郊配

以後稷天子之禮也是魯以周公之故得用天子禮樂天子命之則為常祀故郊為魯之常祀也記

言正月謂周正建子之月與傳啓蟄而郊其月不同禮記是後儒所作不可以難左傳猶三

望亦非禮也禮不卜常祀時必其而卜其牲日與卜牲

知吉牛卜日曰牲既得吉日則牛改名曰牲與日

俱卜之也必當先卜牲而後卜日占得吉日則改牛為牲然則牛雖卜吉未得稱牲牲是成用之名

不可改名為牲更卜吉凶明知卜牛在下日之前也此言免牲是已得吉日牲既成矣成七年乃免

牛是未得吉牲成而卜郊上怠慢也怠於古典望日牲未成也

郊之細也不郊亦無望可也春秋左公羊子曰

曷為或言三卜或言四卜

疏曰或言三卜即襄七年夏四月三卜郊不從

乃免牲是也

三卜禮也四卜非禮也三卜何以禮四卜

何以非禮

據俱卜也疏曰案曲禮上篇云卜筮不過三是其舊典之遺存鄭玄云求吉

不過三魯四卜郊春秋譏之是也三卜禮謂是魯禮若天子之郊則不卜以其常事但以魯郊非常

是以卜之吉則求吉之道三

三卜吉凶必有相奇者可以決疑故求吉

必三卜疏曰周禮大卜掌三王之龜易義亦通于此然三卜是禮理應不書襄七年三卜郊何以

書正以魯人之郊傳卜三正襄七年禘嘗不卜郊

何以卜

禘此禘為大嘗比四時祭為大故據之疏曰禘嘗不卜者即僖八年秋七月禘于

太廟桓十四年八月乙亥嘗之類皆不見卜筮之
文故言此禘比禘為大禘之與禘雖皆大祭但禘
及功臣於禘則否故以禘為大是以文二年大事
于大廟之下傳云五年而再殷祭彼注云謂三年
禘五年禘禘所以異於禘者功臣皆祭也禘猶合
也禘猶諦也審諦無所遺失盤庚曰茲予大享于
先王爾祖其從與享之義亦通于此也嘗比四
時祭為大者以此傳配禘禘既大於禘則知嘗大
於四時且嘗是秋成萬
物薦馨故以為盛也
卜郊非禮也
禮天子不
道天子之郊以其常事故不須卜
魯郊非禮是以卜之異於禘嘗耳
卜郊何以非禮
據上言三卜禮疏曰弟子之意以為上言三
是禮何言卜郊非禮乎答者以為由魯郊非正故
須卜何妨天子
魯郊非禮也
以魯郊非禮故卜爾
之郊不卜也
昔武王既沒成王幼

少周公居攝行天子事制禮作樂致太平有王功
周公薨成王以王禮葬之命魯使郊以彰周公之

德非正故卜三卜吉則用之不吉則免牲謂之郊
者天人相與交接之意也不言郊天者謙不敢斥

尊疏曰謂之郊者云云何氏以為郊特牲云於
郊故謂之郊禮記非正典故不從之又曰不言郊

天者謙不敢斥尊者欲道禘于大廟于莊公于武
公之屬皆斥尊言之若然乙亥嘗已卯燕之屬又

不斥言者以是時祭魯郊何以非禮據成公乃天
于大廟小於禘故也

子祭天郊者所以祭天也天子所祭莫重於郊居
南郊者就陽位也素席玄酒器用陶匏大

珪不瑑大羹不和為天至尊物不可悉備故推簋
以事之疏曰居南郊云云者皆出禮記郊特牲

彼文云郊之祭也大報天而主日也兆於南郊就
陽位也又云莞簟之安而蒲越素韎之尚酒醴之

美玄酒明水之尚器用陶匏以象天地之性也大
珪不瑑美其質也大羹不和貴其質也鄭氏云明
水司烜以陰鑑所取於月之水也蒲越橐鞾藉神
席也而彼文又云祭天埽地而祭焉於其質而已
夫而云橐鞾神席正謂對不諸侯祭土土謂社也
為壇故言埽地不全無席
莫重於社卿大夫祭五祀士祭其先祖疏
曰諸侯祭土者欲道魯郊為非禮之意也天子

有方望之事

方望謂郊時所望祭四方羣神日月
星辰風伯雨師五藏四瀆及餘山川

凡三十六所疏曰舊說云四方羣神是為四也通
日與月為六星是五星為十一也辰是十二辰為二
十三風伯雨師為二十五五藏為三十四瀆為三
十四餘小山川為二是為三十六所注欲魯郊非
禮也者正以其所主撰無所不通盡八極之內天
是以不得祭天地也之所履地之所

載無所不至
故得郊也

諸侯山川有不在其封內者則不祭

也

故魯郊非禮也

曷為或言免牲或言免牛免牲禮也

魯

郊不吉免之禮卜郊不吉則為牲作玄衣纁裳使有司玄端故之於南郊明本為天不敢番天牲

疏曰或言免牛者即成七年王正月鼯鼠食郊牛角改卜牛鼯鼠又食其角乃免牛是也免牛

非禮也免牛何以非禮傷者曰牛

養牲不謹致有災傷天不饗用

不得復為天牲故以本牛名之非禮者非天牲不當復見免但內自省責而已

三望者何

望祭也

疏曰欲言祭名文在免牲之下欲言非祭因郊天為之故執不知問然則曷

望祭也

祭祭泰山河海曷為祭泰山河海

據郊者主為祭天

山川

有能潤于百里者天子秩而祭之

此皆助天宣氣布功故祭天及

之秩者隨其大小尊卑高下所宜禮祭天牲角滿

栗社稷宗廟角握六宗五穀四瀆角尺其餘山川

視卿大夫燎地瘞日月星辰布山縣水沉風磔

雨升燎者取俎上七體與其珪寶在辨中置於柴

上燒之餘山川視卿大夫者小山川之屬但索牛

文耳其餘山川視卿大夫者小山川之屬但索牛

而已又曰爾雅祭天曰燭柴者蓋以燎柴而燔之

故謂祭天為燔柴云地瘞者即爾雅云祭地曰瘞

埋李巡曰祭地以玉埋地中瘞亦埋也云日月星

辰布者即爾雅云祭星曰布孫氏云既祭布散於

地位似星辰布列郭氏曰布散祭於地然則爾雅

雖不言日月日月之義宜附於星故何氏連日月

言之云山縣者爾雅云祭山曰瘞縣郭氏云或瘞

或縣置之於山李氏曰祭山以黃玉久瑩以瘞置

禮經傳通考

卷一百一十五

禮經傳通考

卷一百一十五

瓦上遙遙而厖之若縣故曰厖縣孫氏曰厖縣埋
於山足曰厖埋於山上曰縣是也云水沈者即爾
雅祭川曰浮沈孫氏曰置祭於水中或浮或沈故
曰浮沈是也言風磬者即爾雅云祭風曰磬孫氏
云既祭披磬其牲以風股之季氏曰祭風以牲頭
蹄及皮破之以祭故曰磬郭氏曰今俗當大道中
磬狗云以止風北其象云雨升者無文何氏更有
所見蓋患其雨多祭使上升故祭雨曰升明上水
沈是祭川也又曰燎者取俎云云者解上天燎之
文其七體者即少牢之肩臂肱肫肱正脊脰脊橫
脊短脊長脊觸石而出膚寸而合側手為膚案指
代骨之屬也觸石而出膚寸而合為寸言其觸石
理而出無有不崇朝而徧雨乎天下者唯泰山爾
膚寸而不合崇重也不重朝言一朝也河海潤于千里亦能通氣致雨潤澤
及于千里韓詩傳曰

湯時大旱使人禱於山川是也郊望非一獨祭三者魯郊非禮故獨祭其大者猶者何通

可以已也

已止

何以書譏不郊而望祭也

譏尊者不食而卑者

獨食書者惡失禮也魯主是郊者傷公賢君欲尊明其先祖之功德不就廢之譏者春秋不見事不

書皆從事舉可知也不言言不從者明已意汲汲欲郊而卜不從爾所以見事鬼神當加精神

宣公三年春王正月郊牛之口傷改卜牛牛死乃

不郊猶三望

牛不稱牲未卜日言牛雖傷死當更改卜取其吉者郊不可廢也前年冬

天王崩未葬而郊者不以王事廢天事禮記曾子問天子崩未殯五祀不行既殯而祭自啓至于反

哭五祀之祭不行已葬而祭疏曰案經牛死在正月郊當用三月其間足以養牛牛雖一傷一死

更當改卜取其吉者郊天之禮不可廢也牛死而
遂不郊改為非禮也不郊非禮則於禮得郊禮諸
侯為天子斬良天王崩未葬而得郊者不以王市
廢天事也引曾子問者舉輕以明重也初死以至
於殯啓殯以至反哭於此之間五祀之祭不行耳
既殯之後啓殯以前五祀之祭猶尚不廢郊天必
不廢矣故鄭注云郊社亦然王制云喪三年不祭
唯祭天地社稷為越絺而行事鄭玄云不敢以卑
廢尊絺輜車索禮天子殯於西序櫛輜車而塗之
繫絺以備火災言越絺而行事是在殯得祭也索
曾子問既殯而祭其祭也尸入三飯不侑醕不酢
而已矣謂尸唯三飯祝不侑勸其食食罷主人酌
酒醕尸不酢主人曾子問又云已葬而祭祝畢獻
而已謂尸飯而侑勸訖醕尸尸酢主人酢訖又布
祝席祝坐主人酌酒以獻祝獻畢而止故鄭注云
既葬彌吉畢獻祝而後止是也鄭又注彼云天子

七祀言五者闕中言之案禮記祭法云王為羣姓立七祀曰司命曰中雷曰國門曰國行曰泰厲曰戶曰竈王自為立七祀諸侯為國立五祀曰司命曰中雷曰國門曰國行曰公厲諸侯自為立五祀大夫立三祀曰族厲曰門曰行適士立二祀曰門曰行庶士庶人立一祀或立戶或立竈是其義也

左氏曰望郊之屬也不郊亦無望可也已有例在僖三十一

年復發傳者嫌牛死與卜不從異復扶又反公羊子曰其言之何據

角不言之疏曰據食角不言之者即成七年春王正月饔飩食郊牛角改卜牛饔飩又食其角乃

免牛緩也辭閒容之故為緩不若食角急也別天牲主以角書者識宣公養牲不謹敬不

潔清而災重事至尊故詳錄其簡甚疏曰不若食角也者言食角之時正以有不順之處為天所

災不敢簡慢故不言之耳別天牲主以角者即王制云祭天地之牛角觸栗宗廟之牛角握賓客之

牛角尺是重事至尊故詳錄其簡甚者正謂言之是也何者之為緩辭故以簡慢之甚言矣言簡者

欲取五行傳云曷為不復卜據定十五年牛死改簡宗廟之言耳

五年牛死改卜牛者據彼經云十五年春王正月饑飢食郊牛牛死改卜牛是也

二卜

二卜語在下

帝牲不吉

帝皇天大帝在北辰之中主摠領天地五帝羣神也

不吉者有災疏曰在北辰之中者言在北辰之處紫微宮內也云摠領天地五帝羣神也者摠領

天地之內五帝羣神也其五方之帝東方青帝靈威仰之屬是其五帝之名春秋緯文耀鉤具有其

文則扳稷牲而卜之

先卜帝牲養之有災更引稷牲卜之以為天牲養之凡當

養牲養

二卜爾復不吉不復郊 疏曰更引稷牲卜之以
為天牲者即定十五年牛死改卜牛者正謂此

帝牲在于滌三月

滌官名養帝牲三年之處也謂
之滌者取其蕩滌潔清三年者

各主一月取三月一時足以充其天牲 疏曰養
帝牲三年之處也者其三年之文出春秋說文

於稷者唯具是視

視其身體具無災害而已不郊
特養于滌官所以降稷尊帝郊

則曷為必祭稷

據郊者主
為祭天

王者必以其祖配

祖謂
后稷

周之始祖姜嫄履大人迹所生者即詩云履帝武敏歆又周
姜嫄履大人迹所生者即詩云履帝武敏歆又周

本紀云有郤氏女曰姜嫄為帝嚳元妃出野見巨
人跡心忻然悅欲踐之踐之身動如孕者居期而

主子以為不祥棄之隘巷或棄山林寒水之上云
云姜嫄以為神遂收養長之初欲棄之因名曰棄

是王者則曷為必以其祖配

據方父事天
據方父事天者
疏曰

以為父特祭何嫌而要須
以祖配祭之乎哉難之

自內出者無匹不行

合匹

也無所與會
合則不行

自外至者無主不止

必得主
者天道闇昧故

推人道以接之不以文王配之者重本尊始之義
也故存經曰郊祀后稷以配天宗祀文王於明堂

以配上帝五帝在大微之中
書改卜者善其應變得禮
疏曰必得主
人乃止

者天道闇昧故推人道以接之者止謂天之精神
靈不明察矣又曰此五帝者即靈威仰之屬言在

大微宮內迭王天下即感精符云蒼帝之始二十
八世滅蒼者翼也彼注云堯翼之星精在南方其

色亦滅翼者斗注云舜斗之星精在中央其色黃
滅斗者參注云禹參之星精在西方其色白滅參

者虛注云湯虛之星精在北方其色黑滅虛者房
注云文王房星之精在東方其色青五星之謀是

其義穀梁子曰之口緩辭也傷自牛作也牛自傷

災之道不至也故以緩辭言之疏曰此之為緩

辭則成七年不言之為急辭也舊解范氏別例云

凡三十五范既認為例則言之者並是緩辭也傳

於執衛侯云言之緩辭也則云其餘不發亦緩可

知耳公喪在外逆之緩也衛侯之弟鱄秦伯之弟

鍼等稱之者取其緩之得逃吳敗六國云之者取

其六國同役而不急於軍事也殺奚齊稱之者緩

於成君也考仲子官言之者隱孫而脩之緩也日

食言之者不知之緩也則自餘並緩耳理改卜牛

雖迂誕舊說既然不可致語故今亦從之

牛死乃不郊事之變也牛無故自傷其口易牛改

卜復死乃廢郊禮此事之

變異 疏曰公羊傳稱改卜者帝牲不吉則升稷牲而卜之其帝牲在於滌宮三月於稷者唯具視

其身體無災害而已不特養於滌宮又云郊必以其祖配者自內出者無匹不行自外至者無主不

止今改卜者取其稷牛則未審傳意如何以后稷配郊必與公羊異也不言免牛而云不郊者牛死

不行免牛之禮 乃者亡乎人之辭也 識宣公不致天變 疏恭

曰重發傳者嫌牛死 成公七年春王正月饔飩與卜郊不從異也

食郊牛角改卜牛饔飩又食其角乃免牛不郊猶

三望 不言免牛者以方改卜郊吉未可知 疏曰下傳稱免牲不曰不郊免亦然此言免牛

則嫌似不郊故云不言免牛 穀梁子曰不言日急者以方改卜郊未可知也

辭也

辭中促迫不容日 疏曰宣三年郊牛之口傷彼言之是緩辭亦不云日此傳云不言日

急辭也者案宣三年傳言之是牛自傷之緩此言其是鼠食牛之緩二者立文雖異俱是緩辭則辭

閒容日亦是緩辭傳云不言日急辭也者此已發例則定十五年夜元年之類不言日者並是急辭也緩辭不言日者言之既是緩辭 過有司也郊牛

可知故不煩更書日以見緩也

日展斛角而知傷展道盡矣其所以備災之道不

盡也

斛渠幽反 有司展察牛而即知傷是展察之道盡不能防災禦患致使牛傷故不書日

以顯有司之過斛球球然角貌 疏曰展省察也言日日皆省察牛之豚角而則知傷是省察之道盡矣展道雖盡不能防災禦患致使牛傷是其所以備災之道不盡是故不言日以責有司也牛角

云豚者詩稱肥腍其豚又曰有豚其角是也

改卜牛鼯鼠又食其角又

有繼之辭也

前已食故曰繼

其緩辭也曰亡乎人矣非人

之所能也所以免有司之過也

至此復食乃知國無賢君天災之爾

非有司之過也故言其以救之

疏曰上文云鼯鼠食郊牛角不言其此文云又食其角乃變言其

故釋之云其緩辭也曰亡乎人矣亡無也至此郊牛復食乃知國無賢君非人所不能也謂國無賢

君之故為上天之所災非人力所能禁所以免有司之過也謂經言其者所以救有司也乃免

牛乃者亡乎人之辭也免牲者為之緇衣纁裳有

司玄端奉送至于南郊免牛亦然免牲不曰不郊

免牛亦然

免牛者用牲今言免牲則不郊顯矣若言免牛亦不郊而經復書不郊者蓋為三

望起爾言時既不郊而猶三望明失禮疏曰重發傳者此再食乃免牛嫌與他例別故重發之又

曰蓋為三望起爾者僖三十一年夏四月四卜郊不從乃免牲猶三望彼不云不郊此既云免牛又

云不郊者彼免牲與三望同時故略去不郊之文此春免牛夏乃三望故備言之

成公

十七年九月辛丑用郊公羊子曰用者不宜用也

九月非所用郊也

周之九月夏之七月天氣上升地氣下降又非郊時故加用之

然則郊曷用郊用正月上辛

魯郊博卜春三月言正月者因見百王正

所常用也三王之郊一用夏正言正月者春秋之制也正月者歲首上辛猶始新皆取其首月之辛

日者明用辛例不郊則不日疏曰僖三十一年傳云魯郊非禮也彼注云以魯郊非禮故卜爾昔

武王既沒成王幼少周公居攝行天子事制禮作樂致太平有王功周公薨成王以王禮葬之命魯

使郊以彰周公之德非正故卜三卜吉則用之不吉則免牲者是其魯郊博卜春三月之義也而此

傳止言正月者因見其自今後百代之王正所當用之月也又曰三王之郊一用夏正者易說文也

既用夏正而此傳特言用正月上辛者但春秋之制也春秋因魯以制法令自今以後之郊皆用周

之正月故也云不郊則不日者即僖三十一年夏四月四卜郊不從乃免牲猶三望成七年春王正

月龍鼠食郊牛角改卜牛夏五月不郊或曰用然猶三望之屬是不郊則不日之文也

後郊或曰用者先有事存后稷神明也晉人將有事於河必先有事於惡池齊人將有事於秦

山必先有事於蜚林魯人將有事於天必先有事
於類宮九月郊尤悖禮故言用小大盥讖之以不
郊乃讖三望知郊不得讖小也又夕牲告牷后稷
當在日上不得在日下惡音呼又作庠好故反
池大河反蜚禮記作配疏曰晉人至於類宮者
即禮器云魯人將有事於上帝必先有事於泮宮
注云上帝周所郊祀之帝謂蒼帝靈威仰也魯以
周公之故得郊祀上帝與周同先有事于泮宮告
后稷也告之者將以配天先仁也泮宮郊之學也
詩所謂類宮也字或為郊宮晉人將有事於河必
先有事於惡池鄭注云惡當為呼榮之誤也呼池
嘔夷并州川齊人將有事於泰山必先有事於配
林注云配林林名是也云以不郊乃讖三望云云
者即僖三十一年夏四月四卜郊不從乃克牲猶
三望傳云猶者何通可以已也讖不郊而望祭也
何氏云讖尊者不食而卑者獨食也云又夕牲告

牲后稷云云者言古禮郊之前日午後陳其牲物告牲之牲于后稷則知此經宜云九月用辛丑郊

穀梁子曰九月辛丑用郊夏之始可以承春以

秋之末承春之始蓋不可矣

郊春事也傷三十一
年夏四月四卜郊不

從傳曰四月不時今言可者方明
秋末之不可故以是為猶可也

九月用郊用者

不宜用也宮室不設不可以祭衣服不脩不可以

祭車馬器械不備不可以祭有司一人不備其職

不可以祭祭者薦其時也薦其敬也薦其美也非

享味也

疏曰論用郊而陳宮室者禮有五經莫重
於祭祭而盛者莫大於郊傳意欲見嚴父

然後至其天家國備然後祭享故具說官室祭服車馬官司之等明神非徒享味而已何得九月始用郊乎徐邈云官室謂郊之齊宮衣服車馬亦謂郊之所用言一事闕則不可祭何得九月用郊理亦通

哀公元年鼯鼠食郊牛角改卜牛夏四月

辛巳郊穀梁子曰此該郊之變而道之也

該備也春秋書

郊終於此故於此備說郊之變變謂郊非其時或牲被災害疏曰郊自正月至于三月郊之時也

三卜禮之正凡書郊皆譏范例云書郊有九倍三十一年夏四月四卜郊不從乃免牲猶三望一也

宣三年郊牛之口傷改卜牛牛死乃不郊猶三望二也成七年鼯鼠食郊牛角三也襄十年夏四月

三卜郊不從乃免牲四也襄十二年夏四月四卜郊不從乃不郊五也定公哀公並有牲變不言所

食處不敬莫大二罪不異並為一物六也定十五年五月郊七也成十七年九月用郊八也及此年四月辛巳郊九也下傳云子之所言至道之何也然則據此而言牛有傷損之異卜有遠近之別亦在其於變之中又有言焉

於災變之中又有可善而言者疏曰郊牛日

日展視其斛角而知其傷是展道盡矣即於災變之中有可善而言者但備災之道不盡致此天災而鼯鼠食角故書以譏之也鼯鼠食郊牛角改卜牛志不敬也

郊牛日展斛角而知傷展道盡矣

展道雖盡所以備災之道不盡

譏哀公不敬故致天災

郊自正月至于三月郊之時也夏四

月郊不時也五月郊不時也夏之始可以承春以

秋之末承春之始蓋不可矣

凱曰不時之中有差劇也夏始承春方秋

之末猶為可也

疏曰自正月二月三月此三春之月是郊天之正時也若夏四月五月以後皆非

郊月如有其郊並書以示譏然則郊是春事也如郊在四月五月之中則是以夏始承春其過差少

若郊在九月之中則是以秋末承春其過極多則自五月至八月其間有郊亦以承春遠近為過之

深淺也

九月用郊用者不宜用也

在成十七年

郊三卜禮

也

以十二月下辛卜正月上辛如不從則以正月下辛卜二月上辛如不從則以二月下辛卜三

月上辛所謂三卜也

鄭嗣曰謂卜辛而三也求吉之道三故曰禮也疏曰如嗣之意以十二月下

辛卜正月上辛日為郊之時則於此一辛之上卜不吉以至二卜不吉以至三卜求吉之道三故曰

禮也 四卜非禮也

僖三十一年襄十一年皆四卜
疏曰僖三十一年以十二月下辛卜

正月上辛不從則以正月上辛所謂三卜禮也今以

三月以前不吉更以三月下辛卜四月上辛則謂

四卜郊非禮也成十年以四月以前四卜不吉又

於四月下辛卜五月上辛則五卜強也非禮可知

鄭嗣之意亦以一辛之中卜至於四五月也一辛

之上三卜禮也四卜五卜非禮也然則四卜云非

禮五卜變文云強者四卜雖失猶去禮近容有過

失故以非禮言之若至五卜則是知其

不可而強為之去禮已遠故以強釋之

五卜強也

成十年 卜免牲者吉則免之不吉則否牛傷不言

傷之者傷自牛作也故其辭緩

宣三年郊牛之口
傷以牛自傷故加

之言全曰牲傷曰牛未牲曰牛其牛一也其所以

為牛者異

已卜日成牲而傷之曰牛未卜日未成牲之牛二者不同

有變而不

郊故卜免牛也已牛矣其尚卜免之何也

災傷不復以郊

怪復卜免之

禮與其亡也寧有

於禮有卜之與無卜寧當有卜

嘗置之

上帝矣故卜而後免之不敢專也

嘗置之滌宮名之為上帝牲故

不敢擅施也

卜之不吉則如之何不免安置之繫而待

六月上甲始庀牲然後左右之

庀具也待具後牲然後左右前牛在

我用之不復須卜已有新牲故也周禮曰司門掌授管鍵以啓閉國門祭祀之牛牲繫焉然則未左

右時監門者養之

子之所言者牲之變而曰我一該郊之

變而道之何也我以六月上甲始庀牲十月上甲

始繫牲十一月十二月牲雖有變不道也

牲有變則改卜

牛以不妨郊事故不言其變疏曰上言子者弟子問穀梁子辭而曰我者是弟子述穀梁子自我

之意我以六月者是穀梁子答前弟子之辭我以六月上甲始庀牲庀具猶簡擇未繫之待十月然

後始繫養若六月簡訖以後有變則七月八月九月上甲皆可揀擇故傳云六月上甲始庀牲明自

六月為始七月八月九月皆可簡牲自十月繫之有變則改卜卜取吉者十一月十二月亦然

之三月也故傳云十月上甲始繫牲十一月十二月牲雖有變不道也是也待正月然後言牲之變

周正是郊時之正如其牛有變然後待正月然後言言之二月三月亦然重妨郊故也

牲之變此乃所以該郊

至郊時然後言其變重其妨郊也十二月不道自前

可知也至正月然後道盡則二月三月亦可知也此所以該郊言其變道盡

疏曰自六月上甲始庀

牲十月始繫牲自十二月以前牲雖有變不道自正月然後云牲之變乃不郊卜免牲吉與不吉如此之類皆是該備郊事

郊享道也貴其時大其禮

其養牲雖小不備可也

享者飲食之道牲有變則改卜牛郊日已逼庀繫之

禮雖小不備合時得禮用之可也

子不忘三月卜郊何也

三月謂十二月

正月二月也 疏曰既言十二月下辛卜正月上辛正月下辛卜二月上辛二月下辛卜三月上辛

注經不書此十二月正月

郊自正月至于三月郊

之時也

有變乃志常事不書

我以十二月下辛卜正月上辛

如不從則以正月下辛卜二月上辛如不從則以

二月下辛卜三月上辛如不從則不郊矣

意欲郊而卜不

吉故曰不從郊必用上辛者取其新潔莫先也

哀公十三年公會吳晉

盟吳人因子服景伯景伯謂太宰曰魯將以十月

上辛有事於上帝先王季辛而畢何世有職焉

有職

於祭事

疏曰七月辛丑盟因景伯以還今景伯稱十月當謂周之十月周之十月非祭上帝先公

之時且祭禮終朝而畢無上辛盂於季辛之事景
伯以吳信鬼皆虛言以恐吳耳春秋左氏傳

春其帝大皞其神句芒

此蒼精之君木官之臣自古以來著德立功者也大皞宓戲氏

句芒少皞氏之子曰重為木官也疏曰其帝大皞者謂自古以來木德之君其帝大皞也謂之皞者衆異義古

尚書說元氣廣大謂之皞天則皞皞廣大之意以伏羲德能同天故稱皞以東方生養元氣盛大西方收斂元

氣便小故東方之帝謂之大皞西方之帝謂之少皞其神句芒者謂自古以來主春立功之臣其祀以為神是

句芒者主木之官木初生之時句芒屈而有芒角故云句芒言大皞句芒者以此二人生時木王主春立德立功

及其死後春祀之時則祀此大皞句芒故言也此之言據死後享祭之時不論生存之日故云其神句芒句芒

言其神則大皞亦神也大皞言帝則句芒當云臣也互而相通大皞在前句芒在後相去縣遠非是一時大皞

木王句芒有主木之功故取以相配也又曰蒼是東方之
色故下云駕蒼龍服蒼玉此是蒼精之君也則東方
當木行之君也云蒼德立功者蒼德謂大皞立功謂司
芒也云大皞安戲氏者以東方立德則謂之大皞德能
執秩犧牲謂之秩犧即安戲也俾歷志云大皞作罔嗇
以田漁取犧牲故天下號曰庖犧氏又帝王世紀云取
犧牲以供庖厨食天下故號曰庖犧氏或作安戲氏者
安字誤也當穴下蒼必是古之狀字案帝王世紀云大
皞帝庖犧氏風姓也母曰華胥遂人之世有大人之迹
出於雷澤之中華胥履之生庖犧於成紀蛇身人首有
聖德為百王先帝出於震未有所因故位在東主春象
日之明是以稱大皞一號黃熊氏云少皞氏之子曰重
為木官者案昭二十九年左傳蔡墨云少皞氏有四叔
曰重曰該曰脩曰熙重為句芒該為蓐收脩及熙為玄
冥顓頊氏有子曰犁為祝融共工氏有子曰句龍為后
土是重為句芒若然案楚語云重為南正司天犁為火

正司地所以又為南正火正不同者蓋重為木正兼為
南正司天犁為火正兼為北正司地故韋昭注國語云
火當為北重既顓頊時為南正案楚世家高辛氏誅重
犁依帝繫顓頊高辛各有一人為帝則重既事顓頊又
事高辛鄭則依命歷序以顓頊傳九世帝嚳傳十世則
重何得事顓頊又事高辛者師解重人號雖子孫皆號
曰重猶若羿為堯時射官至夏后相之時猶有羿也自
古以來紀君臣之號案昭十七年左傳云顓頊以來不
能紀遠乃紀於近命以氏事服注云自少皞以上天子
之號以其德百官之號以其徵自顓頊以來天子之號
以其地百官之紀以其事則伏羲神農黃帝少皞皆以
德為號也高陽高辛唐虞皆以地為號也雖以其地為
號兼有德號則帝嚳夏其帝炎帝其神祝融此亦脩之
顓頊堯舜是其德號夏其帝炎帝其神祝融此亦脩之
臣自古以來著德立功者也炎帝大庭氏也祝融顓頊
氏之子曰犁為火官疏曰何胤云春秋說云炎帝號

大庭氏下為地皇作耒耜播百穀曰神農也云犁為火
官者崇昭二十九年左傳云顓頊氏有子曰犁為祝融

杜注云祝
融明貌

中央其帝黃帝其神后土

此黃精之君土官
之神自古以來著

德立功者也黃帝軒轅氏也后土亦顓頊氏之子曰犁
兼為土官疏曰案昭二十九年左傳云顓頊氏有子

曰犁為祝融共工氏有子曰句龍為后土后土為土官
知此經后土非句龍而為犁者以句龍初為后土後轉

為社后土官闕犁則兼之故鄭注大宗伯云犁食於火
土以宗伯別云社稷又云五祀句龍為社神則不得又

為五祀故
云犁兼也

秋其帝少皞其神蓐收

此白精之君金官之
臣自古以來著德立

功者也少皞金天氏蓐收少皞氏之子曰該為金官
疏曰案此秋云其帝少皞在西方金位左傳昭元年云

昔金天氏有裔子曰昧為玄冥師生允格臺駘金天
氏與少皞金位相當故少皞則金天氏也又帝王世紀

少皞帝號曰金天氏云少皞氏之子曰該為金官者案左傳昭二十九年蔡墨云少昊氏之子曰該又云該為

蓐收是為金神佐少皞於秋蓐收者言秋時萬物推辱而收故冬其帝顓頊其神玄冥

此黑精之君水官之臣自古以來著德立功者也顓頊高陽氏也玄冥少皞氏之子曰脩曰熙為水官疏曰

案五帝德云顓頊高陽氏姬姓也又帝王世紀云生十年而佐少皞十二年而冠二十年而登帝位在位七十

八年而崩以水承金也云玄冥少皞氏之子曰脩曰熙者案昭二十九左傳云少皞氏有子曰脩曰熙又云

脩及熙為玄冥是相代為水官也季冬乃畢祀帝之大臣天之神祇

四時之功成於冬孟月祭其宗至此可以祭其佐也帝之大臣句芒之屬天之神祇司中司命風師雨師疏

曰案上孟冬祈來年于天宗大剋祠於公社臘先祖五祀是謂蜡祭則百神皆祭則一變而致羽物山林之祇

再變而致鱗物川澤之祇是蜡祭並祭山川是嶽瀆及衆山川也孟冬不見者文不具孟冬祭嶽瀆因及衆山川至此又更祭衆山川山川少於嶽瀆是孟月祭其宗此月祭其佐前五冬是祭先嗇神農井祭五帝但孟冬其文不具則五帝為宗大臣勾芒等為佐是孟月祭其宗此月祭其佐也孟冬祭司中等是孟月祭宗此月祭佐則天神人鬼山川等皆有宗有佐也故鄭先云孟月祭宗至此祭佐後解帝之大臣天神地祇若然山川卑於帝之大臣在先言故以為尊卑之序無義例也熊氏云孟冬祭宗至此祭佐唯天恐非也以上禮記月令

右配帝及帝臣

掌次朝日則張大次小次設重幣重綦

朝直遶反重直龍反朝日春

分拜日於東門之外次謂幄也大幄初往所止居也小幄既接祭退俟之處祭義曰周人祭日以朝及闇非有

強力孰能支之是以退侯與諸臣代有事焉重帝腹帝
重案牀重席也疏曰言朝日首謂春分朝日則張大
次小次者次謂帷帳也大幄小幄但幄在幕中既有幄
明有帷幕可知設重帝者謂於幄中設承慶云重案者
案則牀也牀言重謂牀上設重席不言氈及皇邸亦有
可知上氈案不言重席亦有重席可知互見為義又曰
知朝日春分者祭義云祭日於東故鄭約用春分也云
拜日於東門之外者謂在東郊覲禮文云次謂幄也大
幄初往所止居也小幄既接祭退侯之處者必兩處設
幄者大幄謂王侵晨至祭所祭時未到去壇墠之外遠
處設大次王且止居故云大幄初往所止居也接祭者
與羣臣交接相代而祭去壇宜近置一小幄退侯之處
云祭義曰周人祭日以朝及闇引此已下者欲見王與
臣接祭之時須有小幄也言孰能支之者謂一日之間
雖有強力誰能支持乎云重帝視帝者謂兩重為之云
重案牀重席者案司几筵莞筵繡席次席三重此言重

席亦當有此三重與重帝不同天官

大宗伯以賓柴祀日月星辰

實

實牛柴上也故書賓柴或為賓柴星謂五緯辰謂日月所會十二次疏曰云實柴實牛柴上也者案肆師職

此三者皆實牲先鄭直據實柴為實牛者偏據一邊而言耳其實皆牛也云故書實柴或為實柴者省柴無義

後鄭雖不破當還從實柴也云星謂五緯者五緯即五星東方歲星南方熒惑西方太白北方辰星中央鎮星

言緯者二十八宿隨天左轉為經五星右旋為緯案元命包云文王之時五星以聚房也星備云五星初起肇

牛此云星明是五緯又案星備云歲星一日行十二分度之一十二歲而周天焚惑日行三十三分度之一三

十三歲而周天鎮星日行二十八分度之一二十八歲而周天太白日行八分度之一八歲而周天辰星日行

一度一歲而周天是五緯所行度數之事且諸文皆星辰合解之故尚書堯典云歷象日月星辰洪範五紀亦

云星辰鄭皆星辰合釋者餘文於義不得分爲二故合
釋此文宵上下不見祭五星之文故分星爲五緯與辰
別解若然辰雖據日月會時而言辰即二十八宿也案
昭七年左氏傳晉侯問伯瑕曰何謂六物對曰歲時日月
星辰是謂也公曰多語寡人辰而莫同何謂辰對曰
日月之會是謂辰故以配日是其事但二十八星而有
七不當日月之會直謂之星若日月所會則謂之宿謂
之辰謂之次亦謂之房故尚書堦征云辰弗集于房孔
注云房日月所會是也禮記郊特牲曰郊之祭也迎長
日之至也大報天而主日也兆於南郊就陽位也埽地
而祭於其質也祭義曰郊之祭也大報天而主日配以
月則郊祭并祭日月可知其餘星也辰也亦自明矣

春官 典瑞掌玉瑞玉器之藏辨其名物與其用事設其

服飾

藏才浪反
服飾服玉之飾

謂以見曰瑞禮神曰器瑞符信也

見賢遍反藉在夜反下

同疏曰言字玉瑞玉器之藏者玉之美者入天府藏之凡平者仍在典瑞藏之故亦言藏也人執之則曰瑞即下文鎮圭之等是也禮神曰器則下文四圭之等是也云辨其名物者圭璧之等各有名并物色有異云與其用事者為事而用圭璧謂朝聘朝日祭祀之等皆是也云設其服飾者謂纁藉在玉若人之衣服之飾也又曰人執以見曰瑞禮神曰器者據此文及大宗伯相對而說散文則人執亦名器故聘禮記云圭璋璧琮凡此四器者唯其所寶以聘可也又尚書云五器卒乃復皆是人執而名器也云瑞符信也者若天子受瑞於天諸侯不得受瑞於天唯受瑞於天子故名瑞瑞即符信者也云纁藉即下文纁五采五就之等也

圭執鎮圭纁藉五采五就以朝日

纁有五采文所以薦玉木為中榦用韋衣

而畫之就成也王朝日者示有所尊訓民事君也天子常春分朝日秋分夕月觀禮曰拜日於東門之外故書

鎮作瑱鄭司農云音讀為指紳之指謂插之於紳帶之間若帶劔也瑱讀為鎮玉人職曰大圭長三尺柎上終葵首天子服之鎮圭尺有二寸天子守之繅讀為藻率之藻五就五币也一币為一就疏曰指插也謂插大圭長三尺玉琬於帶間手執鎮圭尺二寸繅藉五采五就者謂以五采就繅藉玉也以朝日者謂以春分朝日於東郊也又曰云繅有五采文所以薦玉也云木為中餘用采之名故云繅有五采文所以薦玉也云木為中餘用韋衣而畫之就成也者鎮圭尺二寸廣三寸則此木版亦長尺二寸廣三寸與玉同然後用韋衣之乃於韋上畫之一采為一币五采則五币一币為一成就也是采色成者也案聘禮記云絢組尺彼組不問尊卑皆用五采長尺以為繫所以束玉使不落絢組繫亦名繅藉者則曲禮云其有指者則謁聘禮云上介屈繅以授賓是亦名繅藉者也云王朝日者示有所尊訓民事君也者王者父天母地凡日妙月故春分朝日秋分夕月以

王者至尊猶朝日夕月況民得不事君乎是訓民事君也云天子常春分朝日秋分夕月知者案祭義云祭日於東祭月於西又玉藻云玄端而朝日於東門之外又覲禮春拜日於東門之外既春拜日於東明秋夕月於西故知春分朝日秋分夕月也鄭司農云晉讀為搢紳之搢者漢有搢紳之士亦謂搢笏於紳故讀從之云謂搢之於紳帶之間者凡帶有二者大帶大夫已上用素士用練即紳也又有革帶所以珮玉之等今搢笏者插於紳帶之外革之內故云紳帶之間也云若帶劔也者劔在紳帶之間同處也云玉人職曰大圭長三尺杼上終瘵首天子服之者案彼注云杼殺也終瘵首謂大圭之上近首殺去之留首不去處為杼頭齊人名杼為終瘵首故名圭首為杼頭者為終瘵首也案玉藻云天子搢珽方正於天下即此大圭也云鎮圭尺有二寸天子守之者亦玉人文引之證經大圭與鎮圭之義也云繅讀為藻率之藻者桓二年臧哀伯諫辭也藻是水草之文

故讀從之也云五就五币也一币為一就者下文有三采者亦一采為一就下云二采一就者據臣行聘不得與君同是以二采采為一行二采共為一就凡言就者或兩行名為一就即此上下文是也或一币二行為二就就即等也故聘禮記云所以朝天子圭與繅皆九寸又云繅三采六等朱白蒼注云以三色再就謂三色色謂再就就亦等也三色即六等禮記雜記亦云三采六等注云三采六等以朱白蒼畫之再行行為一等是等為一行行亦為就據單行言之也

圭璧以祀日月星辰

圭其邛為璧取殺於上帝殺色界反下同疏曰祭日月謂若春分朝日秋分夕月并大報天主日配以月其星辰所祭謂小宗伯四類亦如之注云禮風師雨師於郊之屬又月令云祈來年於天宗鄭云天宗日月星辰亦是也祭法埋少牢已下祭日月星辰謂禱祈而祭亦用此圭璧以禮神也又曰云圭其邛為璧者上文四

圭兩圭及下璋卹皆言卹鄭皆以卹為璧但此圭云璧不言卹故鄭還以卹解璧也云取殺於上帝者但郊天及神州之神雖相對但天尊地卑故四二有異鄭直云象不言殺也今日月星辰天神故以殺言之也言殺者取降殺以二為節也同上

玉人之事圭璧五寸以祀日月星辰

其禮

神也圭其卹為璧取殺於上帝疏曰此圭璧謂以璧為卹旁有一圭故云圭其卹為璧也云取殺於上帝者案上文四圭以祀天此日月星辰為天之佐故一圭是取殺於上帝也案典瑞云兩圭有卹以祀地璋卹射以祀山川彼山川亦取殺於地此不言者文略彼又有珍圭牙璋此不言者亦是文略並玉人造之可知冬官

天子立端而朝日於東門之外

端當為冕宇之誤也玄衣而冕冕服之下

朝日春分之時也東門謂國門也疏曰知端當為冕者凡衣服皮弁尊次以諸侯之朝服次以立端案下諸

侯皮弁聽朔朝服視朝是視朝之服卑於聽朔今天子
皮弁視朝若立端聽朔則是聽朔之服卑於視朝與諸
侯不類且聽朔大視朝小故知端當為冕謂立冕也是
冕服之下案宗伯實祭祀日月星辰則日月為中祀而
用立冕者以天神尚質按魯語云大采朝日少采夕月
孔晁云大采謂袞冕少采謂黼衣而用立冕者孔氏之
說非也故韋昭云大采謂立冕也少采夕月則無以言
之云朝日春分之時也者以春分日長故朝之然則夕
月在秋分也案書傳略說云祀上帝於南郊即春迎日
於東郊彼謂孟春與此春分朝日別朝事儀云冕而執
鎮圭帥諸侯朝日於東郊此云朝日於東門者東郊在
東門之外達濬門而言之也云東門謂國門也者以朝
事儀云朝日東郊故東門是
國城東郊之門也玉藻

右日月星辰 記王宮祭日夜明祭月幽宗祭星

王宮日壇王君也日稱君宮壇營域也夜明亦謂月壇也宗皆當為崇字之誤也幽崇亦謂星壇也

星以昏始見崇之言營也春秋傳曰日月星辰之神則雪霜風雨之不時於是乎崇之見賢通反

官也日神尊故其壇曰君宮也夜明祭月也者夜

明者祭月壇名也月明於夜故謂其壇為夜明也幽宗祭星也者祭星壇名也幽闇也宗當為崇崇

壇域也星至夜而出故曰幽也為營域而祭之故曰幽崇也云宗皆當為崇者以經云幽宗宗字無

義而與崇字相近故並讀為崇也崇之言營者案莊二十五年公羊傳云以朱絲營社或曰脅之或

曰為闇恐人犯之故營之是崇有營義故讀為崇云詳見祭法

祭日於壇祭

月於坎

疏曰此經及下經皆據春分朝日秋分夕月祭日於壇謂春分也祭月於坎謂秋分

也祭日於東祭月於西

疏曰祭日於東用朝旦之時祭月於西鄉夕之時而

崔氏云祭日於壇祭月於坎還據上文郊祭之時今謂若是郊祭日與月當應同處何得祭日於壇

祭月於坎日於東月於西祭不同處則崔說非也崔又云日月有合祭之時謂郊祭天而主日配以

月其禮大用牛各祭之時謂春分朝日秋分夕月其禮小故祭法用少牢今謂小司徒云小祭祀奉

牛牲鄭注謂立冕所祭自立冕皆用牛也何得用少牢今謂祭法日月用少牢鄭云禱祈之祭也崔

氏說又非崔氏又云迎春之時兼日月者今案諸文迎春迎秋無祭日月之文小宗伯云兆五帝於

四郊四望四類亦如之謂四望四類之祭亦如五帝在四郊故鄭云兆日於東郊兆月與風師於西

郊不謂兆五帝之時即祭日月崔說又非祭義

傳古者先王既有天

下又崇立於上帝明神而敬事之

崇尊也立立其祀也上帝天也

明神日月也

於是乎有朝日夕月以教民事君

禮天子以春分

朝日以秋分夕月拜日於東門之外然則夕月在西門之外必矣

國語周語

天子大

采朝日與三公九卿祖識地德

禮天子以春分朝日亦有尊也虞說

云大采衮織也祖習也識知也地德所以廣生昭謂禮玉藻天子玄冕以朝日玄冕冕服之下則大

采非衮織也周禮王指大圭執鎮圭藻五采就以朝日則大采謂此也言天子與公卿因朝日以

脩陽政而翬地德因夕月以治陰教而糾天刑日照晝月照夜各因其明以脩其事也

日中

考政與百官之政事師尹維旅牧相宣序民事

宣偏

也序次也三君云師尹大夫官也掌以美詔王維
陳也旅衆士也牧州牧也相國相也皆百官政事

之所及也一曰師尹少采夕月與大史司載糾虔
公也詩云赫赫師尹

天刑

采夕月以秋分糾恭也虔敬也刑法也或云少
采黼衣也昭謂朝日以五采則夕月其三采

也戴天文也司天文謂馮相氏保章氏與大史相
儼偶也此因夕月而恭敬觀天法考行度以知妖

祥也日入監九御使潔奉禘郊之粢盛

監視也九御
九嬪之官主

樂盛祭
服者

而後即安

即就也
國語魯語

古者帝王躬率有

司百執事而以正月朝迎日于東郊所以為萬物

先而尊事天也祀上帝于南郊所以報天德迎日

之辭曰維某年月上日明光于上下勤施于四方

旁作穆穆維予一人某敬拜迎日東郊

堯典曰寅賓出日此

之謂也尚書大傳

莊公十八年日有食之穀梁子曰不

言日不言朔夜食也何以知其夜食也曰王者朝

日

王制曰天子玄冕而朝日於東門之外故曰始出而有虧傷之處是以知其夜食也何休曰春

秋不言月食日者以其無形故闕疑其夜食何緣書乎鄭君釋之曰一日一夜合為一日今朔日月

始出其食虧傷之處未復故知此日以夜食夜食則亦屬前月之晦故穀梁不以為疑疏曰此是

禮記玉藻文而云王制者謂王者之法制非是王制之篇也此魯事而輒言天子朝日者言王者朝

日所以顯諸侯朝朔也天子朝日於東門之外服
玄冕其諸侯則玉藻云皮弁以聽朔於太廟與天
子禮異其禮雖異皆早旦行事而昨夜有虧傷之
處尚存故知夜食也徐邈云夜食則星無光張靖
策廢疾云立八尺之木不見其影並與范意異也
故雖為天子必有尊也

貴為諸侯必有長也故天子朝日諸侯朝朔

大宗伯以禋燎祀司中司命觀師雨師

禋羊九反燎良召反觀音風

禋積也詩曰芄芄棫稷薪之禋之積柴實牲體焉燔燎而升煙所以報陽也鄭司農云司中三能三階也司命文昌官星風師箕也雨師畢也玄謂司中司命文昌第五第四星或曰中能上能也能他來反疏曰云禋積也詩云芃芃棫稷薪之禋之者此大雅棫稷之篇引之證禋得為積也云積柴實牲體焉燔燎而升煙者此

司中司命等言燹燎則以用煙也云燹燎而升煙所以
報陽也者案郊特牲云升首於室以報陽彼論宗廟之
祭以首報陽今天神是陽煙氣上聞亦是以陽報陽故
取特牲為義也先鄭云司中三能三階也者案武陵太
守星傳云三台一名天柱上台司命文昌宮星者亦據星
為司徒下台司祿為司空云司命文昌宮星者亦據星
傳云文昌宮第四曰司命第五曰司中二文俱有司中
司命故兩載之云風師箕也者春秋緯云月離於箕風
揚沙故知風師箕也云雨師畢也者詩云月離於畢俾
滂沱矣是雨師畢也若左氏傳云天有六氣降生五味
即五行之味也是陰陽風雨晦明六氣下生金木水火
土之五行鄭義大陽不變陰為金雨為木風為土明為
火晦為水若從妻所好言之則洪範云星有好風星有
好雨鄭注云箕星好風畢星好雨是土主為木八妻木
八為金九妻故東方箕星好風西方畢星好雨以此推
之則北斗宮好嶼南宮好暘中央四季好寒皆是所尅為

儀禮經傳通解續卷二十二